

**NATIONAL ASSEMBLY OF
SEYCHELLES**

Wednesday 19th June 2024

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye ki pe asiste nou ozordi. Bonzour nou piblik ki swiv nou an deor. Nou ti pou annan en group viziter, envite distrik Beau Vallon. Me zot in enformen ki zot in ganny retar aköz trafik. Nou ava salye zot ler zot antre. Me pou komanse osi, Onorab Hoareau ti'n demann mwan laparol pou dir en mo lo lapar *Bills Committee*. Onorab Hoareau?

HON JOHN HOAREAU

Mersi Mr Speaker. Bonzour Mr Speaker. Bonzour tou Manm. Bonzour tou dimoun a lekout. Mr Speaker, se avek gran tristes ki *Bills Committee* in ganny lenformasyon ki Mr Gamoughisha en *Principal Drafter* kot *AG's Chambers* in *passed* Lendi swar. E nou lo

nou kote nou'n travay avek sa msye en kantite. I en msye ki posed en kantite talan lo *legal drafting*.

E mon konnen i pou kit en trou vid kot son biro kot *Attorney Zeneral*. Alor, nou pe pas nou kondoleans lo lapar *Bills Committee*. E lo lapar Lasanble an zeneral, pou son fanmir e zanmi e osi pou bann dimoun ki travay avek li kot *Lofis Attorney Zeneral*. Ki son nanm a repoze an pe. Mersi.

MR SPEAKER

Mersi Onorab Hoareau. Nou a fer *First Reading* en *Public Bill*. Madanm Clerk, avan nou al lo lot biznes.

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble. E tou dimoun ki a lekout. Nou *Bill* ki pe ganny prezante bomaten i *Functional Capacity Assessment Bill, 2024*.

This Act may be cited as the Functional Capacity Assessment Board Act, 2024, and shall come into operation on such date as the Minister may, by notice published in the Gazette, appoint. Mersi Mr Speaker.

MR SPEAKER

Mersi Madanm Clerk. Bon, premye *item* lasemenn parey regilyerman *Private Notice Question*. Madanm raporter, i ava apel Minis pou *PNQ*. Bon, bonzour Minis pou Finans, Plan Nasyonal e Komers Mr Naadir Hassan. E bonzour Mr Francis Lebon *Principal Secretary* pou Komers. E Mr David Jean-Baptiste *Acting CEO Seychelles Trading Company*.

Mersi pou zot partisipasyon lo *Private Notice Questions*, byenveni dan Lasanble. Nou a pran *Private Notice Question*. Onorab Pillay ou a met ou kestyon silvouple?

HON SEBASTIEN PILLAY

Mersi Mr Speaker. Bonzour Minis ek ou delegasyon. Bonzour tou dimoun ki a lekout. Bonzour tou koleg Onorab. Mr Speaker, mon *Private Notice Question* i lir koumsa; Eski Gouvernman i kapab dir ek Lasanble kan eski bann travayer *STC* pou ganny peye zot *bonus*? Mersi Mr Speaker.

MR SPEAKER

Mersi Onorab. Minis, ou repons silvouple.

MINISTER NAADIR HASSAN

Mersi Mr Speaker. Mr Speaker, Dirizan Lopoziyon, Dirizan

Zafer Gouvernman, tou bann Manm Lasanble, e tou dimoun a lekout bonzour. Mersi Onorab pou ou kestyon.

Mr Speaker, sa kestyon i donn mwan loportinite pou eksplik en pe mannyer tranzaksyon finansyel en lakonpanyen i marse. An vi ki i paret ki i annan serten dimoun ki pa pe konpran.

Sa kestyon i donn mwan osi loportinite pou anmenn plis klarite e donn lenformasyon ki bon e korek. E rezet bann politik popilis serten politisyen.

Mr Speaker, avan ki okenn lakonpanyen i kapab fer okenn lezot depans enn fwa en lannen finansyel i terminen an relasyon avek kont sa lannen, i bezwen annan en odit pou rekonsilye reveni ek depans.

Aprè sa legzersis, kont bann tranzaksyon kot bann tranzaksyon i ganny sertifye ki la en lakonpanyen i dan en pozisyon pou konnen ki kantite larzan i reste pou sa lannen partikilye apre ki in pey tou son lobligasyon.

Se selman apre ki kont finansye anyel in ganny odite e sertifye, ki en lakonpanyen i dan en pozisyon pou deklare si pou fer peyman *bonus* oubyen non.

Alor Mr Speaker, sa ki mon fek eksplike i fason ki tou lakonpanyen e biznes i fer e fonksyonnen. I form parti bon pratik gouvènanans finansyel.

Mr Speaker, pou sa enn kestyon mon oule enform sa Lasanble ki peyman *bonus* travayer *STC* pou fer enn fwa kont finansyel 2023 sa lakonpanyen i ganny sertifye.

Sa peyman pou fer ver mwan Zilyet 2024. Mon oule met lo rikord ki a 2 repriz, *management STC* in gard travayer enformen lo sa size dan en premye kominikasyon date le 9 Avril, *Staff* ti ganny enformen ki *Board* in aprouve pou fer en peyman *bonus* pou lannen 2023. E dan en dezyenm kominikasyon date le 10 Zen, *management* ti konfirm avek *staff* ki peyman sa *bonus* pou fer ver lafen mwan Zilyet 2024.

Mr Speaker, avek ou permisyon, mon anvi eksprim mon dezapwentman ki en size telman kler e transparan in bezwen vin en *PNQ* koman en size irzan lo en lenportans nasyonal. I sagrinan ki privez ki *Leader* Lopozisyon i annan pou anmenn kestyon lo size nasyonal...

(Interruptions)

MR SPEAKER

Order! Order! Minis mon krwar ou'n reponn kestyon. Mon krwar ou'n reponn kestyon. E nou pa devret al dan bann size politik. Mon pou remersye ou pou ou kestyon. E nou a pran kestyon siplemanter silvouple. Mersi Minis. Onorab Henrie, ou kestyon siplemanter?

HON GERVAIS HENRIE

Mersi Mr Speaker. Bonzour tou dimoun. E partikilyerman *welcome panel* dan Lasanble Nasyonal. Mon premye kestyon Mr Speaker, par lefe ki *STC* i enn parmi bann lezot antite ki tonm anba responsabilite Minister Finans, mon anvi Minis i dir nou, ki mekaniz zot annan an plas ouswa ki fason zot ti ava kontan travayer i rezourd bann sityasyon kot ler i annan en keksoz ki zot pa tro konpran, zot konfize *about*, zot annan en *grievance about*,

Kote zot ale pou rezourd sa problenm? Kot *HR*, kot *CEO*, kot *Chairman Board*, kot ou menm, ouswa i vin kot en politisyen pou ki sa size i vin en foutbol politik? Ki mezir ki zot ti ava kontan war an plas. Sa i mon premye kestyon.

Dezyenm kestyon, par lefe ki baze lo kestyon orizinal, kan pou pey *bonus*? Larepons i Zilyet. Akoz Minis in donn bann lezot lenformasyon an plis, ki in

donn lenportans sa kestyon konmsi vremen en gran size nasyonal. Larepons kan ti kapab zis Zilyet pou peye. Mersi.

MR SPEAKER

Mersi. Minis, ankor enn fwa nou a sey pran sa kestyon san bann eleman politik. Minis, mon envit ou pou larepons.

MINISTER NAADIR HASSAN

Mersi Mr Speaker. Mersi Onorab pou ou kestyon. Onorab, dan nenport ki lakonpanyen lorganizasyon i annan en prosedir pou okenn *grievance* ouswa klarifikasyon. Premye *call* se ou *supervisor* e si ou bezwen plis ou *escalate to HR*. E mon mazine Acting CEO osi i la. Si i annan nesesite pou al kot *management* pou rod plis lenformasyon. Tou mekaniz i la, ki kapab ganny swiv. So, mon pa war ki rezon ki sa i bezwen vin en size politik.

Lo dezyenm kestyon se Zilyet. In ganny spesifye, ki *bonus* pou peye. I annan 2 kominikasyon ki'n ganny fer ki *bonus* pou ganny peye an Zilyet e sa i kler. In ganny *email* kot *staff*, e *staff* ki napa *email* i ganny mete lo *notice board*. Mersi.

MR SPEAKER

Mersi. Onorab Cosgrow, ou kestyon.

HON WALLACE COSGROW

Mersi Mr Speaker. Bonzour Mr Speaker, bonzour Minis avek ou tim. Bonzour tou Manm Onorab e tou dimoun ki pe ekout nou bomaten. Mr Speaker, i annan en keksoz ki i en pti pe pa kler pou mwan bomaten dan larepons Minis.

Minis, in donn nou prosedir ki ganny swiv par okenn lakonpanyen avan ki zot fer okenn peyman *bonus*. Savedir Minis ou pe dir nou poudir an Avril avek an Zen, zot in enform bann *staff STC* ki *bonus* pou pey an Zilyet.

Now, ou pou konnen si ou pou pey *bonus* ou *staff*, selman ler ou'n fini fer tou sa bann prosedir. E ou konnen ki poudir i annan en *bonus* ki pou kapab ganny peye apre ki ou'n fini fer tou bann prosedir odit.

Me lefe ki ou'n dir li an Avril e an Zen, dan mon lespri se ki tou bann prosedir in fini ganny fer. E ou konnen ki poudir i annan en *bonus* pou ganny peye.

So, akoz Minis ki ozordi apre ki *STC* in deklar R66.07 milyon profi. E zot in anonse an Avril e an Zen ki sa *bonus* pou pey an Zilyet. Akoz i bezwen zot in fini fer tou sa bann prosedir.

So, akoz ki ziska prezan zot pa ankor kapab pey sa bann *staff* zot bann *bonus*.

Akoz Minis, ou lafen dimwan...

MR SPEAKER

Bon, *ok*. Ou'n demann ou kestyon. Pa lev en largiman avek Minis. I annan en bout ou kestyon ki'n ganny reponn, Minis in dir pou dir *bonus* pou ganny peye ler kont in fini odite e deklare. Minis, si ou annan okenn nouvo klarifikasyon lo la ou kapab azoute.

MINISTER NAADIR HASSAN

Mersi Mr Speaker. Mon krwar mon'n fini reponn sa kestyon. Mersi.

MR SPEAKER

Mersi. Onorab Loze, ou kestyon.

HON JOHAN LOZE

Mersi Mr Speaker. Mr Speaker, larepons Minis in les konpran ki bann prosedir lodit *STC* pa ankor konplete. E kestyon ki leve, se eski bann prosedir lodit *STC* pa ankor konplete akoz zot in dekouver bann keksoz lo liv *STC* ki pa devret la...

MR SPEAKER

Sa pa lo kestyon. Sa pa lo kestyon. Ou pe fer...

(Interruptions)

MR SPEAKER

Order! Bann Manm *LDS* silvouple. Ou pe anmenn en lot size ki ou pe sizere ki i annan keksoz ki pa byen avek kont. Sa pa annord. Onorab Woodcock ou kestyon.

HON WAVEL WOODCOCK

Mersi Mr Speaker. Mr Speaker, bonzour. Tou koleg Onorab e tou dimoun a lekout. Minis, peyman *bonus* i depan *obviously* lo reveni, lo profi ki *STC* i fer. E anba ladministrasyon avan, *STC* pa ti pe fer gran profi. Annefe, ti annan bokou bann labi, parey in menm ganny diskite dan sa Lasanble kot i konsern *lease*...

(Interruptions)

MR SPEAKER

Order! Silvouple bann Manm aret kri dan lasal. Onorab Woodcock, si ou annan en kestyon poz li.

HON WAVEL WOODCOCK

Mersi, wi Minis. Annefe, mon ti a kontan konn en pti pe ki bann aksyon ki *STC* in pran *or* Gouvernman li menm, pou *ensure* ki *STC* i pe zer son larzan byen. Ki fer ki i annan

ase - annefe parey ou'n dir ki an Zilyet peyman depandan lo kont mannyer i ete, peyman i ganny fer avek bann travayer.

Eski zot in fer peyman *bonus* pandan sa bann dernyen detrwa lannen ki'n pase? Mersi.

MR SPEAKER

Mersi. Minis, ou repons.

MINISTER NAADIR HASSAN

Mersi Mr Speaker. Mersi Onorab, pou ou kestyon. Onorab, wi i annan bann gro kou ki *STC* in kapab tire. E sa i apre ki parti *LDS* dan Lasanble oparavan ti anmenn sa *issue rent* ki sa ti en gro kou lo *STC*.

E zis pou spesifye, par lannen R10.5 milyon *rent* ti pe ganny peye avek parti *US*. Ki ti azout en vremen en gro kou lo kou *STC*. E sa i enn bann pli gro rediksyon ki'n ganny fer lo loperasyon *STC*. Mersi.

MR SPEAKER

Mersi. Onorab Vidot, ou kestyon.

HON AUDREY VIDOT

Mersi Mr Speaker. Tou Manm Onorab. Minis ek ou delegasyon e tou dimoun ki a lekout. Mon premye kestyon Minis, Minis, si zot pa ti'n *fail* promes pou pey bann travayer an Avril ek Zen, petet zot pa ti pou bezwen vin

kot politisyen. Alor, Minis kwa ki pe fer zot trenn lipye pou zot pran travayer koman en priyorite pou pey zot, zot *bonus*? Sa i mon premye kestyon.

Dezyenmman Minis, vi ki zot in dir pou dir zot koz fortman lo sa 6.6 milyon ekek Roupi ki - 66 plito, *sorry* milyon ki zot koz profi lo la, kwa ki ozordi, zot pa ankor kapab vwar larzan pou zot kapab pey sa bann travayer? Mersi.

MR SPEAKER

I sanble mwan ki mon pou ganny akize ki mon pe vey kestyon lo kote Lopozisyon. Be i annan en keksoz ki pe al mal avek mannyer zot pe demann kestyon. La ankor Onorab, Minis in reponn ou dezyenm kestyon. Akoz zot pa ankor peye? So, mon pou envit bann Manm pou silvouple gard zot kestyon relevan lo kestyon ki'n demande oubyen lo kestyon ki'n donneren.

Minis, ou kapab pran laparol me ou pa bezwen repet leksplikasyon ki ou'n donneren deza.

MINISTER NAADIR HASSAN

Mersi Mr Speaker. Mersi Onorab. Mon'n reponn tou lede kestyon. Mersi.

MR SPEAKER

Onorab Aglae.

HON EGBERT AGLAE

Mersi Mr Speaker. Mon a dir bonzour Minis ek ou *panel*. E tou Manm e tou dimoun a lekout. Minis, nou, nou annan en responsabilite letan okenn dimoun i vin devan nou pou met en konsern pou nou adrese. Mon anvi demann ou en kestyon Minis.

Premyerman, si lodit pa ankor fini, ki mannyer *STC* i kapab vin devan deklare ki in fer en profi 66 milyon? Sa i enn. Dezyenmman, kan eski *financial year STC* i komanse e fini?

MR SPEAKER

Mersi sa i fer 2 kestyon Onorab. Minis, ou repons silvouple.

MINISTER NAADIR HASSAN

Mersi Mr Speaker. Mersi Onorab pou ou 2 kestyon. Premye kestyon i senp se ki i annan en *draft account* ki ganny prepare. E sa i bezwen ganny sertifye apre. Dezyenm kestyon *financial year* i Desanm. Mersi.

MR SPEAKER

Mersi. *Ok*, mon a permet ou en klarifikasyon.

HON EGBERT AGLAE

I kler Minis, be i kler ki letan ou *financial year* i vini, normalman mon pa en *accountant* mwan. I dir ou dan okenn lakonpanyen se apre sa *financial year* son *first quarter* apre *bonus* i sipoze ganny peye. Akoz ki sa pa'n arive? Nou'n ariv *third quarter* la, leklersisman, vi ki ou'n dir i annan en *draft*.

MR SPEAKER

Minis. Mon a permet ou reponn.

MINISTER NAADIR HASSAN

Mersi Mr Speaker. Mersi Onorab. Onorab, bokou lakonpanyen pa *meet* sa *deadline* Avril, akoz i annan en *shortage of* oditer dan pei. E tou odit i *due in April*. E oditer pa'n kapab fini sa louvraz *by* Avril e sa i rezon. Mersi.

MR SPEAKER

Mersi. Bon, mon pou sey ariv a lafen kestyon ki Manm ki'n lev lanmen la. Onorab Sandy Arissol ou kestyon.

HON SANDY ARISSOL

Mersi Mr Speaker. Bonzour Minis avek ou lekip. Bonzour tou bann Manm Lasanble Nasyonal. Tou dimoun ki a lekout spesyalman bann travayer *STC*.

Mr Speaker, kestyon Onorab Pillay i demann Gouvernman si i kapab dir ek sa Lasanble kan eski bann travayer *STC* pou ganny peye zot *bonus*?

Mon ti a kontan demann avek Minis, anvi ki larepons ki ou'n donn nou ti annan en sirkiler ki ti ganny sorti, ki ti ganny anvoye dan *mail* bann travayer. Bann ki napa *mail* parey ou'n dir nou in ganny mete lo en *notice board*. E en drayver in tir portre in anvoy landrwa konsernen kot sa kestyon pou ganny demande.

Mon ti a kontan demann ou, la letan nou pe koze, parske ou sirkiler i dir ki peyman i sipoze ganny fer lafen dimwan Zilyet. Apre tou bann prosedir normal i fini e ozordi nou le 19 Zen.

Eski nou annan en problem dat? Oubyen nou annan en problem mon pa konnen ki mannyer. Eski bann travayer *STC*, zot abitye ganny peye zot *bonus*? Eski letan dat i arive, eski travayer pou gannyen zot *bonus*?

Parski ozordi nou ankor le 19 Zen, nou pa ankor arive le 31 Zilyet parey ou sirkiler i dir. Mersi bokou Mr Speaker.

MR SPEAKER

Mersi. Mersi. Mon krwar Minis in touse lo sa bann pwen. Me i kapab klarifye. Minis?

MINISTER NAADIR HASSAN

Wi Mr Speaker. Mersi Onorab. Zis ankor pou mwan *emphasize* lo sa pwen. Wi, travayer pou ganny peye zot *bonus* an Zilyet. Mersi.

MR SPEAKER

Mersi. Silvouple annou sey pa repas lo lenformasyon ki'n fini ganny donner. Onorab Philip Arissol ou kestyon. Eskiz mwan, ti Onorab Michel Roucou ki ti'n lev lanmen.

HON MICHEL ROUCOU

Mersi Mr Speaker. Bonzour Minis. Bonzour tou dimoun espesyalman bann travayer *STC*. Minis, si ou kapab dir nou an tou an zeneral konbyen travayer *STC* i annan? E konbyen an tou i pou kout *STC* sa *bonus*? E ki bann prosedir zot pou servi...

MR SPEAKER

Ou'n demann 2 kestyon la. Les li reponn sa. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Premye kestyon, i annan 630 travayer.

E dezyenm kestyon i pou kout 3.2 milyon. Mersi.

MR SPEAKER

Mersi. Onorab *Philo. Onorab Rachel Spiro.

HON RACHEL SPIRO

Bonzour Mr Speaker. Mersi Mr Speaker. Bonzour Minis avek ou delegasyon. Minis, ou'n fer nou konpran ki zot in annan retar. E retar i senpleman baze lo odit.

Kestyon se eski napa lezot rezon akoz ki zot in ganny retar avek odit? Petet osi kekfw akoz depar CEO ki'n ganny forse pou li met son demisyon. Eski sa osi pa'n en rezon akoz zot in ganny retar pou pey *bonus* travayer? Mersi.

MR SPEAKER

Onorab Spiro, mon pa'n konpran poudir in dir retar mwan. Mon konpran in dir sa koman prosedir normal. Me ankore enn fwa, Minis...

HON RACHEL SPIRO

Avril pa'n peye...

MR SPEAKER

Klarifye silvouple, Minis.

MINISTER NAADIR HASSAN

Mersi Mr Speaker. Mersi Onorab. Mon repet mon lekor

ankor, kominikasyon ki'n ganny fer ek *staff* i *bonus* pou ganny peye an Zilyet. In toultan kominike koumsa, bann kominikasyon.

Dezyenm, mon krwar mon'n fini reponn sa kestyon lo kote odit. Si zot, zot annan lezot larepons mon pa kapab fer naryen. Mersi.

MR SPEAKER

Dernyen siplemanter lezot Manm. Onorab Richard Labrosse.

HON RICHARD LABROSSE

Mersi Mr Speaker. Bonzour Mr Speaker. Bonzour tou koleg Manm. Bonzour nou bann envite ki'n zwenn nou. Minis, ler mon pe ekout tou sa ki pe pase isi dan Lasanble bann kestyon ki pe sorti.

Mon kestyon i eski ozordi ler nou pe koz *bonus* STC, ler nou pe koz *bonus* ki bann travayer bann lantrepriz Gouvernman i donnen, eski ozordi nou annan en Polisi anmars oubyen en dokiman? Mersi Mr Speaker.

MR SPEAKER

Mersi. Minis?

MINISTER NAADIR HASSAN

Mersi Mr Speaker. Mersi Onorab. Onorab an sa ki

konsern *bonus*, sak lakonpanyen i annan son prop Polisi ki son *Board* in aprouve. E peyman *bonus*, i ganny gide par sa bann Polisi diferan lakonpanyen paraetatik. Mersi.

MR SPEAKER

Mersi. Onorab Pillay, loter kestyon *PNQ* ou annan ou siplemanter prezan.

HON SEBASTIEN PILLAY

Mersi Mr Speaker. Bonzour bann dimoun Beau Vallon ki fek antre dan Lasanble. *Welcome to* Lasanble Nasyonal. Mon oule remersye Minis pou bann larepons ki nou'n gannyen ziska la. Mr Speaker, mon oule met lo rikord ki Minis pa pou *lecture* mwan. I pa kalifye pou *lecture* mwan lo mon rol koman...

MR SPEAKER

Mersi. Nou'n ekoute. Ou osi ou pa pou *lecture* nou silvouple. Dan sa ka ou ava prosede ek ou kestyon.

HON SEBASTIEN PILLAY

Mersi Mr Speaker. Mon pa ti pe *lecture* ou, mon ti pe zis dir ki anba Konstitisyon, ler en manm piblik i vin devan mwan, e met en konsern devan mwan pa zis enn, plizyer i met en konsern

devan mwan, e sa plizyer travayer *STC* ki'n vin war mwan, ki'n koz ek mwan. Bann ki'n riy nou zot ti pe dir ek nou koumsa poudir zot ti sipoze ganny zot *bonus* an Mars.

Vandredi pase zot in reganny dir poudir zot pou ganny peye swa apre Mars en sirkiler in sorti Avril. Vandredi pase zot in ganny dir ankor zot pou ganny peye zot *bonus*, en lot sirkiler in sorti. Se pou sa rezon Mr Speaker, ki nou pe anmenn sa kestyon. Eski Minis pe dir nou sa bann dimoun pe koz lalang avek nou?

MR SPEAKER

Ale, sa ou kestyon?

HON SEBASTIEN PILLAY

Mr Speaker, mon oule ki Minis i klarifye en keksoz pou nou. Ler Minis i dir ek nou koumsa poudir kont pa ankor fini odite, *calendar year* i fini Desanm. Zot in kapab koz lo en *draft account* R66 milyon. Ladan zot pe tike pou donn R3.2 milyon.

So, eski i annan en problem dan sa kont *STC* ki Minis pa pe dir Lasanble? Akoz malgre ki Minis in dir ti annan sa bann labi lepase, *US* in toultan peye *bonus* kot *STC*. E sa ki nou oule met devan Minis Mr Speaker, ler pou Minis, Manm Lasanble ganny nou

gratwite napa oditer. Me ler pou travayer *STC*, tou sa bann travayer ganny zot *bonus*...

MR SPEAKER

Bon, ou'n demann en premye kestyon. Onorab si ou annan en lot ou kapab poze. Nou pa pe fer konparezon.

HON SEBASTIEN PILLAY

Mersi. Mersi Mr Speaker. Mr Speaker, pou ki rezon *STC* i annan en *draft accounts*. Ki sipoze spesifye ladan 3.2 milyon pou *bonus* sa bann travayer. Kwa ki *STC* i bezwen odite ankor ki i pa kapab pey sa bann travayer?

E aköz ki *STC*, in depas letan pou li *submit* son *chart of accounts* pou li *submit* son lodit i an defo. E ladan menm travayer ki pe soufer.

MR SPEAKER

Ok. Nou'n tann 2 kestyon. Minis, ou repons silvouple.

MINISTER NAADIR HASSAN

Mersi Mr Speaker. Mersi Onorab pou ou kestyon. Fotespere tou dimoun i alez ek privez *Leader* Lopozisyon. I dir personn pa pou vin *lecture* li, koman dimoun ki *lecture* dimoun plis.

(APPLAUSE)

MINISTER NAADIR HASSAN

Mr Speaker, tou sa repons ki mon'n donner i kler. *Bonus* pou ganny peye an Zilyet. Si *US* li dan son letan keksoz pa ti pe ganny odite, pa ti bezwen ganny fer byen, e ozordi zot oule pozisyonn zot koman bann gran defander travayer.

Mon konpran zot politik, sa i zis en persepsyon en politik ki zot pe sey kree. Kan laverite i diferan, *ok* ?

Si zot ti *care about* travayer, zot ti pou sarz *STC* R10.5 milyon? Lala ipokrizi ki egziste.

(APPLAUSE)

MINISTER NAADIR HASSAN

Selman ozordi zot ki pli gran defander...

(Interruptions)

MR SPEAKER

Bon. *Order!* Mersi. Minis, si ou'n fini reponn kestyon nou a termin sesyon *PNQ* la. E mon remersye zot, e mon swet zot bonn kontinyasyon. Mersi.

(Minister Hassan and his delegation were excused from the House)

MR SPEAKER

Bon permet mwan a se pwen pou rekonnèt larive nou bann envite pou ozordi, en group zabitan Beau Vallon. Mon swet zot byenveni dan lasanble. E mon a permet Onorab Hoareau adres zot.

HON JOHN HOAREAU

Mersi Mr Speaker. Mr Speaker, se avek loner e gran plezir ki mon pe *welcome* mon pe dir swat byenveni bann dimoun ki sorti Beau Vallon, bann *senior citizens*. E fotespere zot pas en moman agreab avek nou. E zot konpran en pe travay Lasanble, e osi zot osi kapab pran en letan pou zot konpran ki mannyer nou fonksyonnen. Mersi.

MR SPEAKER

Mersi. Nou pou pran en *technical adjournment*. Ziska 9er 45. Onorab Pillay wi? Ou annan laparol.

HON SEBASTIEN PILLAY

Mersi Mr Speaker. Mr Speaker, i kler ki poudir nou komans devlop en *pattern* dan Lasanble. Kot ler nou annan bann kestyon pou demann Minis, apre lot Minis i sipoze vini. Minis pa ankò arive ouswa i pa ankò pare nou bezwen pran *technical adjournment*. Mon pa krwar i devret en problem si nou pe ...

MR SPEAKER

Silvouple, Onorab nou'n donn Minis randevou pou 9 er 45. Nou pou respekte sa. Lasanble pou *adjourn* pou repran 9 er 45. Mersi.

(technical adjournment)

MR SPEAKER

Nou ava apel Minis pou kestyon silvouple. Bonzour Minis pou Zafer Etranzer e Touris Mr Sylvestre Radegonde. Bonzour Anbasader Vivian Fock Tave ki *PS* pou *Foreign Affairs*. Mrs Bernadette Willemin ki Direkter Zeneral *Destination Marketing* dan *Tourism Department*. E Mrs Jenifer Sinon Direkter Zeneral pou *Human Resources and Administration*.

Mersi pou zot prezans, e byenveni dan Lasanble. Kestyon ki nou annan ozordi, premye i 149 dan non Onorab Egbert Aglae. Onorab?

HON EGBERT AGLAE

Mersi Mr Speaker. Mon a dir bonzour Minis avek ou *panel*. Bonzour tou nou envite ki dan *Gallery*. E bonzour ankò enn fwa pep Seselwa. Kestyon i *comme suivant*;

Eski Minis i kapab dir ek sa Lasanble lekel bann marse

potansyel ki Departman Touris pe tap ladan pou anmenn plis touris Sesel?

MR SPEAKER

Mersi Onorab. Minis, ou repons silvouple.

MINISTER SYLVESTRE RADGONDE

Bonzour Mr Speaker. Mersi Onorab pou ou kestyon. Mr Speaker, Onorab *Leader* Lopozisyon. Onorab *Leader* Zafer Gouvernman, bann envite dan *Gallery* tou dimoun ki pe swiv sa sesyon.

Mr Speaker, tradisyonnelman parey tou dimoun i konnen, Lerop prensipalman *Western Europe*, in toultan marse prensipal pou touris ki vin Sesel.

I en marse ki nou konsidere i *mature* ozordi. E ziska konmela pei erezman, malerezman i ankor pe depan lo sa marse pou anviron 75 pousan biznes touris ki vin Sesel. Me ki nou'n trouve, pandan bann lannen sirtou dernyen lannen.

E *COVID* in montre nou en leson kler ki met tou nou dizef dan en sel pannyen, depan lo en sel marse, en sel rezyon i annan risk e i anmenn risk, kot sa marse li menm i annan bann *challenge*. E kot i napa i annan

lezot kriter ki vin ladan ki fer difisil.

Donk, pandan plizyer lannen menm avan mon arive dan sa pozisyon, i annan en travay ki'n ganny fer pou nou diversifye sours nou *market*. Reget posibilite aryer ki *Western Europe* pou sours nou bann viziter. E sa travay i pe kontinyen, e nou kontinyen.

Nou *challenge* isi se ki la kot nou war biznes par egzanp mon a donn ou en marse koman Lenn, koman Lasin ki annan en gran potansyel pou viziter. Nou *challenge* i toultan reste kolektivite aeryen.

Sa i nou nouvo *challenge*, nou eseye dan la mezir si posib pou nou rod bann partenarya avek bann laliny aeryen. I kler ki *Air Seychelles* annan de ler son avyon i napa ase avyon. E annan de ler zistans i fer ki sa priyorite ki nou oule donner ki bann viziter i demande ankouri, bann vol direk i fer ki nou laliny aeryen pa kapab donn nou sa kapabilite. Donk, nou an diskisyon avek plizyer laliny aeryen.

Vwala kot nou ete Mr Speaker, e zis pou mwan konklir lo la si oule non pei dan *Western Europe*, La Frans i reste limero enn marse.

Lalmanny ziska tre resaman Larisi, malgre i pa *dan*

Western Europe, Larisi ti nou dezyenm marse. E parey zot konnen la, *Aeroflot* i nepli pe anvol isi ziska Septanm, oktob. E *Italy*, *L'Espagne* e *La Suisse* i sa bann pei ki pe donn nou mazorite nou bann viziter pou konmela. Mersi Mr Speaker.

MR SPEAKER

Mersi Minis. Onorab Aglae.

HON EGBERT AGLAE

Mersi Minis pour ou larepons. Minis, e ou'n fer resorti dan ou larepons *the issue of* konektivite. Par lefe ki nou'n war ki prensipalman nou annan bann *airlines* ki'n sispann flight pou vin Sesel.

Aeroflot i enn. Nou annan *Turkish*. Nou annan *Condor*. Nou annan osi *Air Austral* osi ki'n sispann bann tiket pour lemoman ziskan lot sezon.

Ki bann diskisyon petet tanzib pour nou kapab – ki'n ganny pe ganny fer mon kapab dir, avek ou departman ouswa lo nivo gouvènmantal, ou menm si fodre nivo bilateral, pou adres sa konsern konektivite e *flight* direk?

Akoz bokou kliyan li menm li i dir ou i ti a kontan annan *flight direct*, direk ki zot ti a kontan pour zot vin Sesel. Ki bann diskisyon petet tanzib

pour nou kapab adres sa sityasyon?

Dezyenmman ou'n nonm bann marse – bann marse ki potansyel. E i annan bann marse ki ti pe grosi, ki ti pe fleri dan en sans mon kapab dir. Par egzanzp Izrael ki ti en marse ki ti pe fer byen – ase byen.

Pour Sesel nou annan *issue* Larisi. E ou'n nonm en pti gin Lazi, akoz letan mon pe get statistik nou war poudir Lazi, menm si i annan potansyel, *is almost* zis 15poursan anviron ki pe vini par lannen.

Petet ki bann demars ladan pou *tap* dan sa marse Lazi, ki en marse ki vreman gran li menm li, pour nou kapab petet ganny bokou plis viziter ki sorti laba, ki a *compensate* en pe lo nivo Lerop ki parfwa i monte, parfwa i desann? Mersi.

MR SPEAKER

Mersi Onorab. Minis?

MINISTER SYLVESTRE RADEGONDE

Mersi Onorab pour ou kestyon. Mr Speaker, bann laliny aeryen ki bann *compagnie* ki sispann zot vol Sesel pandan en serten peryod lannen. E sa i sirtou pandan zot lete. I en zafer – i pa en nouvo fenomenn sa. I en fenomenn ki'n toultan la.

E ozordi gro *challenge* ki nou war – anfen, avan sa mon a dir ki tou *airline* ki pou vin Sesel ki fer okenn biznes, i bezwen asire ki i annan biznes. I bezwen kapab ranpli son avyon. Si pa 100poursan. En serten poursantaz. 60, 70poursan ki fer li benefisyab pou vini.

Benefisyab pa selman lo en semenn. Benefisyab si in met en vol par semenn pour tou sa bann semenn ki i mete. E se la gro *challenge*. Sesel i pa en *mass destination*.

Sesel i reste en destinasyon, *you know*, kot nou ete. E i pa fer ki i annan de santenn, de santenn dimoun ki pe voyaze tou le semenn pou vin Sesel. Vwala *challenge*.

Ozordi ki pe arive osi, se ki i annan en mankman lekipman avyon. En mankman avyon lo marse. Bann *manufacture* avyon pa pe prodwir osi avyon, kantite avyon ki bann pei bann *compagnie* aeryen ti a kontan gannyen.

Bon, ki fer ki tou konpanyen aeryen i get son biznes. E ordinerman ki zot fer zot tir avyon dan en destinasyon kot zot war pa pe fer tro, tro byen e met li dan bann destinasyon ki zot krwar pou fer en kantite larzan.

E sa nou vwar dan plizyer bann liny aeryen Eropen

sirtou. Kot *en Europe* pandan lete, zot kapab ganny bokou plis reveni e asire ki zot pou ranpli zot avyon. Vwala *challenge*.

Donk ki nou pe fer nou, mon sertenman depi ler mon'n la, mon'n ganny diskisyon direk avek plizyer *compagnie* aeryen. I annan pa lontan mon'n asiz avek *Air France*. Mon'n al mwan menm mon. Mon'n zwenn *senior* - bann *senior* zofisye *Air France* pour nou rode ki mannyer nou kapab enteres zot pou vin Sesel.

Mon'n asiz avek *Turkish Airline* pa lontan, pour nou regarde ki mannyer nou kapab enteres zot pou vin Sesel. Vin Sesel pa selman pandan en sezon. Met en bann vol regilye toulezour. Sa bann zafer arete pandan detrwa mwan, i kas koul.

E parey mon dir, mon refer le pwen ki mon'n fer. I toultan en zafer biznes. Tou dimoun i get son biznes e i demann mwan par egzanp, garanti li ki i pou kapab ranpli son avyon 60poursan. Non, mon pa pou kapab donn li sa garanti. Mon pa kapab donn personn garanti.

Lot opsyon se ki zot oule nou, nou pey - aste en serten kantite tiket lo avyon, menm si i vann, si pa vann. Be ou konpran nou bann kontrent ki

nou annan nou pa kapab fer sa. E donk, nou la kot nou ete.

Bon nouvel dan tou sa se ki i a rezwenn ou kestyon Onorab ki ou'n poze konsernan Lazi. Nou espere avan lafen lannen, i ava annan en vol direk sorti Lenn pou vin isi. Nou espere osi annan serten vol sorti Lasin pou vini. Ziska konmela napa garanti ki zot pou bann vol regilye lo en serten peryod letan. Mon preferans mwan se annan *flight* ki reste.

Me omwen i ava annan en zefor ki pe ganny fer pour nou kapab tir en pe sa bann kliyan ki Lazi, an atandan ki nou trouv en laranzman permanan.

Mon pa konnen si Direkter *General* avek ou permisyon Mr Speaker, i le azout lo la? Mersi.

MR SPEAKER

Wi, si *DG* i annan keksoz pou azoute.

DG DESTINATION MARKETING TOURISM DEPARTMENT BERNADETTE WILLEMIN

Bonzour Mr Speaker. Bonzour tou Onorab. Onorab, mersi pour ou kestyon. Zis mon azoute ki pou konplet en pti gin ki Minis in dir.

Sa lannen nou pou vwar ki nou pou annan nou 7poursan

plis logmantasyon kapasite aeryen. E sa i pou sirtou ver dernyen *quarter of the year*, ler nou pou war retour serten nou bann *compagnie* aeryen ki ou'n mansyonnen parey *Edelweiss, Condor, Turkish*. E osi *hopefully Aeroflot*.

E sa i ava donn nou zis pour sa peryod apepre en 20poursan plis kapasite, ki devret kapab ed nou sityasyon.

Konsernan *Air Austral*. Wi, *Air Austral* i pa pe *fly* direk Sesel. Me par kont i annan en Lakor Tarifer ant *Air Austral* avek *Air Seychelles*. Ki vedir ozordi *Air Austral* i pe komersyaliz destinasyon Sesel. Pa an direk. Me par kont via Moris konzwentman avek *Air Seychelles*. Mersi.

MR SPEAKER

Mersi *DG*. Nou a pran en pe kestyon lezot Manm. Onorab William, premye.

HON WAVEL WILLIAM

Mersi Mr Speaker. Bonzour tou dimoun ki a lekout. Mon le swet en *welcome* bann zabitan Beau Vallon ki dan *Gallery*.

Mr Speaker, mon ti a kontan demann Minis;

Avek bi pou tyek bann marse potansyel dan Departman Touris pou *tap* dan bann lezot marse touristik, mon

anvi demann Minis, par lefe osi ki i an relasyon avek sa kestyon, deor la parmi bann letablisman lotel, i annan en pti pe mirmirasyon poudir napa ase touris pe vin dan pei.

Baze lo sa bann problem ki ou'n donner Minis, apard ki *low and high season*, ki mesaz ou ti ava anvi pase avek bann letablisman touristik la deor? Akoz i annan serten petet pa okouran sa bann kalite problem ki annan.

E an menm tan Mr Speaker, si ou permet mwan. Si sa ti kapab ganny repete konmsi lo televizyon, akoz bokou dimoun parfwa pa konnen ki pe pase, e zot krwar poudir be sa se Gouvernman parfwa ki petet pa pe fer ase promosyon. Mersi.

MR SPEAKER

Bon, mersi Onorab. Minis, ou repons?

MINISTER SYLVESTRE RADEGONDE

Mersi Onorab pour ou kestyon. Onorab, tou dimoun ki dan sa Lendistri zot konnen i pa'n ariv 2020 sa.

Tou dimoun i konnen *seasonality* nou Lendistri Touris isi. Tou dimoun i konnen depi apartir *mois* Me, kantite dimoun ki antre Sesel i bese. I

tou-le-z-an koumsa. Lannen pase i ti koumsa.

Wi, i annandler i bese i bes ba. I annan i bes pa tro ba. Me i bese. E an prensip pour 3, 4 mwan pandan lannen, se sa sityasyon mannyer i ete.

Donk, mwan mon kapab repete. Wi, ler touris i annan en kantite, ou pa tann person. Person pa rezenbe. Person pa konplent.

De moman ki i bese i pa kapab ranpli son letablisman - e mon konpran *challenge* ler ou annan *loan* pou peye. Ou annan travayer pou peye. Ou pa war viziter i rantre. Wi, i en *challenge*. Me i koumsa i ete.

Nou destinasyon i koumsa. I sezonnyer. E nou, nou esey fer mannyer rode pandan sa *gap* ki i ba, ki bann aktivite nou fer pour nou kapab pandan sa letan, sey ratrap en pe bann viziter pou vin isi, pou *make up* en pe pour sa *manque à gagner*.

Donk sa travay nou kontinyen fer. Nou annan plizyer aktivite ki nou pe fer la lo *market*. E nou kontinyen. I en travay ki nou fer pa selman ek Gouvernman, parske Gouvernman pa lotel li.

Nou, nou promot destinasyon. Me nou travay osi avek bann partener pou gete ki bann *deal* nou kapab gannyen

pou atir viziter pou vin Sesel pandan sa bann letan. Mersi Mr Speaker.

MR SPEAKER

Mersi Minis. Mon averti bann Manm ki i mon lentansyon fini sa sesyon kestyon dan sa peryod la avan *break*. Nou pou *extend* li avan *break*. Mon pe kontinyen avek lezot Manm. Me selman mon pou pran lot kestyon avan nou pran *break*.

Kot mon'n – Onorab Cosgrow, ou kestyon silvouple?

HON WALLACE COSGROW

Mersi Mr Speaker. Bonzour Minis avek ou delegasyon. E bonzour tou bann envite dan Galeri anler.

Minis, destinasyon konsekan dan Losean Endyen Moris avek *Maldives*, zot in fini retourn lo sa ki nou apel *the pre-COVID level of tourism arrival* dan zot pei.

Savedir an 2023, 24 – 23 pardon, zot in – *its business as usual* dan en sans. Me nou Sesel par kont nou ankor pe *struggle* pour nou kapab tourn lo sa *pre-COVID level of tourism arrival*.

Eski Minis – e se sa pour rezon ki aköz Onorab Aglae mon krwar in anmenn sa kestyon. Aköz nou bezwen rod

bann fason ki mannyer nou retourn lo sa *level*.

So eski Minis i kapab dir nou; sa bann desizyon stratezi pou met bann *levy*, bann taks lo sirtou bann letablisman, pa pe kree en sityasyon ozordi kot Sesel pe vin en destinasyon ki; enn;- tro ser, e ki pa pe ganny latansyon viziter, sirtou Lerop ki pe vini?

Akoz sa bann desizyon i ganny fer la pour la. E dimoun i *plan* zot bann *holidays*. E bann lotel, bann letablisman zot *plan* zot bann program. So eski sa pa en lefe ozordi ki nou pe anmas sa bann problem dan Lendistri Touris e dan *arrival tourism*? Mersi.

MR SPEAKER

Mersi Onorab. Minis?

MINISTER SYLVESTRE RADEGONDE

Mersi Onorab. Mr Speaker, parey mon dir, sa peryod, sa sezon ki nou ladan i toultan sezon ba. Lannen pase nou'n avek mwens viziter ki nou ti gannyen.

Si nou pran 2019 konman sa lannen referans ki tou dimoun i al lo la, nou'n ganny mwens viziter ki 2019. Me an term reveni, nou'n fer bokou plis. Bokou plis ki 2019 ki ti en lannen rikord.

So si ou koz lo ariv *pre-COVID level*, mwan mon get reveni ki rantre dan pei. E lo nivo reveni, nou'n *achieve* e nou'n *surpass*. Sa i en fe.

Eski i annan *challenge* touzour dan sa lendistri? Byensir. Mon pa pou koz – konmsi mon pa pou fer ou krwar naryen ki ou pa konnen. Anbet dimoun konmsi ki tou keksoz i parfe dan nou pei. Non!

I annan en kantite keksoz ki nou bezwen adrese. Sesel i reste en destinasyon ser. Nou bezwen regarde ki mannyer nou pou kapab adres sa zafer pri Sesel.

Me plis ki ser se valer pour larzan, ki Sesel nou pa ankor kapab *achieve*. E toulezour ler mon gete ou a krwar nou al pli lwen avek sa. E mwan ler mon koz avek bann viziter, e mon koz en kantite ek viziter. Mon vizit en kantite lotel. Mon ganny sans zwenn touris koz avek. Zot problem se pa neserman – pa dir pri pa en problem. Pa neserman pri. Se ki zot gannyan pour sa pri ki zot peye. Sa gro *challenge* e nou bezwen kontinyen travay lo la pour nou adrese. Mon pa konnen Direkter *General* si ou annan naryen pou ou azoute, avek ou permisyon Mr Speaker.

MR SPEAKER

Wi Direkter *General*, si ou kapab azoute. Annou fer li direk bref akoz mon annan lezot kestyon.

DG DESTINATION MARKETING TOURISM DEPARTMENT BERNADETTE WILLEMIN

Mersi Mr Speaker, mon a fer li bref. Zis rapidman - mersi Onorab pour ou kestyon, konsernan en pti pe *Maldiv* avek ek Moris.

Petet enn de bann faktor osi ki zwe en gran rol dan zot performans se transpor ki nou'n koz avek – ki nou'n mansyonnen avan. E sirtou ki zot annan sa lavantaz ki zot annan bokou transpor direk.

Transpor direk ki deservi bann *major source market* kot nou konnen ki i annan bokou plis *volume*. Sa i donn zot en konpetitivite par rapor a nou vol direk. E dezyenm keksoz osi se zot *inventory*. Zot annan zot ankor bokou stok an term lasanm, lotel e *bed stocks*.

E kontrerman a nou kot lamazorite nou leverter i dan bann pti, pti letablisman. Pour zot nou pe koz lo tou bann lotel *proper*, si nou kapab met li koumsa. Ki vedit ki i pli fasil pou ganny komersyalize par bann *partners*. Sa i enn de bann faktor osi ki enflyans. E

transpor direk i *definitely* zwe en gran rol. Mersi.

MR SPEAKER

Mersi DG. Onorab Henrie, ou kestyon?

HON GERVAIS HENRIE

Mersi Mr Speaker. Bonzour tou dimoun. *Welcome panel*. Mr Speaker, kestyon orizinal i pe rode lekel bann marse potansyel. Marse potansyel ki Minister Tourizm pe mazin *tap* ladan pou anmenn plis touris Sesel.

Now, mon anvi konnen ki target Minister pour Lafrik koman en *potential market*. Nou'n vwar ki an 2023 ti annan 26 mil 602 touris sorti lo Kontinan Lafrik ki ti ariv Sesel. E sa ti en logmantasyon 13poursan par lao sif 2022.

Now, Lafrik nou annan 3 avyon direk. *Air Seychelles* i al Sidafrik. *Nairobi, Kenya Airways* avek *Adiss, Ethiopian*. E ladan nou annan 2 *hub - Nairobi* avek *Addis*. So ki stratezi ki nou kapab ganny en pe plis ki 26 mil touris Afriken dan bann lannen ki pe vini? Sa i mon premye kestyon.

Dezyenm kestyon i ava anliny avek sa. Akoz menm ler i annan Afriken ki annan larzan bokou plis ki bokou Seselwa. Solman ou kapab annan en

marse kekfwa ki zot, zot lentere pou plito al dan bann pti *guesthouse* ki Minis ou'n *champion* depi lontan "*Seychelles Secret*". E la i annan en nouvo lasosyasyon.

So ki kalite travay nou kapab fer avek sa lasosyasyon ki nou ganny sa kalite kliyantel ki – e ladan mon war Sesel pou benefisye plis?

Akoz zot pour bann Seselwa e larzan pou reste isi e reveni pou ogmante. So ki travay nou kapab fer avek sa lasosyasyon dan sa stratezi pou atir plis touris? Mersi.

MR SPEAKER

Mersi Onorab. Minis?

MINISTER SYLVESTRE RADEGONDE

Mersi Onorab. Mersi pour kestyon Mr Speaker. Lo sa premye kestyon, mon a pas avek Direkter Zeneral aköz in ganny son *task* pour sa lannen. Son *target* ki i bezwen *achieve* lo marse Lafrik ki *easily said than done*. Me i ava eksplik sa dan en pti moman.

Konsernan touris ki al dan bann pti letablisman. Wi, nou donn en kantite lanfaz, en kantite nou *focus* i travay avek sa bann pti letablisman, pou zot kapab pa selman atir viziter. Me osi regarde kwa an plis ki zot

kapab donnen pou *maximize* reveni ki zot gannnen avek sak viziter ki antre.

Mwan sa lot sityasyon in ganny mon *full backing*. *Au fait*, i linisyativ sorti kot nou *tourism* pou zot zwenn ansanm dan sa lasosyasyon. E mon kontan ki in formen.

Ou konnen, tou le Vandredi ler mon la, mon fer letour bann letablisman ankore. E sa wikenn mon'n Praslin pou - enn dan bann keksoz ki mon war se ki tro souvan, bann pti letablisman pe *focus* lo zis vann lasanm. En kantite *self catering*. Ozordi, en kantite nou *bed stock* i and *self catering*.

Ankouraz sa bann pti operater pou sorti dan sa *mindset*. Regarde posibilite si par egzanp ou fer en sistenm *bed/breakfast, if it's only for bed and breakfast*. I en reveni ki ou gannnen dan *breakfast*. E *once in a while* si ou kapab ofer petet en *meal*. Dinen *usually*. Regarde bann posibilite ganny larzan.

Laundry. *Ok*, en kantite zot avek *setup* mannyer i ete, zot met en masin lave dan lasanm. *Ok*, i fasilite lave. Mon dir be, eski zot in mazin sa opsyon donn en *laundry service*? I reveni ki zot pe gannnen.

E souvan sirtou dan bann mwan ki ba, zot annan bann travayer ki la pe anploye ki napa naryen pou fer. So sa enn de viziter ki antre, bann travayer, bann anplwaye ki la i kapab lave, drese, ganny en reveni. Fasilit lavi bann viziter.

So, sa bann travay nou pe kontin pour nou ankouraz bann pti operater sanz en pe *mindset*. Al vreman dan *focus business*. *Maximize* reveni ki zot kapab gannnen.

Lo *marketing* pour Lafrik Mr Speaker, avek ou permisyon mon ava pas laparol avek Direkter *General*.

MR SPEAKER

Mersi. Wi, DG ou annan laparol.

DG DESTINATION MARKETING TOURISM DEPARTMENT BERNADETTE WILLEMIN

Mersi Mr Speaker. Mersi Minis. Onorab, mersi pour ou kestyon. Pour Lafrik nou target i 5poursan. Me petet ti ava enportan ki mon fer resorti ki nou *l'objectif* prensipal se pou minimiz nou risk an zeneral kot i konsern nou biznes.

Parey nou tou nou konnen, nou koz bokou lo redwir nou depandans lo Lerop. E nou, nou target sete pou anmenn 30poursan biznes an

deor Lerop. Donk ki vedir la i enkli en parti biznes sorti Lafrik.

E Lafrik parey nou konnen i enn bann Kontinan kot nou annan lasans ki nou annan 2 *compagnie* Afriken ki servis ant zot *hub* e nou pei direkteman - *Kenya Airways* avek Letyopi.

Donk nou annan serten *marché* prensipal ki nou pe sible lo Lafrik. *Bearing in mind* ki nou annan transpor. Setadir ler i konsern Letyopi, nou pe regard *tap into of course the expat community, the UN Personnel*. Sa en pti pe. E menm senaryo pour an sa ki konsern *Eastern Africa* sirtou kot i konsern *Kenya*. *L'objectif* se 5poursan logmantasyon biznes sorti lo Lafrik ki pou konplet sa 30poursan ki nou pe rode an deor Lerop.

MR SPEAKER

Mersi DG. Onorab Pillay ou kestyon?

HON SEBASTIEN PILLAY

Mersi Mr Speaker. Bonzour Minis avek ou delegasyon. *Minister*, dan ou larepons ou'n koz lo sa sityasyon ki sa bann pei i ganny servi avek bann transpor. Zot ganny plis vol, plis avyon, plis sa.

Sa ki nou konpran la Sesel resaman la nou marse, enn

bann marse ki nou ti pe *rely* lo la. *Russia*. Nou konpran poudir *Aeroflot* pa pe vini, *given* bann serten laranzman domestik. E sa i annan en lenpak.

Nou konpran osi poudir *Condor* si mon pa tronpe osi in aret vini. So i redwir lakantite bann avyon ki pe vini. E la nou konpran *Emirates* pe fer "*fifth freedom*" avek *Madagascar*.

Problenm ki mon ti a kontan - kestyon mon ti a kontan demann ou pou klarifye premyerman se; be aköz alors sa bann avyon - ou pa'n adres sa kestyon.

Akoz zot pe al *Maldives*? Aköz zot pe al Moris e zot pa pe vin Sesel? Kwa ki fer ki zot pe al laba? Eski nou tro ser? Eski nou'n *price* nou lekor *out of the market*? Eski i annan tro bokou taks?

Mon dezyenm pwen Mr Speaker. Mon'n resevwar en mesaz en dimoun in anvoy mwan *regarding* en apartman Moris. I apel *Coral Apartments in Mauritius*.

En *studio with kitchen* i 50 *Euro* par nwit pour 2 dimoun. En *studio without kitchen* i 45 *Euro* par nwit pour 2 dimoun. En *two-bedroom apartment* i 85 *Euro* pour 4 dimoun. So *obviously!*

So kwa ki pe arive e ki ou pe fer pou redwir serten bann

pri ki bann kliyan pe gannyen, pour ki sa i fer nou pli atraktif? Akoz ler mon'n ekout ou i pa paret zot annan en solisyon apard ki ekspekte ki *something will come from the sky* e fer keksoz fasil pour nou. Mersi Mr Speaker.

MR SPEAKER

Mersi. Minis, ou repons?

MINISTER SYLVESTRE RADEGONDE

Mr Speaker, mersi. Konsernan bann vol ki al Moris, mon krwar Direkter *General* in dir. Moris ek *Maldiv* zot reste destinasyon *de masse*.

En avyon ki al Moris, en *compagnie* ki deside al Moris, *Maldiv* zot pou toultan – ou preski toultan annan dimoun pou ranpli dan zot avyon. Vwala rezon. Parti bann rezon.

Ou koz lo *Condor*. *Condor* i ti toultan en *compagnie* ki fer sezon. *Condor*, *Aeroflot* – pardon, *Edelweiss* i bann avyon ki pandan *summer* Lerop, zot arete. In toultan koumsa. I pa fek arive.

Ki mannyer nou pe fer pour nou atir zot? Nou ti a kontan omwen en vol sorti Lerop. En vol direk sorti Lerop servi Sesel. Me sa i annan tou bann, parey mon dir, parey mon'n reponn kestyon pli

boner, i annan bann enplikasyon. E ki nou, nou pa kapab *meet* pou konmela, donn zot garanti ouswa kontribye finansyelman. Nou pa kapab.

Enn osi dan bann bon nouvel se ki nou bann diskisyon avek *Turkish Airline*, se ki ler zot konmanse an Septanm zot a met toudswit 4 vol lo sa laliny. E apre en semenn apre, met 5.

E plan ki nou pe travay lo la se ki disi 1 an nou a kapab ganny en vol regilye kot *Turkish Airline* i ava nepli sezonnyer. Nou pe eseye.

Lo pri akomodasyon. Wi, dan serten kategori akomodasyon Moris ou ayer, pri pou pli ba pour Sesel. Mon pa konn sa letablisman ki ou'n nonmen. Mon pa kapab mezir son standar.

Me sa bann pri ki ou pe dir i annan osi akomodasyon, bann pti akomodasyon Sesel ki ofer sa *range*. Petet dimoun pa konnen.

Be nou, ki nou fer? Nou promot destinasyon. Nou pa promo- – *although* nou travay avek tou bann letablisman, nou pa fer promosyon en letablisman ou en lot.

Sa ki nou fer nou donn zot *exposure* lo nou *website*. Nou met bann letablisman. Sa ki nou ankouraz zot osi pou fer - e

sa gro *challenge* tou letablistman Sesel. Nou ankouraz zot pandan letan ki sezon i ba pou zwe avek zot pri.

Ler ou gete ou pa pe ganny biznes, gete si ou pa kapab abes ou pri. Zwe ek pri sa i en keksoz ki pa bokou nou bann letablistman i fer. E sa mon war toulezour.

I annan dimoun ki *agile* lo zot lipye. Zot gete ou pe vann en lasanm 100 *Euro*. Ou gete ou pa pe ganny kliyan. I bezwen annan en rezon, petet ou pri. Desann fer 80. Desann annandler i ale 70, 75. E zot kapab ganny en kliyan.

Mon'n fek koz avek en madanm yer, avantyer. Se sa ki i pe fer. *Adjust* zot pri dapre sezon. *It is not happening*.

So pour ou kestyon Onorab, Minister Touris mwan mon pa kapab al dikte pri ki bann letablistman i fer. Mon dir zot konsyan. Zot ki dan biznes. Zot ki pe *run business*. Konsyan mannyer klima i ete deor e *adjust accordingly*. Mersi.

MR SPEAKER

Mersi. Onorab Pillay, mon le pran ankor 2 kestyon. Permet mwan kontinyen silvouple. Mersi. Onorab Gill, ou kestyon?

HON CHURCHILL GILL

Mersi Mr Speaker. Bonzour Mr Speaker. Bonzour Minis ek ou delegasyon. Bonzour bann dimoun Beau Vallon ek tou dimoun ki pe ekout nou, enkli Manm Lasanble.

Minis lo kestyon Onorab Aglae, mon krwar in fer en pwen tre serye. Petet nou pa'n sezi li byen. Nou'n plito al dan bann direksyon kot nou pe koz lo sa ki nou annan. Ki mannyer nou pou fer pou fer zot depans plis.

Me selman kestyon li i pe demande, i pe get en pe lo fitir tou. Kwa ki nou pe fer oubyen ki landrwa ki nou pe sey *tap* pour nou kapab ganny en pe plis touris?

Ou ou'n donn nou en leksplikasyon ki konektivite i en problemn. Me selman konektivite li i vin apre.

MR SPEAKER

Wi Onorab, pa tro pran largiman. Al lo ou kestyon.

HON CHURCHILL GILL

Wi mon pe al demann – mon bezwen fer li konpran ki mon pe dir li. Mon pa kapab zis demann li kestyon apre...

MR SPEAKER

Al lo ou kestyon silvouple.

HON CHURCHILL GILL

Konmsi kestyon se; nou, nou pa fer *mass tourism*. Nou konnen. Be prezan dan sa kategori ki nou, nou fer, kwa ki nou pe fer pour nou kapab grosi lakantite touris ki vin isi? Apre son retonbe i ava tonm dan diferan landrwa. Gran, pti, pti.

Me selman konman en Minister, vi ki i annan en Bidze ki donnen, kwa ki egzakteman pe ganny fer ki nou fitir devan nou, nou kapab war pou annan en pe plis touris ki nou pe war ozordi? Mersi.

MR SPEAKER

Mersi. Minis?

MINISTER SYLVESTRE RADEGONDE

Mersi Onorab pour ou kestyon. Mr Speaker, mon'n konpran tre byen kestyon – mon asir ou kestyon Onorab Aglae mon'n konpran tre byen. E mon'n reponn.

Mon'n dir ki nou'n arete *focus*. Nou pa kapab *focus* zis lo Lerop. Nou pe get lezot landrwa pour nou kapab fer. E mon kapab donn ou en lalis pei. E sa Direkter *General* i a pli kapab fer. Lalis lezot pei, lezot rezyon ki nou pe targete pou anmenn touris.

Me Onorab ou konnen, parske ou'n dan sa lendistri osi. Nou'n pas en pe letan ansanm

Praslin *Beach way back*. Ou pou ale - dizon si mon pran en pei parey, dizon mon pran Lostrali, *ok*?

Ou ale ou bat tanbour, met Lostrali lo bon. Ou dir zot Sesel i en bon destinasyon. I en zoli destinasyon. Wi, kapab vini. Ki mannyer ou tir sa Ostralyen kot i ete, pou anmenn li Sesel? Se sa mon pe dir problemm konektivite i *challenge*. I reste en *challenge*. Nou pa les li anmar nou.

Nou regarde la kot nou pa kapab annan nou laliny aeryen parey mon dir. Regarde lezot posibilite avek lezot laliny aeryen ki nou kapab travay avek. Parske *ultimately* sa 2 soz i lye. I lye. Ou pou rod kliyantel, ou bezwen rod en fason anmenn sa kliyantel isi.

Pour en legzanp mon a dir ou, par egzanp lo Lazi pour konmela, nou pe travay en kantite avek *Ethiopian Airline*. I pa direk. I en detour pou arive, me nou pa kapab zis asize krwaz lebra nou dir napa konektivite, nou reste lanmenm.

Nou pe fer. Onorab en kantite aktivite nou pe fer deor. Mon pa konnen *DG* si ou le, briyevman Mr Speaker, pas lo bann aktivite. Mersi.

MR SPEAKER

Wi, DG. Ou a briyevman...

DG DESTINATION
MARKETING TOURISM
DEPARTMENT BERNADETTE
WILLEMIN

Mersi Mr Speaker. Mersi Minis. Mersi Onorab pour ou keston. Konsernan bann *market* rapidman, byensir nou pe *target* GCC. Nou tou nou konnen poudir *UAE* i sa landrwa kot nou ganny nou pli gro poursantaz. Me selman nou pe entansifye nou zefor lo bann lezot pei parey *Saudi, Kuwait*, zis pou mansyonn 2.

Lo Kontinan Lafrik nou konnen poudir *lion's share* i sorti *South Africa* avek en pe *business from the southern part of Africa*. Me selman parey mon ti dir avan, nou – i enportan ki nou osi *tapped into* par egzanp *Eastern Africa* avek Letyopi kot nou annan *flight*.

Me nou tou nou konnen poudir *Nigeria* i en *marché* osi ki *lucrative*. Me nou konnen osi serten difikilte ki nou'n fer fas avek dan lefase. Me ler nou pe koz grosi nou *business from* Lafrik, i enportan ki kolektivman - pa zis tourizm - me kolektivman konman en pei, nou tou nou konsyan si nou vremen nou le *business from* Lafrik.

E sa i eksplik en pti pe serten *challenges* e ki parfwa ki nou annan pou resevwar bann Afriken dan plizyer nivo ler zot vin Sesel.

Lo kote Lazi, Lenn, *La Chine* definitivman. Me nou osi annan bann pei parey Kazakstan. Nou annan *Japan* ki osi ganny deservi, i annan en bon konektivite atraver *Ethiopian Airlines*. Sa i enn de bann pei osi kot nou pe targete.

I vre ki parey nou'n dir, nou pa le met tou nou dizef dan menm pannyen. Nou pa le depan antyerman lo Lerop. Nou *lion's share* i sorti *Western Europe*. Me i annan osi ankor en gro potansyel dan *Eastern Europe* par egzanp. Ler ou pe get bann pei parey *Poland, Czech Republic, Hungary*. Sa i bann pei osi kot nou pe entansifye nou zefor.

Me ler nou pe dir entansifye nou zefor, nou osi regard osi en pti gin segmantasyon *market*. Regard en pti pe bann segman ki pli propis pour serten sezon dan lannen.

Ler nou pe koz bezwen, byensir nou met nou zefor pou esey atir en pti pe plis sa ki nou apel bann *MICE business*. Bann *Meeting, Incentive, Congress and Incentives* pandan sa peryod. An menm moman osi

tap en pti pe dan bann *honeymoon market* parske nou konnen poudir bann peryod osi ki zot-

Donk diversifye osi en pe nou bann segman. Byensir nou bann *senior citizens*, be selman parey – zot kapab *travel* nenport ki letan. Me malerezman parfwa lo nou marse sours, nou konnen poudir la nou annan difikilte *direct flight*.

An sa ki konsern nou plan *marketing*, byensir nou annan nou nou *marketing mix* parey nou dir. Nou annan bann aktivite tradisyannel. Nou konnen poudir nou dan en *people's business*. Nou pa pou kapab zis les robotik avek *machine* ranplas nou, parske nou pa ankor ariv sa nivo. Donk nou annan serten aktivite tradisyannel.

Me an menm tan an paralel nou konnen poudir digitalizasyon i enportan. So nou annan osi nouvo *lay digital marketing*. A la fwa kot nou pe target byensir profesyonnel, parske nou annan ankor en kantite nou biznes ki vin atraver rezo distribisyon. Setadir ganny vann par bann profesyonnel. So nou annan bann aktivite kot nou *target* zot.

Me i enportan osi ki nou kapab adres nou *cible*. Setadir sa potansyel kliyantel direk. Se

la kot nou annan nou bann aktivite ki nou target bann gran piblik.

Donk, mon krwar poudir serten petet dan zot in deza petet vwar en pti pe kot nou'n pran laparol lo serten gran *media houses*. Ou si non bann gran *chaînes internationales réputé*. E nou aktivite i varye depandan byensir bann pei kot nou pe travay. Mersi Onorab.

MR SPEAKER

Mersi. Mersi DG. Bon, se tou letan ki mon kapab donner pour sa kestyon. Nou ava avans lo prosen kestyon, 150 Onorab Richard Labrosse.

HON RICHARD LABROSSE

Mersi Mr Speaker. Ankor enn fwa bonzour tou dimoun ki a lekout. Mr Speaker, kestyon 150 i al konm swivan;

Eski Minister pour Zafer Etranzer i kapab enform Lasanble ki bann *training* ki son Minister i ofer son bann travayer, swa lokal oubyen enternasyonal pour zot kapab kontinyen desarz en bon servis? Mersi.

MR SPEAKER

Mersi. Minis, ou repons?

MINISTER SYLVESTRE RADEGONDE

Mersi Onorab pour ou kestyon. Mr Speaker, mon a fer en pti lentrodiksyon, apre avek ou permisyon mon a pas laparol avek *PS Foreign Affairs* pou donn plis detay an sa ki konsern kot *Foreign Affairs* e Direkter *General* si non, pour sa ki konsern Departman Tourizm avek *STA*.

Konman lentrodiksyon Mr Speaker, pour mwan dir ki *training* i tre enportan pour nou. I devret tre enportan pour tou dimoun. Mon krwar *it is*. Me partikilyerman pour *Foreign Affairs* avek *tourism*. *Foreign Affairs* an partikilye, nou bezwen kontinyen fer bann *training* pour nou ekip nou bann-

Prensipalman nou annan en lekip ki zenn, avek bann *skills* pour zot kapab avanse dan zot karyer. E sa i konmans depi premye zour ki zot rantre dan travay. Bann *training* ki nou donnen i *on the job training*, kot zot avek en dimoun pli sinyor avek zot pou tenir zot lanmen.

Nou ofer bann kors *online*. Nou ofer bann kors lokal Liniversite Sesel *Guy Morel Institute*. Nou ofer bann kors aletranze dapre *availability funding* pour bann kors ki nou gannyen.

E apre kot *Foreign Affairs* mon a sak fwa ki mon deplase dan *la mesure du possible*, dan bann mon delegasyon, delegasyon Prezidan, nou pran toultan en zenn zofisye nou anmenn avek nou.

Parske sa osi i en *training* ki ou pa pou kapab donnen dan en laklas. Napa personn pou kapab eksplike. Ler ou pran en zenn ou anmenn li dan en negosyasyon ki ou pe gannyen, e zot war mannyer i *operate*.

Foreign Affairs osi nou fer bann *training* lo *letter writing* ki tre enportan. En *skill* ki dan diplomasi i inik dan plizyer sans. Dan *speech writing*. Dan *note writing*. *Report writing*. So tousala i sa *panoply training* ki nou donnen. I en prosis kontinyen.

Mon menm mwan mon'n benefisye sa bann *training* depi mon zenn letan. E petet sa in kontribye osi dan en fason pou fer mwan grandi e ozordi anmenn mwan osi la kot mon ete. E mon ankouraze.

E mon kontan ki mon *senior management* dan tou lede departman i swiv mwan ladan. Nou tou nou konsyan nesosite pou ekip nou bann dimoun, fer zot vin *the best possible* pou kapab desarz travay ki nou annan.

Mr Speaker, avek ou permisyon, PS petet i ava briyevman dir bann diferan *training* ki nou donnen. Mon'n dir – anfen, mon'n refer lo la e apre DG...

MR SPEAKER

Mersi. PS?

PS FOREIGN AFFAIRS DEPARTMENT AMBASSADOR VIVIANNE FOCK TAVE

Bonzour Mr Speaker. Bonzour Onorab. Konmela an se moman nou annan nou apepre – nou annan nou 7 staf ki pe fer zot *masters*.

An se moman depi 2021 ziska premye *quarter* 2024 nou annan nou 7 staf *Foreign Affairs* ki pe fer zot *master's degree* swa ki relye ek *diplomacy* oubyen dan *International Law*.

Nou annan nou 6 staf ki'n fini konplet zot *master's degree* dan sa bann size ki mon'n dir. E nou annan nou 1 staf ki pe fer en *bachelor*. *Normally Foreign Affairs* nou pran staf ki deza annan en premye degre. Be selman i annan staf kot Protokol ki ti napa. E la i annan en staf ki pe fer kot *UNISEY*, son *bachelor*.

E osi nou'n annan nou depi 2021 ziska *first quarter* 2024, nou annan nou 21 *senior officials*, parey nou dir bann

desk officers ki'n al *attend* bann *overseas training*. Bann *short courses*, swa pour en semenn, de semenn oubyen en mwan.

E sa bann *course* nou gannyen avek nou bann partener. I osi enkli bann sa ki nou apel bann *workshop*, bann *familiarisation visit* kot bann *senior officials* i ale. Zot aprann en pe plis lo sa pei e osi zot *foreign policy* sa pei.

Pour *local training* an se moman nou annan nou 6 staf ki pe fer *local training*. Sa i plito bann *support* staf kot *Guy Morel Institute*. Nou annan osi bann *chauffeurs* osi ki fer *training*, par egzanp dan *self-defence* akoz zot *drive* bann *VIP*.

E sa ki Minis osi in tous lo la, i annan bann *in-house training* ki nou fer ki enn nou bann ansyen Anbasader ki'n *retire* ki eksperyanse, i vini i fer *training* dan *speech writing*, *negotiation skills*, *letter writing*.

E osi i fer en pe *training* lo bann parey nou dir, *geopolitics* e ki lenplikasyon sa bann *geopolitics*. Ki lenpak i kapab annan pour Sesel. E sa nou kontinyelman fer.

E tou nouvo staf ki antre ki nou *recruit* bann *sinyor officials*, bann *desk officers* zot bezwen fer sa *training speech writing*, *letter writing* avek

negotiation skills. Mersi Mr Speaker.

MR SPEAKER

Mersi. Mersi PS. Onorab Labonte, ou siplemanter.

MINISTER SYLVESTRE RADEGONDE

Mr Speaker, eski nou kapab briyevman pas lo *tourism* si i enteres *MNA*?

MR SPEAKER

Minis, mon remarke kestyon i pour Minis pour Zafer Etranzer. Mon pa obzekte ki ou pran, me selman mon annan pti gin letan. Si *DG* i kapab fer li vit silvouple, ou kapab mansyonn *tourism*.

DG JENIFER SINON

Mersi Mr Speaker. Bonzour tou bann Onorab. Briyevman. Bann posibilite ki Departman Tourizm i ofer a tou son bann travayer i en pe lo menm laliny parey Zafer Etranzer. Kekfwa zis pour mwan donn en pe sif.

Nou osi donn travayer bann posibilite pou swiv bann kour akademik. E an se moman la nou annan 2 nou travayer ki pe swiv zot *masters*. Lo kote *STA* i annan enn lo nivo *masters*. Lo kote departman lo kote degre, i annan 2 staf ki pe swiv. E lo kote *STA* i annan 2 ki

pe swiv an se moman. E lannen pase i annan 4 ki ti terminen.

Nou osi ofer bann kour a kourt dire. E sa nou *partner* en bon pe avek *TGMI*. Sa lannen boner konman lannen in konmanse, i annan 6 nou staf ki'n swiv *supervisory skills*. I annan *First Aid* ki'n konmanse e ki *ongoing* tou dilon lannen. E menm kour osi ki *STA* bann staf osi pe swiv. I tous *PMS*, i tous *leadership*, ki mannyer pou devlop zot bann *soft skills*. *Report writing* osi i enn topik ki nou'n fer.

Nou osi annan *on the job training* ki'n touse oparavan. E sa kot nou staf i aprann atraver leksperyans pratikman pe desarz sa bann responsabilite. E atraver zot bann koleg ki pli sinyor oubyen pli eksperyanse ki zot; *coaching*, *mentoring* i 2 lapros ki nou pran.

Lo kote *STA* osi, lannen pase zot in konmans en legzersis kot 1 semenn dan lannen, bann *lecturers* in *actually* al dan lendistri pou zot kit zot lekor azour avek bann nouvo devlopman, nouvo *patterns* ek *trends* ki pe devlope dan zot diferan sekter spesifik. Sa i en pti pe Mr Speaker ek bann Onorab.

MR SPEAKER

Mersi DG. Onorab Labonte, ou siplemanter prezan?

HON RICHARD LABROSSE

Labrosse Mr Speaker. *Ok*, mersi Minis, *PS* pour lenformasyon ki ou'n donn nou. Minis, mon ti annan 2 kestyon siplemanter pour mwan demann ou.

E madanm kot touris osi mon byen apresye lenformasyon ki ou'n donner, akoz mon ti pe mazin anmenn en kestyon dan sa laliny. Me la ou'n fini reponn.

Minis, mon 2 kestyon siplemanter pour *Foreign Affairs* ki mon'n ekout ou atantivman ek *PS*;

Premyerman mon ti a kontan konnen ler bann staf i antre kot *Foreign Affairs* ozordi, eski zot ganny lentrodiksyon ouswa zot ganny mete lo en kart ki pou fer zot konnen apepre...?

Par egzantp si mon'n antre ozordi konman en drayver, ki ankor dan 5 an si mon pe *perform* byen, mon kapab monte ozordi pou vin en sinyor drayver oubyen en lot pos pli avanse ki sa?

Mon dezyenm kestyon ki mon ti a kontan demann ou Minis ler mon'n ekout ou, mon ti a kontan konnen si ozordi zot osi annan en kad *training plan* parey nou dir, kot bann

travayer laba i kapab konmans met zot pare ozordi?

Si par egzantp i annan ki pe revy ozordi pou vin en diplomate, en Anbasader, zot konnen lo ki laliny zot pou antre lo la pour zot kapab ariv zot destinasyon. Mersi Mr Speaker.

MR SPEAKER

Mersi Onorab. Minis?

MINISTER SYLVESTRE RADEGONDE

Mersi Onorab. Wi. Wi pour tou le de ou kestyon. Sak staf ki antre en diskisyon in ganny donner. E sa ki ganny fer kler avek zot – e mwan mon zwenn tou dimoun. Tou sa bann nouvo staf ki antre, *regardless* zot pozisyon.

E mon redir sa ki zot deza ganny dir, se ki *Foreign Affairs* – la mon pe koz *Foreign Affairs*. Ou kestyon i *Foreign Affairs*. Ou pa neserman ganny - al dan en lakaz, ou ganny met dan en kwen ouswa dan en kategori partikilye, e ou reste la.

Mon ankouraz tou dimoun regard tou posibilite ki annan.

Byensir pour sak pos i annan bann *entry requirements*. I annan serten nou bann pos, sirtou dan diplomasi, nou demande ki ou annan omwen ou annan en premye degree. Me

sa ki enportan se ki nou donn sa posibilite tou dimoun ki rantr pou zot devlope.

Nou travay avek zot lo en *career development plan*. Travay avek zot pour en *training plan* osi, pou ed zot *achieve* zot lobzektif ki zot oule. I annan i fer li tre byen. *You know*, mwan mon en prodwi sa. Ler mon ti rantr *Foreign Affairs many, many years ago*, mon ti antre konman en zofisy Protokol. Me mon'n ganny posibilite devlope, bouze e evantyelman mon'n ariv konman Anbasader.

E i annan plizyer osi ka ozordi kot en dimoun, en zofisy ki'n antre dan en partikilye dyob, en pos partikilye i ganny sa posibilite avanse, devlope. So sa i en Polisi nou Minister e i pou kontinyen reste. Mersi.

MR SPEAKER

Mersi. Mon a pran kestyon Onorab Monthy.

HON PHILIP MONTHY

Mersi Mr Speaker. Bonzour Minis ek ou delegasyon. Bonzour bann envite sorti distrik Beau Vallon.

Mr Speaker *PS* in tous en pe mon kestyon dan son bann dernyen lenformasyon ki'n donner lo *geopolitics*. Mon ti pe demande si i annan en

formasyon dan *geopolitics* kot *Foreign Affairs*? Akoz mon ti'n aprann ki lontan ti annan. Apre petet kekfwa ti'n aret en pe.

So, ou'n dir mwan i annan. Ki lenportans zot atase avek sa, pour ki bann zenn diplomat i ganny formen dan *geopolitics* ler i antre dan zot Minister kot zot? Mersi.

MR SPEAKER

Mersi. Minis?

MINISTER SYLVESTRE RADEGONDE

Mersi Onorab pour ou kestyon. Mr Speaker, sa i – anfen, i *cornerstone backbone* travay ki bann diplomat i fer. E nou bezwen *even* konman en pti pei, regard tou sityasyon ki arive pou regarde bann pozisyon – diferan pozisyon ki Sesel i pran dan bann diferan size.

Nou bann vot dan Nasyon-z-Ini ou aryer, i baze lo zisteman sa bann konsiderasyon ki ou bezwen gannyen. E *critical thinking*. Konnen kote lentere Sesel i ete. E pa zis lentere Sesel. Annandler nou bezwen al regard dan larezyon.

Annandler en keksoz i kapab kritik pour nou, be nou bezwen gete si nou, nou pran en pozisyon, ki reperkisyon lo larezyon ouswa ki reperkisyon

lo lasenn enternasyonal. E se sa annandler lo serten *issue* nou *come out strongly*. E serten lezot, nou fer en diplomasi en pti pe trankil. Me diplomasi, *nevertheless*.

So pou asir Onorab ki sa bann *training* i kontinyen, nou kontinyen fer li. E enn dan bann keksoz ki nou azout avek sa – e parey mon'n dir avan; nou pran sa bann zenn zofisye, bann zenn diplomat. Nou anmenn zot. Zot akonpany bann delegasyon ki al deor, pou vwar par egzanp dan negosyasyon, ki mannyer nou negosyasyon i ganny fer. E sa i en leksperyans ki okenn *training* pa pou kapab ranplase. Mersi.

MR SPEAKER

Mersi. Mon a pran kestyon Onorab Gabriel?

HON CONRAD GABRIEL

Mersi Mr Speaker. Mon a dir bonzour tou dimoun dan Galeri, bann zabitan Beau Vallon. Mon a dir *welcome* Minis ek ou delegasyon.

Minis, i annan en kantite konplent la deor, sirtou parmi travayer Seselwa lo lafason ki zot pe ganny trete. E i paret ki bann etranze pe manipil Seselwa.

MR SPEAKER

Onorab. Onorab. Onorab! Kestyon i lo *training*. Silvouple, ou pe met konplent staf, i pa plas pour li. Si ou annan en kestyon lo *training*, demande. Si non, mon pe pas ou silvouple.

HON CONRAD GABRIEL

Mr Speaker, kestyon i dir kontinyen desarz en bon servis. So, mon bezwen met an konteks ki mon zabitan i vin kot mwan i avek.

MR SPEAKER

Training. Training.

HON CONRAD GABRIEL

Training, wi. *Ok*. Minis, ki ou pe fer pou adres sa bann sityasyon pour ki nou ganny plis dimoun Seselwa pou enterpret bann *training* ki annan? Mersi.

MR SPEAKER

Mersi. Minis, mon'n *run out of time* pour sa. Si mon kapab ganny en repons bref silvouple.

MINISTER SYLVESTRE RADEGONDE

Mersi Mr Speaker. Onorab, sa ki mon kapab dir ou se ki dan Minister Zafer Etranzer napa okenn etranze ki travay. Dan Minister Tourizm napa okenn etranze ki travay. Dan *STA* napa okenn etranze ki travay.

Mon pe koz lo bann departman ki tonm anba mon ziridiksiyon.

Me, pour serten servis spesifik, serten item *training* par egzanp, dan en domenn ki nou napa konpetans ouswa nou napa ase konpetans, nou *co-opt* dimoun pou ede pour *training*. Me napa personn ki la dan nou Minister *anywhere*. So, petet mon'n mal konpran ou kestyon. Mersi Mr Speaker.

MR SPEAKER

Mersi. Bon, nou termin sa sesyon kestyon la. Nou pou pran poz e nou a rebran Lasanble 11 er en kar. 11 er 15. Mersi Minis e ou delegasyon pour zot partisipasyon. Mon swet zot bonn kontinyasyon. Mersi.

(BREAK)

MR SPEAKER

Eskize pour sa pti enteripsyon. Nou pare pou kontinyen avek nou *Order Paper* e nou annan en *Bill* pour *Second Reading*. Mon ava apel pour Mosyon pour *Second Reading* silvouple.

HON SEBASTIEN PILLAY

Mersi Mr Speaker. Annakor avek *Order 69(2)*, mon oule ki sa *Bill Constitution of the Republic of Seychelles (Eleventh*

Amendment) Bill, 2024 i ganny lir en Dezyenm Fwa.

MR SPEAKER

Mersi. Nou a ganny segonde. Onorab Aglae?

HON EGBERT AGLAE

Bonzour Mr Speaker. Mon pe segonn sa pozisyon pour sa *Bill*. Mersi.

MR SPEAKER

Mersi. Onorab Pillay i ava adrese lo son *Bill* silvouple.

HON SEBASTIEN PILLAY

Mersi Mr Speaker. Mr Speaker, sa *Bill* i en *Private Members' Bill* anmennen par nou *Caucus*, an relasyon avek en aliterasyon lo Konstitisyon. I prezant son lekor konman 11 enm lamannman nou Konstitisyon.

Dan son *objects and reasons* oubyen son lobzektif sa *Bill*, nou dir;

“Lasanble Nasyonal i en kreasyon nou Konstitisyon. E i la pour li fer lezislasyon dan lentere nou bann sitwayen e asire ki Gouvernman i *accountable* dan lentere nou bann sitwayen.

Dan sa konteks nou santi poudir Lofis Speaker e Deputy Speaker i annan en rol enportan pour zot zwe. Alors,

nou dir ki Lofis Speaker e Deputy Speaker *should not only be discharged with fairness.*” Savedir i devret ganny desarze avek *fairness* e enparsyalite. Me i devret ganny vwar pe fer li. *“Should also be seen to do so.”*

Sa lamannman pe propoze pou retir Speaker e Deputy Speaker *from the political hold of his or her political party.* Savedir pou retir kontrol parti politik lo sa Lofis Speaker e Deputy Speaker.

Sa lamannman pou osi aplik dan lenstans kot en *Leader* Lopozisyon ek *leader* son parti i vin Speaker oubyen Deputy Speaker Lasanble Nasyonal, annakor avek Lartik 84(3) nou Konstitisyon.

Mr Speaker, ler nou pe antre dan Lasanble, devan Lasanble i annan en *motto.* *“Serving a modern democracy”.* Kestyon fondamantal ki nou bezwen demande konman en Lasanble Nasyonal se; eski nou pe servi en *modern democracy?* Eski Lasanble Nasyonal pe *fulfil* sa rol pour li servi en *modern democracy?*

Nou mentenir ki ozordi apre tou sa ki nou pe vwar arive, sa i pa leka. Mon pou eksplike atraver mon prezantasyon e prouve, ki i neserer pour ki i annan bann sanzman fondamantal ki ganny

fer avek nou Konstitisyon, pou zisteman permet nou Lasanble Nasyonal deservi son fonksyon dan en fason *fair e impartial,* zisteman pou servi en *modern democracy.*

Ti mon lentansyon bomaten pou met tou konsiderasyon politik a kote. Me malerezman apre sa ki'n arive avek *PNQ* ki mon'n anmennen lo bonous bann travayer *STC,* mon napa swa me fer antre en eleman enportan.

E sa mon privez konman *Leader* Lopozisyon. E osi nou privez konman Manm, pou defann drwa nou sitwayen dan sirkonstans kot nou sitwayen i santi zot drwa pa pe ganny respekte.

Mon'n ganny mwan en Minis ki'n le dikte dan lafason ki mwan mon devret fer mon louvraz, kan mwan mon pa'n dikte ki mannyer li i devret fer son louvraz.

Nou'n osi ganny sityasyon kot en Minis in refize pou reponn tou kestyon. E nou menm pa kapab epwiz letan ki nou'n gannyen pou demann kestyon Minis lo en size enportan ki afekte sitan kantite travayer, dan en parastatal ki *belong to* Gouvernman.

Apre tou, sa bann dimoun i bann kontriyab taks e zot osi nou bann sitwayen. Savedir

nou bezwen deservi zot *in fairness* e dan en fason enparsyal.

Mr Speaker, mon konpran tre byen nou Konstitisyon. Speaker i apre tou en politisyen. E sa i mars anliny avek Lartik 23 nou Konstitisyon. Savedir, tou sitwayen Sesel i annan drwa pou fer politik e apartenir a bann parti politik.

Me, dan mon resers mon vwar plizyer dokiman ki'n montre mwan, ki malgre ki en Speaker i kapab annan son latasman politik ki sa dan li menm i pa neseserman enportan.

Sa ki enportan se ki sa Speaker i devret kapab disteng ant son *allegiance to* son parti. Savedir defann son parti oubyen son *duty towards Parliament*. Dan nou ka, son devwar anver Lasanble Nasyonal.

Mr Speaker, mon'n osi regard en dokiman ki'n ganny prepare par nou tim legal, ki'n fer en tretman lo sa menm size. E mon note e mon apresye travay resers ki'n ganny fer. Mwan osi mon'n konsilte serten menm sours ki zot in konsilte.

Par egzanp, i annan en Lotorite ki apel Begon.... ki li i dir ek nou koumsa,

“Lofis Speaker *calls for the utmost impartiality*”. Savedir enparsyalite total. E sa i *imply* ki sa lofis pa kapab fer referans avek son afilyasyon politik pandan letan ki i pe desarz son fonksyon. E sa i osi aplik pour Deputy Speaker.

Me bomaten ankor enn fwa ki nou'n vwar? Nou'n vwar Deputy Speaker, Mr Speaker atraver ou, ki Onorab Gervais Henrie, in menm dir ek Minis ki mannyer i devret reponn mon kestyon. Apre tou, Onorab Henrie i osi Sekreter Zeneral LDS.

MR SPEAKER

Onorab, mon konpran ki sa deba i devret ganny deroule, san ki i annan referans avek aksyon desizyon Speaker e Deputy Speaker ki an plas konmela. Mon ti ava apresye si nou kapab fer sa deba lo sa baz. Sa deba i bezwen kapab deroule san bann enplikasyon personnel lo sa ki annan sarz Lasanble konmela. Mersi Onorab.

HON SEBASTIEN PILLAY

Mersi Mr Speaker. Pli tar mon pou prouve akouz nou bezwen ou trouv konman minorite Lopolisyon, pe bezwen *resort to* sa bann kalite komanter dan lesansyel pour nou fer nou

pwen. Me osi aköz lafason ki zerans Lasanble Nasyonal i anmenn nou pou fer sa bann kalite komanter.

Me pou eksplik piblik Seselwa dan en fason pli kler. Annou regard rol nou Lasanble Nasyonal. Rol nou Lasanble Nasyonal se pou reprezant Lepep Seselwa.

Ankor enn fwa mon pou servi legzanp bomaten, ler bann travayer *STC* in kontakte mwan *regarding* zot bonous ki zot ti ganny dir zot pou gannyen an Mars. Zot pa'n gannyen an Mars. Zot in ganny dir zot pou ganny pli tar.

Mon pe reprezant zot e demann Gouvernman pou klarifye lo non sa bann travayer. Si sa bann travayer in decide vin kot mwan konman *Leader* Lopozisyon ki reprezant *United Seychelles* dan Lasanble Nasyonal. Sa i zot swa. Zot ti'n kapab osi pareyman al fer reprezantasyon avek bann Manm *LDS*. Sa ti ava osi zot swa. Mon pa pou fer komanter lo aköz zot in swazir nou. Sa i sa bann travayer ki konnen aköz.

Dezyenmman Mr Speaker, i nou rol pou pas Lalwa. Fer lezislasyon. Be pour nou kapab pas lezislasyon nou bezwen annan en fason enparsyal ki nou regard lezislasyon.

Legzanp i kler e i montre nou ki dan lafason ki nou fonksyonnen konman Lasanble Nasyonal, nou pa enparsyal dan pas lezislasyon.

Mon fer kler Mr Speaker ki mon largiman la i baze lo bann dokiman ki deza egziste. Savedir nou *Standing Order* e nou Konstitisyon. Lartik 85 nou Konstitisyon i vers pouwar lezislatif dan Lasanble Nasyonal. Pa dan Minis, pa dan Prezidan. E sertenman pa dan okenn dimoun dan egzekitiv.

Me sa ki nou vwar kouraman pe arive se ki ler Lasanble Nasyonal i propoz bann lamannman dan bann Lalwa, Speaker dan sa konteks dan Lasanble Nasyonal Sesel, i demann avek en *panel* Minis si zot dakor avek sa bann lamannman. Sa i pa sipoze pratik ki ganny pratike dan en Parlman oubyen Lasanble Nasyonal Demokratik.

Lenn par egzanp Mr Speaker, Speaker pa kapab decide lo ki bann lamannman oubyen lo ki *panel* pou dir lo en lamannman. Sa i bezwen ganny fer par bann Manm, aköz apre tou, *the Chamber belongs to the Members*. E *the* Speaker i en refri ki endepandan.

Lartik 98 nou Konstitisyon i dir ki Speaker i prezid lo bann deliberasyon. Ler

nou regard definisyon prezid, sa i vedir ki i bezwen *officiate* dan en fason *free from bias*. San ki i pran en kote. Me sa i ekstrememan enportan pour trwazyenm rol ki nou Lasanble Nasyonal i annan. E sa se *oversight*.

E ki manner nou egzers *oversight* koman en Lasanble Nasyonal? Nou egzers *oversight* atraver bann Mosyon, atraver bann kestyon e atraver travay bann Komite.

Be annou pran sa size kestyon. Ankor enn fwa mon pou servi legzanp bomaten, akoz i legzanp ki pli pre avek nou ki'n fek arive. Apre ki Minis in ale 9 er edmi, Speaker i enform nou ki Minis i sipoze reste dan Lasanble ziska 9 er 45.

Malgre ki Speaker ti'n agree dan lepase par Konvansyon e par prensip ki *PNQ* dan bomaten pou annan en dirasyon 1 erdtan, pou les bann Manm eksplor bann kestyon.

Alors, pour ki rezon ki sesyon kestyon in ganny terminen avan ler? E dezyenmman, akoz ki nou pa'n ganny sans epwiz kestyon, menm ziska sa ler ki ti'n ganny determinen? Sa nou pa pou konnen.

Me pli enteresan, e sa i al ver lenparsyalite e lenparsyalite ki Speaker i annan. E mon pa'n zanmen ganny enformen bomaten ki sesyon kestyon pou al ziska 9 er 45. Apre tou, mwan osi en Dirizan dan Lasanble Nasyonal.

Annefe, okenn Manm mon *Caucus* pa'n ganny enformen lo ler ki nou ti pou pran pour kestyon dan Lasanble Nasyonal. Ankor enn fwa sa i montre ki nou pa pe “*serve en modern democracy*”.

Prezan annou kler; Lepep Seselwa i bezwen kler. Lartik 93 nou Konstitisyon i demann attendance bann Minis dan Lasanble Nasyonal. E 93(1)(b) i dir ki,

“en Minis i vin dan Lasanble pour li vin *deal* avek okenn size ki *arise* dan Lasanble, oubyen pou vin eksplik Lasanble okenn size ki tonm dan *purview* Vis Prezidan oubyen *purview* sa Minis”. Savedir anba son responsabilite.

Eski alors nou pou kapab “*serve a modern democracy*” ler nou pa kapab kestyonn Minis e fer li vin eksplik en keksoz ki tonm anba son responsabilite?

Mr Speaker nou bezwen kler akoz sa lamannman in vini. Sa lamannman i annan en lenplikasyon pour lezot, lezot

Lartik nou Konstitisyon. Par egzant; Lartik 102 nou Konstitisyon i dir ki “dan Lasanble Nasyonal i devret annan *freedom of speech and debate*”.

Me eski dan Lasanble Nasyonal Sesel ozordi i annan *freedom of speech and debate*? Dan mon lopinyon e dan lopinyon lamazorite dimoun la deor, sa i pa leka.

An plis ki sa, Lartik 27 nou Konstitisyon i prevwar ki tou dimoun i annan proteksyon egal anba Lalwa. Savedir sa i pou enkli bann prosedir e bann Lalwa Lasanble Nasyonal an sa ki konsern bann Manm dan minorite. Ankor enn fwa, nou pa vwar sa pe ganny aplike dan en fason enparsyal.

Nou santi ki poudir i annan tro bokou proteksyon pour Legzekitiv. Kot par egzant par lepase en *PNQ* dan Lasanble Nasyonal, ler Prezidan Larepublik ti ankor *Leader* Lopozisyon, ti kapab dir lanmwatye lazournen. En size ti ganny eksplere dan tou son detay. Ozordi nou etabli ki en *PNQ* i al zis pour 1 erdtan. E la aprezan in konmans vin 30 minit.

Nou osi vwar ki en *PNQ* i kapab ganny amande. E sa i al ver le bi fondamantal kestyon ki nou pe met devan nou ozordi. E

sa se Lartik 98 ki dir nou ki “se Speaker ki prezid lo Lasanble Nasyonal”.

E *Standing Order* 8 nou *Standing Order* ki dir ki se “Speaker ki *maintain decorum* lo prosedir Lasanble”.

Pep Seselwa i bezwen konpran ki enn;- Speaker i kapab sanz okenn kestyon si dan son lopinyon i santi poudir i annan keksoz ladan ki pa devret ladan.

Nou santi poudir pour ki Speaker i aplik sa prensip e sa prosedir. I pa kapab li menm alors dirizan son parti politik. Akoz se li enkli son parti ki pou set Polisi ki Gouvernman i met an plas.

Apre tou, nou kontinyelman ganny dir ki dan *manifesto LDS* i annan tel keksoz oubyen tel keksoz. Be lekel ki responsab *manifesto LDS* si pa *Leader LDS*?

Mr Speaker, mon'n osi konsilte lezot lotorite lo sa size enparsyalite Speaker. Mon'n fer letour par diferan ziridiksyon, enkli Lenn, *Kenya*, *La Guyane*, Lanmerik. En pe partou.

E mon'n vwar plizyer eleman ki montre nou ki manner bann diferan Konstitisyon pe *grapple* oubyen pe *struggle*, pou *deal* avek sa size enparsyalite en Speaker. I annan parey Langleter ki'n

etablir li dan en fason pli kler. Savedir rod en Speaker ki *neutral*.

Dan sa konteks, Speaker ler i vin Speaker Langleter, i *sever* bann *ties* avek son parti e i pa form par son *Caucus*. I menm pa *attend* bann *meeting* son *Caucus*.

La Guyane resaman, ki en pti pei parey nou menm, i dir nou poudir son Konstitisyon i *Supreme Law of the Land*. E dan sa konteks, en Speaker i devret kapab desarz son responsabilite dan en fason enparsyal e endepandan avek lenterferans politik. E i pa dir ki sa Speaker pa kapab annan son lapartenans politik.

E se sa ki mon oule fer kler avek Lepep Seselwa ozordi. Ann okenn ka eski mon pe pyetin lo drwa Konstitisyonnel okenn dimoun ki vin Speaker pour li annan son drwa apartenans politik.

Nou bezwen osi regard bann lezot lotorite ki'n ekrir e ki ganny servi konman bann *manual* pour bann Lasanble Nasyonal, swa dan larezyon e enternasyonal.

Enn sa bann dokiman enportan de referans i Erskine May. E li i dir nou poudir rezon ki en Speaker son lendepandans i ganny enskrir, se par lefe ki en Speaker pa

sipoze pran par dan deba, oubyen partisip dan en vot *unless* i annan nesesite pour li *cast* en *casting vote*. Donn en *casting vote*.

Savedir, kan i annan egalite dan vot, Speaker i vini pou *break the tie*. Sa i kler. E sa i montre ou ki dan son lentansyon, menm nou Konstitisyon ki'n reprodwir menm eleman, menm *clause*, i vedir ki Speaker i sipoze endepandan e enparsyal dan son fonksyon.

Mr Speaker, kestyon fondamantal ki mon'n bezwen fer fas avek ler mon pou prepar mon prezantasyon pour sa Prozedlwa, se eski ou kapab asire ki en Speaker i non partizan?

Lasirans ki en Speaker non partizan i vin avek prensip ki'n ganny etablir ki mannyer en Parlman i fonksyonnen. Eski nou Konstitisyon i dir nou ki Speaker pa pou partizan?

Definitivman non, akoz i ganny swazir sorti dan en parti politik. E dan nou konteks in laplipar ditan sorti dan parti mazoriter. In swa en Manm proporsyonnel. E dan serten ka, in en Manm ki'n ganny elekte direkteman.

Me annou regard ki lezot ziridiksyon in vwar e ki'n arive. Par egzanp; an 2018 *Nouvelle-*

Zélande, Speaker Trevor Mallard ti ganny akize ki i pe montre siny *political preference*. Savedir lentansyon tou dimoun a sa moman sete etabli ki rol Speaker i bezwen *strictly impartial*.

Lagreman pour tou dimoun i se ki Speaker i reprezant Lasanble an total. Tou Manm. E si Speaker i reprezant tou Manm, Lofis Speaker i bezwen ganny *vested* avek enparsyalite e lendepondans. Son lofis pa devret ganny zis vwar *to be impartial*. Be i bezwen viv sa enparsyalite.

Mon pa santi ki en Speaker ki li menm i dirizan son parti, i kapab asir enparsyalite en lendepondans. Mon pou sit detrwa legzanp pou montre ankor.

Mon annan 2 legzanp, 2 referans ki'n arive Moris resaman. Enn i Boolell kont Speaker Lasanble Nasyonal. E lot i Onorab Assirvaden kont Speaker Lasanble Nasyonal.

Dan tou lede ka, *challenge* in ganny mete lo enparsyalite Speaker aköz son aksyon ki'n pran anver bann Manm Lopoziyon.

Alors lesansyel pour nou ozordi se fer en pa – en gran pa devan pour nou etabli en premiz ki ava donn lentansyon

e lespri Konstitisyon e fer li pli kler, pour ki sa rol ki Speaker e Deputy Speaker i deservi i ganny deservi dan en fason ki totalman *impartial e fair*.

Lenn menm, son Konstitisyon e son bann *Rules of Procedure* i annan bann *guidelines* ki'n ganny preskrir pou asir enparsyalite en lendepondans Speaker.

In menm annan lenstans – e sa mon pe koz lo Dokter Sanjiva Reddy ki ti Speaker *of the Fourth Lok Sabha* ki ti formelman *resign from* son parti politik aköz son lopinyon sete ki Speaker *belongs to the whole House*.

Savedir Speaker i pour *the whole Assembly*. Alors pou permet li reste enparsyal. E ankor enn fwa dan Lenn, zot sit Lartik 100 zot Konstitisyon ki fer referans avek *the right to cast a vote in relation to breaking a tie*.

I annan plizyer dimoun ki'n ekrir lo sa size. Par egzanp; Laban an 2014 ti ekrir “*more Westminster than Westminster*”, lo bann lofis *of bann Speakers across the Commonwealth*.

E la Laban i dir nou koumsa; enkli Latour an 2004 ki nosyon ki Speaker i en *spokesperson*, nou pe dir ki nou pa pe koz lo *only the*

transparency of speech in question. Me the whole gamut. Savedir Speaker i koz pour tou Manm.

Eski nou santi dan Lasanble Nasyonal Sesel ki Speaker pe koz lo non tou Manm? Dan sa fason ki sa pe ganny fer, nou bezwen dir, non.

Dapre sa enterpretasyon, si en Speaker i le reprezant *views* bann dimoun ki'n *entrust* li sa responsabilite dan en leta demokratik, *then* nou ava vremen pe servi en “*modern democracy*”. Savedir enparsyalite lendepondans Lasanble Nasyonal avek Legzekitiv i ava asire pandan sa *parliamentary term* ki sa dimoun pe *hold* lofis.

Me si sa dimoun i reste *leader* son parti politik, konpleksite i reste ki i pou anba lenterferans oubyen i pou bezwen aplik son pozisyon politik dan lafason ki i deservi son fonksyon.

I annan lezot tretman ki'n ganny fer ki'n koz lo ak... pou asire ki i annan *trust in the House*. E savedir ki piblik an deor i santi ki Lasanble Nasyonal pe deservi son fonksyon. Enparsyalite *of the Chair* i neser.

San sa enparsyalite an Sidafrik zot in vwar, sa i pou afekte *public perception of rol* ki

Lasanble Nasyonal i zwe. Nou pa kapab kontinyen dan sa sityasyon kot nou pe ale Mr Speaker.

An konklizyon. An konklizyon mon retourn Sesel. E la mon retourn lo *Seychelles Constitution Review Committee*. Sa komite ti annan 11 manm. E mon pou reprodwir dan Lasanble Nasyonal tou bann manm ki ti lo sa komite ler zot ti ganny apwente par Prezidan Michel sa letan an 2008.

Ti annan Mr Francis Chang-Sam. Mrs Marie-Louise Potter oubyen son reprezantan. Mr Wavel Ramkalawan ki ti *Leader* Lopozisyon sa letan. Mrs Potter li i ti *Leader* Zafer Gouvernman. Mr Anthony Fernando Atorni Zeneral.

Mr Jeremie Bonnelame *Chairman Constitutional Appointment Authority*. Mr Gustave Dodin *Ombudsman* sa letan. Mr Albert Payet *Chairman SCCI* sa letan. Mr Philippe Boule en Avoka sa letan. Mr Bernard Elizabeth *Chairman LUNGOS*.

Manmzel Sheryl Vengadasamy ki ti Speaker *National Youth Assembly* e Manmzel Elizabeth Charles ki ti Direkter Korperasyon Enternasyonal kot Minister Finans.

Dan zot let lapwentman, Mrs Potter ti deziny Mr William Herminie *Attorney at Law* pou reprezant li lo sa komite. E Mr Ramkalawan ti nomin Mr Bernard Georges *Attorney at Law*, pou vin lo sa komite.

E ki sa komite ti dir? Sa komite ti agree ki sa dimoun ki annan Lofis Speaker i devret *at all times* endepandan e *fair*. Sa komite ti note ki Lasanble Nasyonal depi ki in an fonksyon, Speaker in toultan ganny elekte sorti dan parti mazoriter dan Lasanble Nasyonal. E i en Manm ki ganny elekte anba *proportional representation*. Savedir i en Manm proporsyonnel.

Lenplikasyon i se ki i toultan i pou anba kontrol son parti, akoz i kapab ganny retire a okenn moman. An adisyon, bann Speaker dan lepase in osi en manm *Central Committee of the Majority Party*. So ler nou pe koz en manm *Central Committee of the Majority Party*, nou konnen poudir sa i sorti kot reprezantan Mr Ramkalawan, sa letan Mr Bernard Georges lo sa komite.

Sa komite i demann son lekor alors dan sa bann sirkonstans ki'n ganny dekrir anler; eski Speaker i kapab *retain* son lendepandans from sa parti ki i *belong to*? Eski i

kapab ganny rekonnet par Lepep ki i *above party politics*?

A sa moman Mr Speaker, Onorab Georges e Prezidan Ramkalawan, atraver ou, ti krwar dan en Speaker ki devret endepandan *from* son parti.

Komite ti pran sa pozisyon ki ler in ganny elekte konman dan pos Speaker, en Speaker i devret distans son lekor sorti lo bann size politik partizan e *step down from the party Caucus or other influential party committees*.

Ou menm ou Mr Speaker e Onorab Henrie in enform nou, plizyer fwa dan Lasanble ki zot osi zot in *attend zot meeting Caucus* dan Lasanble Nasyonal. Mon pou vin lo la en pti moman.

Serten Manm ti *of the view* ki en lamannman Konstitisyonnel i devret ganny fer, pour ki Speaker pa partisip dan bann aktivite politik. Ankor enn fwa, sa in sanze apre 2020. Ozordi nou vwar Speaker e Deputy Speaker pe partisip dan bann aktivite politik.

Lezot Manm ti lopinyon ki ti napa nesesite pou fer en lobligasyon statitwar anba Konstitisyon. Me ki ofil letan, sa pou vin en *accepted practice and tradition*.

Wi, i ti vin en pratik akoz Dokter Patrick Herminie ti *resign from Central Committee*.

Mr Patrick Pillay ki ti vin Speaker apre li, pa ti *leader* parti ki ti dan Gouvernman. E Mr Nicola Prea ki ti vin Speaker apre Mr Pillay, ti menm *resign* konman Sekreter Zeneral *SNP*. En desizyon ki ti fer li ganny en pake problemm avek Prezidan Ramkalawan sa letan.

Me annou regarde osi ki Prezidan li menm ti dir pandan sa bann letan. E la mon site e mon swete ki bann Manm *LDS* i mazin sa parol swivan. E mon *challenge* zot pou demann mwan pou *substantiate* sa ki mon pe al dir.

“Mr Speaker pa kapab azir konman Speaker, me an menm tan pe asiste *meeting* group son parti dan Lasanble letan zot pe regard zot stratezi travay.

En d'autres mots, refri pa kapab asiz lo ban *management* en tim, donn konsey konman en *coach* e apre dir ki i endepandan e enparsyal”. Wavel Ramkalawan 2014.

Mr Speaker, parey tou keksoz i annan serten keksoz ki ganny dir. Me serten keksoz ki pa pou zanmen ganny fer. Ler in re ganny demande sa kekyon an 2022, Mr Ramkalawan ti reponn Mr Clive Camille koumsa; “Clive, mon pa kabab pli Katolik ki Lepap. Wi, ozordi Mr Roger Mancienne ki

Leader LDS i osi Speaker Lasanble Nasyonal”.

Pandan tou sa letan ki ti'n en problemm ki ou annan en Speaker ki form par *leadership* son parti, Sesel dan son - pour premye fwa – e mon le ki pep Seselwa i ekout mwan byen -

pour premye fwa dan son listwar, i annan en Speaker ki pa selman responsab pour Polisi son parti. I annan pouvwar pou apwent e retir bann Manm proporsyonnel.

In a sense pour premye fwa dan nou listwar e Speaker e Deputy Speaker, tou lede i lo *high leadership* parti politik ki annan mazorite dan Lasanble Nasyonal. Eski sa i apel *servng a modern democracy?*

Zis pou eksplike ki mannyer sa sityasyon i banal e bizar, e drol.

Konstitisyon i prevwar ki ler ou pou retir en Manm proporsyonnel dan Lasanble Nasyonal, i bezwen annan en let sorti kot son parti politik ki ganny anvoye kot Speaker Lasanble Nasyonal, pou enform li poudir i pe retir sa Manm dan Lasanble Nasyonal. Oubyen i pe sanz, oubyen i fer rotasyon dan bann Manm proporsyonnel.

Dan nou ka Sesel, Mr Roger Mancienne ki *Leader LDS*, i ekrir Speaker Lasanble Nasyonal ki Mr Mancienne, pou

enform li ki i pe tir oubyen sanz en Manm dan son parti politik. Si i aplik pour Deputy Speaker, Sekreter Zeneral *LDS* ki Onorab Henrie, pou ekri Onorab Henrie ki Deputy Speaker Lasanble Nasyonal, ki i annan sanzman dan *membership* Lasanble Nasyonal. Eski sa i apel *serving a modern democracy*?

Pour premye fwa depi konmansman Trwazyenm Repiblik, wi nou annan en Speaker e son Deputy Speaker ki zot menm *Leaders* parti politik ki Prezidan i sorti ladan.

Ni Speaker MacGregor, Herminie, Pillay e Prea pa ti *Leader* zot parti dan Gouvernman ler zot ti Speaker. Mon les sa *sink in* pour nou tou ki pe ekoute.

En lot keksoz ki enteresan Mr Speaker, se ki ler ou ariv a sa pwen kot ou annan sa mank enparsyalite en lendepandans Lasanble Nasyonal, sa i kree en problemn pour nou.

Me eski i annan landrwa kot in annan en separasyon pou asir *impartiality*? Par egzans an *Canada*, nou konnen poudir bann Speaker pa pran par dan bann *party meetings*. Oubyen dan okenn politik partizan. Sa se pou protez enparsyalite zot lofis.

Speaker i *abstain from all partisan political activity* nou ganny dir. Par egzans, i pa *attend Caucus meetings* e i pa partisip dan deba e vote zis ler i annan en kalite dan vot. *Normally referred to as a casting vote of the Chair*, ki nou Konstitisyon i prevwar.

Québec, sa Speaker ki *deal* avek *Legislative Parliament*. Sa Speaker pa zanmen *attend Caucus meeting* son parti. *They are impartial*.

Me sa ki enteresan Sesel se ki resaman nou ti vwar dan en lekol kot tou le de prezan ti Speaker e Deputy Speaker, pe fer *meeting* politik dan en lekol. Enteresan. *Be that as it may*. Sa i zot swa. I kont Konvansyon, i kont prensip. Me sa i en desizyon ki zot in pran.

Me sa ki pli enteresan se ki ou annan lenstans kot Speaker pe menm *campaign* dan en distrik kot i annan en *sitting MNA* sorti dan Lopoziyon. Eski sa i apel *serving a modern democracy*? Eski sa i apel enparsyalite?

Apré tou, eski Speaker i al *campaign* dan sa distrik pou dir bann dimoun dan sa distrik, vot pour sa *MNA* ki ozordi dan sa Lasanble? Oubyen i al *campaign* pour ki son parti i ganny sipor dan sa distrik? Ki

manner sa i kapab asir enparyalite Lofis Speaker?

Mr Speaker, lenportans sa deba ozordi ki nou pe fer, se ki i bezwen annan en *perceived impartiality*. *Impartiality must be seen to be happening* dan nou Lasanble Nasyonal. E nou pa kapab kontinyen koumsa.

Nou bezwen favoriz lenterer Nasyonal *over* lenterer parti. Nou *practice* kouran ki *allow* nou Speaker ki en *leader* en parti politik pa pe ed nou. E se sa ki anmenn diskord e dezord dan Lasanble Nasyonal.

Dan en analiz ki'n ganny fer par plizyer eksper lo Parlman Lenn, zot in trouve ki sa i anmenn *increased disruption in Parliament*. Akoz *partisan conduct of the Speaker*. *The partisan conduct of the Speaker*.

Lafason ki Speaker i *conduct* li dan en fason partizan anver parti Lopozisyon, i a souvan fwa *leave*, i anmenn bann *disruption* konstan. I anmenn bann dezord konstan dan Lasanble Nasyonal.

Mon'n etabli premiz pour sa lamannman e son merit, par lefe ki mon krwar in ler pour nou vreman al ver *serve a modern democracy*.

Malerezman mon konsyan ki ni nou Konstitisyon, ni nou *Standing Orders* pa fer

provizyon spesifik pour enparyalite Speaker. Avek sa lamannman, mon pe swete ki nou kapab fer en pa dan sa direksyon.

I en keksoz ki neser dan en leta demokratik e nou Konstitisyon, ki bann lenstitisyon ki annan en rol pou zwe i kapab fer li dan en fason endepandan. Mon ti war li enteresan ki Onorab Henrie ti'n ganny envite kot Lakour pou koz lo *freedom of speech*.

I enteresan Mr Speaker par lefe ki nou lo nou kote nou pa santi ki dan laplikasyon Lalwa Lasanble Nasyonal, *freedom of speech either* par Speaker e Deputy Speaker, i ganny mentenir.

Ozordi bann parti politik, sirtou parti politik ki o pouvwar in *conveniently* inyor lefe ki deba pa devret ganny anpese. Me sa ki mon le fer avek sa Lalwa ozordi i se koriz sa.

Mon le fer spesifik en keksoz ki ti souzantandi. Sa ki Komisyon lo revizyon Konstitisyon ti dir pou arive ofil letan. Me ki *LDS* in fer nou retourn plis ki 40 an aryer.

Tou Konstitisyon demokratik i ekspekte sa. Lartik 98 i ekspekte sa. Alors Mr Speaker, ler nou regard kot nou'n arive ozordi. Ler nou regard tranzitwar nou

demokrasi. Ler nou regard kot nou pe ale pour ki nou kapab zwe nou rol konman en Lasanble Nasyonal. En manm apartyen gouvrenans nou pei endepandan, for e kapab debout kont Gouvernman dan lentere Lepep Seselwa, e pa zis tonm dakor avek tou sa ki Gouvernman i vin avek.

I nesese ki nou kapab asire ki bann lofis ki gid travay Lasanble Nasyonal, ki *dictate* travay Lasanble Nasyonal, zot bann lofis ki endepandan e enparsyal.

Mon note Mr Speaker avek sa anomali ki annan ozordi, 2 lezot Lalwa dan nou pei i ganny afekte. Premyerman, se sa *Bill* ki konsern *Human Rights Commission*.

Akoz lo *Human Rights Commission* ozordi, Prezidan i konsilte avek Speaker Lasanble Nasyonal dan lapwentman *Chairperson*, *Deputy Chairperson* e sa 3 Komisyoner.

Esansyelman, Prezidan ki dan *LDS* i konsilte avek *Leader LDS* lo lapwentman *Chairperson*, *Deputy Chairperson* e bann Komisyoner ki lo *Human Rights Commission*.

Lot Lalwa ki ganny afekte se Lalwa *Seychelles Broadcasting Corporation*. Ankor enn fwa Prezidan i konsilte avek Speaker Lasanble

Nasyonal dan lapwentman Sef Egzekitiv e Deputy Sef Egzekitiv lo lapwentman *Seychelles Broadcasting Corporation Board*. Eski sa i apel *servng a modern democracy? I rest my case*. Mersi Mr Speaker.

(APPLAUSE)

MR SPEAKER

Mersi Onorab. Onorab Aglae, ou le pran laparol an se moman? Ou annan laparol.

HON EGBERT AGLAE

Mersi Mr Speaker. Mr Speaker, sa Mosyon pour sa *Private Members' Bill* ki lo papye dizour. Pour nou, nou pe tret li dan en fason senbolik dan en sans. E osi nou pe regard li dan en fason ki mannyer nou anmenn nou Lasanble Nasyonal dan bann prosen fitir. Demen i kapab mon pa la, ou pa la, lezot Manm pa la.

Me sa ki enportan se ki avek devlopman en pei kot i konsern nou Lezislativ, nou kapab dir demen nou'n vin en legzanp, ouswa en model dan larezyon. Parey nou konman en pei ki swiv bann norm demokratik.

E nou *motto* ki la deor ler ou antre. Sirtou ler bann viziter i antre zot pou get anler zot pou

war sa bannyer ki marke “*Serving a modern democracy*”.

E pour mwan Mr Speaker, Lasanble son kreasyon i ganny mete, i ganny kree anba Lartik nou Konstitisyon Sapit 6 Lartik 77 ki dir “*There shall be a National Assembly*”. I kler dan Konstitisyon.

E apre ki i ganny sa nesans, Lartik 83 nou Konstitisyon i fer ki i dir “*There shall be a Speaker and a Deputy Speaker*”. I kler sa. Sa ki nou, nou pe demande dan nou Mosyon Mr Speaker dan sa *Bill* Mr Speaker, se i annan - nou santi poudir i annan serten moman ki Konstitisyon i silans dan proklamasyon bann pozisyon.

E ki parfwa letan i annan sa bann moman silans, i fer ki nenport kwa i kapab ganny arive, ouswa sakenn pou enterpret li dan son kalite fason baze lo son lavantaz ouswa son dezavantaz.

E sa ki nou krwar ladan ozordi se ki, le moman in arive pour nou kapab dir sa demokrasi modern ki nou anvi servi i merit viv avek en lespri kot rol sa trwazyenm brans pilye nou la demokrasi. Sa i lezislasyon a son latet.

Nou merit war osi en fason modern kot i vin avek en o nivo – e sa mon pe met li koumsa, lo

en o nivo *fairness* e enparsyalite. Me pa sa ki nou pe war ozordi.

Mon rekonnèt osi poudir i annan 2 parti isi ki dan sa Lasanble. I annan en parti mazoriter ki li i *Government*. E nou annan parti minorite ki *US*.

E listwar in montre nou klerman ki dan lepase kontrerman ek ozordi, nou pa'n zanmen annan en Speaker ki'n en dirizan son parti. I pa'n egziste. Nou'n annan Speaker ki ti bann Manm enportan, dan konteks nou parti nou apel sa Komite Santral.

Me an alan ki nou la demokrasi in progresiv, in devlope pou ariv lo en nivo modern fas avek bann legzanp enternasyonal. Par egzanzp nou form parti *Commonwealth*. En lorganizasyon ki nou swiv en kantite.

In montre nou bann diferan legzanp kot ler Speaker i ganny nominen ouswa i ganny elekte par son Parlman, i *recuse* son lekor dan son pozisyon politik ki i annan dan son parti.

Me i pa *recuse* son lekor avek son lafilyasyon ki annan ek sa parti. Sa nou bezwen fer kler sa. I *recuse* son lekor dan pozisyon ki i pe tenir. Me par apartenans son parti.

E osi zot fer kler ki letan ou'n *recuse* sa pozisyon dan ou

parti, ou annan proteksyon ki antase avek. Par egzanp si ou'n elekte dan en pti konstriksyon, si demen eleksyon i ganny *call in*, ou anvi re debout malgre ou Speaker, sa pozisyon i ganny proteze pour ou kapab re antre e re debout si ou anvi. I kler.

E nou war sa *House of Common Lok Sabha* osi, i annan en menm laliny zot pran. E bann lezot ziridiksyon. Pour nou sa nou war li i enportan, pa akoz ozordi nou dan minoriter nou. Non. Nou, nou pe koz koman en Nouvo *United Seychelles...*

(laughter)

HON EGBERT AGLAE

Sa ki nou, nou krwar ladan.

MR SPEAKER

Order please!

HON EGBERT AGLAE

En kantite in ganny dir dan lepase Mr Speaker an sa ki konsern lafason ki Speaker e son rol i merit ganny zwe.

Rol Speaker premyerman se pour li mentenir *order* dan *House*. I bezwen *manage*, *preside over* bann *proceeding* ki annan *in the House*. E osi son rol se en rol administrativ ki annan pou fer avek tou bann

zerans, ki annan pou fer avek bann konsern parlmanter.

E dan sa fason Mr Speaker, i enportan akoz ou pa zis *oversee the Members of the House*. I annan bann lezot responsabilite ki Speaker i annan lo nivo lokal e lo nivo enternasyonal.

E pour nou, pozisyon ki ou ladan, ki Speaker i ladan ozordi – mon pe koz sa lofis, i pe ganny tenir par en dirizan en parti, i fer mwan ouswa nou poz bann kestyon lo ki nivo enparsyalite ouswa *fairness* ki kapab ganny egzerse isi ozordi.

E nou'n war dan bann diferan lenstans. Mon'n dan sizyenm Lasanble. La mon dan setyenm Lasanble. Nou'n war bann lenstans kot lavwa sa ki pa sorti dan son parti, i ganny *curtailed* dan bann diferan repriz.

I annan bann nivo proteksyon ki en kote pou gannyen e lot kote pa pou gannyen. Nou'n war bann diferan lenstans dan *question time*. E la nou koz *PNQ* Premyerman.

Kot mon bezwen poz kestyon parfwa; eski pou annan lamannman dan *Standing Orders* byento ki *PNQ*, avan ti donn 1 erdtan. 6enm Lasanble *PNQ* ti ale ziska midi, 2 er, 3 er. Preski en lazournen antye.

Ozordi nou'n ganny dir 1 erdtan. E sa 1 erdtan la bomaten *LOTO* in ganny li forse 10 minit dan sa 1 erdtan ki li - li ki loter *PNQ*, me selman li i ganny zis 10 minit. E nou war bann presedans lafason fer akoz nou war kler nou osi, kot a diferan lenstans ler *PNQ* i vin dan Lasanble Mr Speaker, lot kote latab i lev lanmen, plizyer zot. E nou konnen sa se pou pran letan dan sa letan ki *LOTO* i annan. Alors Mr Speaker, sa i en legzanp.

Dezyenm legzanp se letan bann Minis i vin reponn kekyon isi dan sa Lasanble, lafason ki Speaker i egzers bann *rulings*. Nou santi konsernen lo la. Akoz Minis in vin la e Prezidan ti fer kler letan i ti sermante. "Demann mon bann Minis kekyon e zot la pour zot reponn". Ti dir tousala.

Me letan nou pe demann Minis kekyon – mon konpran *Standing Orders* i fer referans avek laliny ouswa *angle* kekyon ki ou demande, si i *off the topic itself*. Koman Speaker ou annan drwa arete. Napa problemm.

Me lamazorite fwa nou kekyon i vize ver topik ki dan lakaz, ki dan *House* isi. E Speaker ou war li kot i antre. Minis sa pa reponn. Minis si ou pa anvi reponn. Ouswa Minis in fini reponn. Be eski i *fair* dan sa

fason ki nou *conduct business in the House*? Sa i bann konsern ki nou leve la ozordi.

Lot *angle* Mr Speaker ki mon anvi pran lo sa se, en Speaker i ganny asiste avek en Depite Speaker. E Depite Speaker ozordi, li ki Sekreter Zeneral parti.

Dan labsans Speaker letan ou pa la Speaker, se Depite Speaker ki pran laba. Ankor, naryen pa sanze. Se en pozisyon Sekreter Zeneral ki *the second highest* dan en parti. Se li ki diriz bann *affairs of the party* li menm li. Bann stratezi. Bann diferan.

Ankor, parey nou'n dir an Kreol, "zwazo menm nik pa kontan menm bar." *It's the same thing*. Pa li sa *modern democracy* ki nou anvi *serve* la anndan.

Mwan la mon pa pe kont endividi mwan. Mon pa pe koz non la mwan. Mon pe koz pozisyon. E se sa ki mon pa pe nonm non.

MR SPEAKER

Onorab, eskiz mwan en pti kou. Bann Manm *LDS* silvouple, zot annan zot drwa pour zot koze. Silvouple evite avek bann komanter *off-mic* la, akoz i pe deranz deba. Mersi.

HON EGBERT AGLAE

Mersi Mr Speaker. Mr Speaker, la mon pa pe get lendividi ki pe *hold* sa bann pozisyon mwan. Pe enport ki ou ete.

Mon pe koz sa pozisyon ki ou annan dan ou parti, fas avek sa pozisyon demokratik ki ou'n pran ki Konstitisyon in permet ou resevwar pou *hold the offices*. Sa ki mon pe koz lo la mwan.

Me pour nou kapab egzers sa nivo *fairness*, sa nivo enparsyalite, nou santi poudir i bezwen annan serten fason fer. Ki mon krwar ki i ava benefis sa ki vini demen. I ava benefis bann lezot aspiran politisyen ki kapab vini demen.

E osi i ava osi pwen refleksyon ki 8 enm Lasanble letan i pe vini Mr Speaker, en eleksyon Speaker i a ganny war dan en lot kalite lankadremen. Se sa ki nou, nou pe fer. Nou pe mazin devan. Le fitir.

E si sa i reste parey, i pou kler ki sa rol Speaker i pou ganny touzour en pwen kontansyon dan Lasanble. E la letan mon pe koz lo kontansyon, souvandfwa i annan nou ki'n ganny met deor diferan fason. Mwan mon'n ganny met deor. *Leader* Lopozisyon tanzantan i ganny *ruled out* ouswa i ganny met deor.

MR SPEAKER

Onorab.

HON EGBERT AGLAE

E se sa bann ele...

MR SPEAKER

Onorab. Onorab Woodcock, silvouple no *interruption*.

HON EGBERT AGLAE

Mon krwar si ou anvi koze...

MR SPEAKER

Onorab Aglae kontinyen.

HON EGBERT AGLAE

(...ou lev ou lanmen ou koze.)

MR SPEAKER

Kontinyen Onorab!

HON EGBERT AGLAE

Mr Speaker, letan mon pe dan sa laliny kontansyon, se sa bann sityasyon ki *arise* dan *House* par lafason ou pozisyon e serten desizyon ki ou pran ki anmenn nou in *disrepute* avek in *the minority*. Se sa bann fason.

E si ti annan sa bout enparsyal, la nou ti pou dir; *ok*, Speaker ou desizyon i final aköz ou pouvwar ki ou annan i final. Ou annan pouvwar *absolu* dan Lasanble parey i donn ou anba *Standing Orders*. Me ozordi pa sa ki nou pe vwar.

En lot pwen se proteksyon minorite ki *Standing Orders* ankor i fer resorti. Parfwa Mr Speaker, mwan *Standing Orders* i dir ou desizyon i final. Nou pa kapab kestyonn ou desizyon ki ou pran.

Me selman i fer nou reflexir. I pa anpes nou reflexir. I anpes nou kestyonn ou. Nou reflexir poudir souvandfwa bann abritasyon ki ganny fer i pa neserman protez minorite dan Lasanble. E se sa ki nou, nou lager. Nou kontinyen *fight* pour nou annan nou lavwa kontinyen ganny tande pour nou reste relevans.

Kantite ti swete poudir nou pa ti pou la dan sa Lasanble ozordi. E zot pe prezimen poudir *the next election* pou annan 26 – 0. Sa ki zot pe dir.

Be ankor enn fwa, nou bezwen reflexir. Pour en la demokrasi 26 – 0, ki i vedir pour pep Seselwa? Seselwa i bezwen reflexir lo la. Ki mannyer ou lavwa pou ganny tande si ou pa kontan en keksoz ouswa en desizyon ki pei pe al anver?

E nou, nou war bann diferan lenstans sa arive. I en pwen refleksyon ki nou met la deor akoz ozordi – yer nou fek selebre Lazournen Konstitisyon. Mon pa ti la wi.

(laughter)

HON EGBERT AGLAE

Be pa mwan ki ti dir vot kont Konstitisyon letan ti pe ganny etabli. Be pa mwan ki ti dir. Nou parti ti dir siport sa Konstitisyon! Vot wi!

(APPLAUSE)

HON EGBERT AGLAE

E ki *SNP* ti fer sa letan? Parti Seselwa? *Boycott*. Vot kont. Ozordi zot ki pe koz Konstitisyon labous plen. I enteresan sa. Sanmenm sa ki apel kras anler sa.

Mr Speaker – mon konnen zot pa kontan, be *sorry*. Nou bezwen dir zot. Prezidan Larepiblik 2014, e sa taler *LOTO* in site, i ti fer resorti ki en Speaker pa kapab pe asiste *meeting* son *Caucus* kot zot desid stratezi.

E i ti tradwir sa dan en Kreol senp se ki, refri i pa kapab asiz lo *management team*, en tim kot zot desid stratezi.

Mwan mon kestyon se, eski i ti pe dir sa akoz sa moman letan i pa ti dan Gouvernman? Eski i ti pe dir sa akoz i krwar dan en demokrasi modern, ouswa eski zis i pe dir sa pou bat latet Seselwa dir i pa sipoze koumsa, nou pa bezwen

al ladan. Akoz sa bann letan, zot ti zis *boycott* tou keksoz.

Si sa ki ti ganny dir, ti annan en valer ouswa in antas en valer avek, sa desizyon ki ti ganny pran letan Lasanble Nasyonal premyerman Oktob 2020 ti annan bann sermantasyon, zot pa ti pou met en *leader* parti politik en Speaker.

Si i ti krwar ladan, i montre ou poudir i ti pe zis dir; me ti napa okenn sans dan sa ki i ti pe dir. Nou, nou konnen poudir nou ozordi i annan en lamannman konstitisyonnèl. *The Eleventh Amendment*. Nou napa en mazorite de tyer isi dan sa Lasanble nou.

Si lot kote latab i pa mazin zis ozordi sironstans zot parti e sa mazorite ki zot annan. Si zot mazin ankor dan 15 an, 20 an, 25 an *down the line*, zot ti ava fer li enn zot bann devwar lakonplisman. Anvi ki nou fek selebre nou Lazournen Konstitisyon.

Se pou anmenn sa lamannman fer pase avek nou kot nou kapab enn fwa pour tou anmenn *the highest impartiality*. Anmenn *the highest fairness* dan en lenstitisyon demokratik e nou ava fer Sesel fyer.

E mon krwar tou Seselwa li menm, san eksepsyon ki ou

kouler politik, ki ou larelizyon, ki ou lapo, ki ou desandans, ki ou manman, ki ou papa. ki ou fanmir, ki ou sinyatir, ou satisfè ek en keksoz parey. Akoz nou pe fer sa ki byen pour nou demokrasi e pour Sesel.

Se sa alor Mr Speaker ki mon santi poudir mon napa okenn problem kont Onorab Roger Mancienne. Mon napa okenn problem avek Onorab Gervais Henrie avek sa 2 lofis ki zot pe *hold*.

Mwan mon annan en problem avek pozisyon dan zot parti ki zot annan ki fer ki reflekte *tie in* avek pozisyon ki zot annan dan Lasanble Nasyonal. Depi Speaker ek Depite Speaker.

Se avek sa Mr Speaker ki mwan mon konnen mon pe *stand beside* sa ki Lalwa i permet mwan fer. E osi mon *stand* dan sa ki pli meyer. Fer Sesel vin pli meyer e nou Lasanble Nasyonal vin pli meyer. Mersi.

(APPLAUSE)

MR SPEAKER

Mersi Onorab. Bon, mon annan 3 Manm ki'n lev lanmen. Me mon bezwen konnen lekel ki pou lev lanmen, akoz letan i bezwen ganny aporsyonnen byen. Donk, mon pe demann

bann Manm ki annan lentansyon pran par dan deba pour zot lev zot lanmen konmela silvouple.

Mersi. Tenir silvouple. En pti pe pasyans. Mon annan en kantite Manm. *Ok*. Tre byen. Bon, nou a kontinyen mon pou donn laparol – avek lakantite Manm ki mon annan mon pou donn 10 minit sak Manm pour zot entervansyon. E mon pou donn laparol premye Onorab Spiro akoz i ti'n lev son lanmen boner. Onorab?

HON RACHEL SPIRO

Mersi Mr Speaker. Mr Speaker, nou Konstitisyon 3em Repiblik Sesel i en Konstitisyon modern. I enn ki Seselwa i annan tou rezon pou zot fyer.

Sa Konstitisyon yer menm nou fek selebre son lazournen. Dan nou Konstitisyon i etabli bann drwa e rol sak lenstitisyon dan nou pei. Rol ki Egzekitiv, Zidisyer e Lezislativ i zve dan sa pei.

Nou Konstitisyon i osi etabli ki sa bann lenstitisyon i travay endependaman ek kanmarad e dan tou enparsyalite. Sesel i form parti en kantite groupman lo nivo enternasyonal, tel parey *SADC*, *COMESA*, *Commonwealth* e lezot ankor.

Koman en Parlman, nou osi nou afilye avek en kantite sa bann Parlman lo nivo rezyonal e enternasyonal tel parey *IPU*, *Inter Parliamentary Union*.

Malgre ki dan sak pei pratik i diferan dan lafason ki zot fonksyonnen e menm desarz zot responsabilite, e serten rol i demann serten legzisans dan lafason i ganny fer.

Dan mazorite Parlman, norm i demande ki rol Speaker i enn ki demann *Speaker of the House*, pou enparsyal montre tolerans e evite demontre lapartenans politik. Seselwa zot, zot war nou dan Legzekitiv, zot in toultan pe demann serten kestyon lo rol Speaker e Depite Speaker. Sirtou isi dan sa Lasanble.

Zot enparsyalite kan zot pe desarz zot rol e zot fonksyon, akoz zisteman tou lede rol tradisyonnelman in en rol ki'n ganny deservi par en Manm sorti dan en parti ki dan parti mazoriter.

E sa Mr Speaker i koz en kantite konfizyon e osi dimoun la deor i ziz ki mannyer nou Lasanble i reponn a sa demokrasi modern ki nou pe koz lo la.

Motto sa Lasanble i “*serving a modern democracy*”. Modern i vedir nou bouz devan nou pa reste deryer. Mr

Speaker, klerman sa pa pe ganny pratike isi dan sa Lasanble. E sa fason ki bann Manm i ganny gete isi e lafason ou dirize dan sa Lasanble i montre ki ou pa pe montre enparsyalite dan sa fonksyon dan sa rol.

Manm pa pe ganny sans deservi zot rol dan sa Lasanble. Swa Speaker i *limit* lafason lakantite letan ki nou koze. Serten fwa, menm vin otoriter dan lafason ki ou adres nou. Oubyen zis koup mikro en sel kou dan nou figur. Oubyen zwe pa rekonnèt si nou'n met lanmen anler.

Mr Speaker, sa si ou war bann Manm i proteste e *walk out*, se dan lafason ki anndan la dan lakaz i ganny *managed*. Depite Speaker li i pas son letan zis *paraphrase* tou keksoz ki ganny dir dan sa Lasanble. I repete pour nou. I re aranze pour nou.

Sa *Bill* ki la devan nou pe demande ki sa rol Speaker e Depite Speaker i en rol ki devret enn, ki sa Manm i pa annan okenn responsabilite kle dan son parti politik. Akoz la sa ki nou, nou pe war se Speaker li menm i Prezidan son parti e Depite i Sekreter Zeneral son parti.

Definitivman napa
separasyon pouvwar e

separasyon zot rol. Lavenir Lasanble le fitir i depan lo nou dan sa lasal ozordi. Si nou ozordi nou deside war en lavenir pli briyan e ki bann zenn i ganny konfyans dan sa Lasanble. I enportan ki ozordi nou fer bann desizyon brav.

Si nou, nou menm nou konman Manm nou vreman krwar dan en Lasanble ki transparan, nou a donn sipor sa *Private Members' Bill* e vot lo la ozordi.

Si nou, nou pe bouz dan sa nouvo demokrasi, i enportan ki sa rol Speaker i en rol non partizan. E nou enn fwa pour tou nou a bouz lo en lot nivo, e ki sa rol i vin pli transparan e endepandan avek en parti politik.

Mr Speaker, a sa moman la, nou ki dan minoriter nou vreman minim ler pou vot lo sa *Bill*. Alors i enportan ki nou bann koleg lo lot kote latab i koz - i pratik sa ki zot koze.

E zot montre par vot lo sa *Bill* e nou ava fer lamannman dan nou Konstitisyon ki sa 2 sit, Speaker ek Depite Speaker i ganny separe avek politik. Mersi.

(APPLAUSE)

MR SPEAKER

Mersi Onorab. Bon, mon remarke ki aksyon e desizyon Speaker e Depite Speaker in antre dan deba. E i pa mon rol pour mwan ekrit *speech* tou dimoun. Me mon ankor envit bann Manm pou konsantre lo prensip e pa lo endividi. Mersi. Mon a donn laparol Onorab John Hoareau.

HON JOHN HOAREAU

Mersi Mr Speaker. Mr Speaker, si mon ti kapab donn en doktora, en *award* konman en doktora, mon ti ava donn *Leader* parti minoriter pour Desepsyon. Ozordi, nou'n tann en gran *speech* baze lo enparsyalite, baze lo *removing political hold*, ensidswit.

Me eski sa menm Onorab in asize in fer en refleksyon profon lo sa ki li menm in dir? Oubyen, zis parey granmoun i dir; nou'n vwar en dimoun ki koze parey kato *Nosy Be*. Me son labous i ouver plis ki son lespri li menm. Mr Speaker...

MR SPEAKER

Onorab, annou – annou gard en pe respe silvouple. Mersi.

HON JOHN HOAREAU

I pa'n respe ou li Mr Speaker. Mr Speaker, eski ler nou pou anmenn sa lamannman ki Onorab in anmennen, eski nou

pou retir enparsyalite dan sa 2 lofis? Kestyon fondamantal.

À *mon avis*, mon pa war i fer sans parske si sa Manm ki vin Speaker i en Manm parti politik, i kapab fer otan e menm plis montre lapartenans dan sa lofis.

E nou'n vwar dan lepase Mr Speaker. Nou'n vwar dan lepase kot ler Onorab Herminie ti Speaker Lasanble, ki mannyer i ti azir. Mon pou al lo la en pti pe apre. Me selman mon pou komans par fer referans si ou le, avek en dokiman ki *Leader* Lopozisyon in fer referans avek bomaten.

Leader Lopozisyon oubyen *Leader* minoriter parey nou apel li, in fer referans avek en rapor ki ti ganny fer an 2008. Me sa rapor li menm ti ganny prodwi an 2009. Sa bann dimoun – sa *Constitutional Review Committee* ti asiz an 2008.

Swivan sa nou'n war en lamannman ki ti vin a laporte Lasanble. Ti *the 6th amendment* ki ti koz lo letablisman *Electoral Commission*.

In annan plizyer lamannman osi avek Konstitisyon. Me zanmen in deza annan en lamannman ki target 2 dimoun. Zanmen in annan en lamannman ki'n ganny anmennen dan sa Lasanble zis aköz 2 dimoun i

met lord avek zot ler zot fer malelve dan Lasanble.

(Interruption)

HON JOHN HOAREAU

Mr Speaker, rekomandasyon ki sa dokiman ki avek mwan *Constitutional Review Committee* ti fer ki ti baze lo 2 keksoz ler nou pe get lartik 83.

I ti baze enn lo pansyon ki dir ki; pansyon, anvi ki i annan en Lalwa ki apel *National Assembly Members' Emoluments Act* ki koz lo pansyon e bann lezot reminerasyon pour sa 2 lofis. Alor i ti dir ki i enportan ki sa osi i ganny mete dan Konstitisyon pou *validate* sa Lalwa. Sa *existing law*.

Aprè osi, i ti koz lo ki arive ler Speaker i *resign*. Napa okenn lenstans dan sa rapor ki'n fer rekomandasyon pour ki Lofis Speaker e Deputy Speaker i vin 2 lofis ki ganny separe avek zot pozisyon dan zot parti respektif.

Mr Speaker, zis pou fer remarke, in annan deba, wi. In annan mansyon dan diskisyon lo kote enparsyalite dan Lofis Speaker. Me selman, ti annan bann lezot Manm. E mon repete dan sa dernyen paragraf ki dir;

"Some members were of the view that it should be made

a constitutional requirement that the Speaker does not participate in political activities. Other members were of the opinion that there was no necessity for any statutory obligations" - vedir i pa mete dan Lalwa.

" To this effect but that over the years this would become an accepted practice and tradition." I vedir ti napa okenn rekomandasyon ki ti'n ganny fer lo sa nivo.

Parey mon'n dir, eski si nou pou demann Speaker pou *resign* konman *party leader* e osi Deputy Speaker pou *resign* konman Sekreter Zeneral, eski sa pou garanti enparsyalite sa lofis? Parey mon'n dir, zanmen.

E nou'n vwar ler Dokter Herminie ti vin Speaker, ki menm si i ti *resign* konman *CC Member*, me i pa ti pran *un instant* pour li anmenn parti politik *SPPF* dan Lasanble konman Speaker.

Mr Herminie ti toultan *flex* son lebra e sa mo *"out, out, out!"* ti en mo ki nou ti tann souvan dan Lasanble koman bann – bann...

(Interruption)

HON JOHN HOAREAU

...koman bann dimoun dan sa lepok ki ti dan Lopozisyon ti pe sey koze, ti pe sey dir laverite.

Mr Speaker, en boug ki annan en det lo li – ki annan en det lo li. E ler i ti Speaker, i ti fer sir ki sa dimoun ki i ti annan det avek i ti bezwen pran bato La Digue...

MR SPEAKER

Onorab. Onorab! Sa ka...

(Interruption)

MR SPEAKER

Order please! Order! Onorab, bann alegasyon – Onorab i kapab fer referans avek keksoz ki'n arive dan Lasanble. Be bann alegasyon ki en dimoun i fer an deor pa kapab annan par dan deba. Mersi. Mersi! Onorab, kontinyen.

HON JOHN HOAREAU

Ok, mon a kontinyen.

(Interruption)

MR SPEAKER

Kontinyen.

HON JOHN HOAREAU

Mr Speaker, nou tou nou'n vwar koman ki karakter sa msye ti annan ler i ti dan Lasanble. Nou'n vwar poudir i ti servi son lotorite e i ti fer sir ki Lasanble ti annan en lasanm pour li.

(Interruption)

HON JOHN HOAREAU

Ti fer sir – i ti fer sir ki sa ki pa ti vin dan sa lasanm ti ganny...

(Interruption)

MR SPEAKER

Order!

(Interruption)

MR SPEAKER

Order! Order! Onorab, mon pou demann ou *retract* ou dernyen *statement*.

HON JOHN HOAREAU

Ok, mon a kontinyen Mr Speaker.

MR SPEAKER

E mon pe demann tou Manm evite fer bann keksoz – refer avek bann keksoz ki pa annan referans avek size ki lo deba.

HON JOHN HOAREAU

Ok, mon a refer keksoz ki annan referans avek nou size deba. Mr Speaker, ler sa msye ti dan Lasanble *ok*, Kontra Sekirite ek Kontra *Maintenance* ki i ti donn avek bann dimoun ki apre nou konnen ki ti annan en loder koripsyon ki ti arive avek. Mr Speaker...

(Interruption)

MR SPEAKER

Onorab! Order. Order! Nou pe fer referans avek rol Speaker ek Deputy Speaker dan...

(Interruption)

MR SPEAKER

...dan Lasanble. Bann size ki nou pa kapab verifye, ki al lo lakizasyon personnel, nou pa kapab fer. E sa pou aplik lo tou lede kote. Sa pou aplik lo tou lede kote. Onorab, Hoareau, mon pe dir ou en dernyen fwa pou evit sa bann komanter koumsa.

HON JOHN HOAREAU

*Ok Mr Speaker. Mr Speaker, malerezman mon pa kapab siport en tel lamannman, akoz ozordi ler mon pe get nou Lasanble ki mannyer nou fonksyonnen, mon krwar par presedans in touzour annan *Speakers* ki'n annan afilyasyon politik e osi ki'n tenir bann rol Egzekitiv dan zot parti.*

*Parey sa *Constitutional Review Committee* i dir; napa nesesite pour nou al *legislate* sa. Menm si ou pou *legislate* sa, ki garanti ou pou annan ki sa dimoun pou vin en dimoun enparsyal?*

Si Onorab ti'n anmenn en propozisyon devan, kot i ti'n demande ki petet en *retired Judge* oubyen en dimoun ki'n annan en responsabilite konman en *Atorni General*, oubyen en o Lotorite dan pei ki pa afilye li avek okenn parti politik, ti vin konman en Speaker, *Then* petet mon ti ava donn li mon sipor.

Me lafason ki son lamannman in ganny prezante se ki, ler ti zot parti ki ti o pouvwar, ti normal fer tou sa ki zot anvi. Ozordi ler en lot i vini, i pa normal pour zot.

MR SPEAKER

10 minit Onorab.

HON JOHN HOAREAU

*Mr Speaker, Onorab in koz en pe lo *freedom of speech*. I dir ki dan Lasanble i napa *freedom of speech*. Me selman Onorab i dir sa ki i anvi. I la dan Lasanble. I pa mank okenn loportinite pour li say konversasyon, pour li say topik e enplik nenport ki dimoun, enplik nenport ki keksoz. Fer okenn ensinyasyon dan Lasanble.*

Mr Speaker, mon pa krwar mon pa pou donn li. Me mon konnen, mon konvenki ki tou dimoun osi lo sa kote latap pa pou donn li okenn sipor pour sa lamannman ki'n anmennen,

akoz son lamannman pa rezonnab. Mersi.

(APPLAUSE)

MR SPEAKER

Bon, Lasanble i a pran poz la e nou a rebran 2 er. Mersi.

(BREAK)

MR SPEAKER

Bonn apre midi tou dimoun e tou ki pe swiv nou. Nou a rebran lo deba. Onorab Georges, ou ti'n lev ou lanmen dan konmansman mon krwar. Mon mazine ou ti anvi adres en pe boner. Mon a donn ou laparol la?

HON BERNARD GEORGES

Yes, avek ou permisyon Mr Speaker. Mersi bokou. Bonn apre midi Mr Speaker. Bonn apre midi tou nou bann koleg Onorab. E bonn apre midi tou bann dimoun ki pe swiv nou apre midi.

Mr Speaker, ou'n dir ki nou pou annan 10 minit pou koze. Mon ava sey fer otan ki posib pour mwan kapab dir sa ki mon annan pou dir dan sa letan.

Me si mon al en pti pe pli an deor, mon ava demann ou lendilzans antan ki *Leader* parti mazoriter dan Lasanble. Me

mon a sey fer mon fason pour mwan reste dan ou konsiny letan.

Mr Speaker, premye keksoz mon anvi dir apre midi se avek *Leader* Lopoziyon ki'n konmans son pledwari mon kapab dir, bomaten, avek en not se ki sa *Bill* pe ganny anmennen par *Caucus United Seychelles*.

In dir sa klerman o konmansman. I dir sa se en lamannman ki *Caucus* in pe anmennen. Mon pa krwar sa i toutafe normal. I kapab ki se *Caucus* ki anvi sa lamannman. E i kapab ki se *Caucus US* ki'n dir li anmenn sa lamannman.

Me sa lamannman i dan son non. Se li *Private Member* ki'n anmenn sa *Bill*. E mon krwar nou bezwen fer sa kler. Akoz se li ki bezwen pran responsabilite si sa *Bill* i reisi oubyen si sa *Bill* i *fail*. I pa kapab met sa lo son *Caucus* akoz sa *Bill* i lo son non.

Mr Speaker, e mon dir sa o konmansman, akoz ankor enn fwa nou vwar ki sa *Bill* ozordi i sorti direkteman dan *playbook United Seychelles*.

E zot *playbook* parey nou vwar semenn apre semenn dan sa Lasanble, se *cook up* en konplent ki pa egziste. Rod en problem ki pa egziste e fer li dan zot parol egziste, pour zot

kapab fer politik lo la. E sa set egzakteman sa ki nou'n war atraver sa *Bill* la apre midi.

E i fer dezyenm fwa ki nou war li ozordi. Bomaten menm zafer. En *Private Notice Question*, en *PNQ* ki pe demann Minis en keksoz ki lo *notice board* kot *STC*.

Tou sa ki – tou sa ki Onorab *Leader* Lopozisyon ti pe rode avek Minis Hasaan bomaten, si i ti'n al *STC* i ti'n get lo *notice board* i ti an vwar. Tou dimoun i konnen. Partou lo rezo sosyal nou tou nou'n aprann. *STC* ti dir nou pe pey sa *bonus* an Zilyet.

Alor ou vwar Mr Speaker, i fer – i pran en keksoz, i fer li vin en konplent, pour li kapab prezan anmenn devan e dir; La, la. Mwan ki pe defann zot zentere. E nou bezwen regard sa *Private Members' Bill*, sa *PMB* dan sa loptik.

Mr Speaker, nou bezwen fer en keksoz kler. Tou sa ki Onorab *Leader* Lopozisyon in dir bomaten lo Speaker ek lo Deputy Speaker, i mank – i mank en keksoz enportan ki o sant sa deba. E sa i pa'n apros li ditou. E sa se ki Speaker ek Deputy Speaker i bezwen *fair*, zis e endepandan dan zot lapros.

I napa naryen pou fer avek sa 2 dimoun. I napa naryen pou

fer avek kot zot sorti. I napa naryen pou fer avek okenn lezot fonksyon ki zot kapab annan. Sel keksoz ki zot bezwen fer se *be fair*.

E mon pa – mon pa vwar Mr Speaker, avek tou lonnekte, pa akoz ou sorti dan mon parti e mwan mon sorti dan sa ki pour ou, ki nou annan en Speaker ki pli *fair* ki ou, depi tou sa letan ki mon pe travay dan sa Lasanble.

(APPLAUSE)

HON BERNARD GEORGES

Ou vwar Mr Speaker, i pa lefet ki en dimoun i en *Leader* en parti ki fer li *fair* oubyen ki fer li pa *fair*. I pa lefet ki en dimoun i pa en party *Leader* ki pou fer li *fair* oubyen i pa *fair*.

Se lafason ki sa dimoun i konport li e i diriz li. E lafason ki sa dimoun i konporte e i diriz sa lenstitisyon ki i pe dirize. Napa naryen Mr Speaker, ki mal avek lefet ki en Speaker i kapab en *party Leader*.

Akoz fodre nou realize e fodre zanmen nou bliye, ki sa Lasanble set en Lasanble politik e ki Speaker i ganny elekte par politisyen. Speaker li menm li i en Manm sa Lasanble.

Speaker li menm li, Deputy Speaker zot 2 Manm Lasanble. Zot 2 politisyen. Zot

in ganny elekte swa direktteman parey Deputy Speaker. Swa proporsyonnelman parey Speaker. Zot 2 politisyen.

E si – si zot politisyen e zot politisyen ki sorti dan sa parti mazoriter, zot pa bezwen al dan zot parti politik si zot anvi *fair or unfair*. Zot kapab fer li aköz zot sorti dan parti mazoriter dan Lasanble. E se sa en keksoz ki fodre pa nou bliye.

Si ou anvi ou Mr Speaker demen, si ou anvi demen favoriz mazorite. Tou sa ki ou bezwen fer se favoriz mazorite. Ou pa bezwen fer li aköz ou en party *Leader* mazorite. Ou fer li aköz mazorite dan Lasanble i mazorite ou parti. Ki ou ti *party Leader*, ki ou pa ti *party Leader*, *nothing would change*. Set egzakteman parey sa i ti pou ete.

E si dizon demen ou sorti konman *party Leader*, me ou fer menm desizyon ki Lopozisyon pa pou kontan. Ki zot pou dir? Kot zot pou al rod lazistis? Zot pa pou kapab dir ou ou'n fer li aköz ou *party leader*. Ki zot pou dir ou? Zot pou dir ou ou'n fer li aköz ou sorti dan parti mazoriter.

E se sa Mr Speaker ki fodre zot konpran. Aköz zot pandan tou sa letan ki zot in dan sa Lasanble, ziska 2016. Se zot ki ti parti mazoriter. Se zot

ki ti *run border*. Se zot ki ti donn lord lezot dimoun.

E la mon ava profit sa lokazyon pou dir; ler Speaker Herminie ti vin Speaker, i ti ganny *swear in* 9 er bomaten. Mwan Bernard Georges sa bon boug ki mon ete. Sa bon garson. Sa garson *respectueux* ki mon ete...

(laughter)

HON BERNARD GEORGES

...premye Manm pou ganny pouse dan Lasanble mwan menm, pran par Speaker Herminie. Premye boug 2 er apre midi dan premye zour mwan ki'n ganny met deor.

E annou pa bliye ki se anba Speaker Herminie ki Onorab Ferrari in bezwen demisyonnen e al fer en *by-election* Mont Fleuri, ki'n anmenn nou sanz landrwa apre pou anpes sa arive.

E annou osi pa bliye Mr Speaker, sirtou ki le 3 Oktob 2006 ler *Leader* Lopozisyon ozordi ki i Prezidan Ramkalawan avek Onorab Ferrari ki ozordi i *Designated Minister*, e plizyer personn ankor ti ganny bate e ganny kas latet devan Lasanble, Ni Speaker, ni Deputy Speaker pa ti lev en ledwa pou vin ed zot !

(APPLAUSE)

HON BERNARD GEORGES

Pandan ki zot ti pe bennyen dan zot disan anba, Lasanble ti pe kontinyen anler konmsi *rien été*. E ler zot in sorti lopital e zot in retourn Lasanble, ni Speaker, ni Deputy Speaker pa'n lev en ledwa pou dir; *sorry*, eski zot byen, eksetera. Se konmsi sa keksoz pa'n arive.

E si Onorab Ramkalawan sa lepok, ki Prezidan ozordi in dir; ou pa kapab ou menm ou refri, ou menm ou zwer, ou menm ou asiz lo ban. Set egzaktaman sa. Se sa ki'n anmenn li dir sa Mr Speaker.

Akoz nou, nou konnen ki savedir viv anba en *Speakership* avek en Deputy *Speakership* ki pa *fair*. E sa mon ava dir zot mon bann zanmi, se pa sa enn ki nou annan la ozordi.

Alor Mr Speaker, sa Lasanble parey mon'n dir i en lenstitisyon politik e politik pou ganny fer isi. Sa ki mon pa konpran avek *Bill* ki esey sanz Konstitisyon ozordi, se sa kestryon swivan;

Onorab Lopoziyon i dir ki Speaker ki ansarz en lenstitisyon pa kapab annan en rol politik. I bezwen divors son lekor avek en rol politik. I pa kapab *Leader* en parti.

Sa ki i pa dir nou se ki Prezidan Larepiblik ki *Leader* Sesel an antye, pa zis en brans Gouvernman, li i kapab vin en *party Leader*. E annefe, Mr Rene ek Mr Michel tou lede ti *Leader* zot parti ler zot ti anler *State House*.

Alor, en Prezidan li i kapab *Leader* en parti, malgre ki li i sipoze zet en regar lo tou pei an antye. Bann ki'n vot pour li e bann ki pa'n vot pour li. Li i kapab. Me Speaker dan en Lasanble politik ki sorti dan en parti politik ki en Manm en parti politik, li i pa kapab vin en *party Leader* !

Ou pa vwar Mr Speaker ki i annan en problem dan lafason ki sa *Bill* in gannyen anmenn la ozordi? E lekel ki'n anmenn politik dan Konstitisyon? Nou?

Nou pa ti'n fer – nou pa ti fer Konstitisyon nou. Zot ki ti annan mazoriter dan Komisyon Konstitisyonnel. Parti *SPPF* ki ti mazoriter pou fer Konstitisyon pase.

Lekel ki ti fer en *CAA* ki sa 2 *Leader* politik i apwente? Lekel Mr Speaker ki ti met politik dan Lasanble? Lekel ki ti fer ki *Leader* Lopoziyon pou asiz dan Lasanble Nasyonal? Pa nou ki ti fer sa. Zot ki ti fer.

Alor si zot, zot in kontan met politik dan Lasanble, pa

vini ozordi ler nou, nou servi zot Konstitisyon pou dir; ah, en sel kou tou keksoz pa byen. Mr Speaker, annou dir keksoz mannyer zot ete.

Sa *Leader* Lopoziyon ozordi napa en problemm avek Konstitisyon. I annan en problemm avek ou e avek Onorab Henrie. Annou dir li kler!

(APPLAUSE)

HON BERNARD GEORGES

E sa nou'n war li semenn apre semenn sak fwa ki i annan en lobzeksyon. I pa pou en lobzeksyon akoz en desizyon ki ou'n fer koman Speaker.

I dir ou kler dan sa Lasanble e Onorab Henrie parey. I dir zot, zot in fer sa akoz ou, ou *Leader* en parti politik. E li i Sekreter Zeneral en parti politik. Alor annou pa anbet nou Mr Speaker e fer krwar ki lalin i lesyel - lalin i soley e soley i lalin.

Sa sityasyon ozordi Mr Speaker i en *one-off*. I en *one-off* pour bann rezon ki nou tou nou konnen. Premye tranzisyon ki'n arive atraver bwat vote in arive akoz ou konman *Leader LDS* ou'n anmenn pli gran mazorite dan listwar Sesel!

(APPLAUSE)

HON BERNARD GEORGES

E si ou Speaker ozordi apre sa laviktwar ki ou'n anmennen – get sa tim. Get sa tim ki deryer mwan la Mr Speaker.

Si ou'n fer sa, mwan mon dir *well done*, ou *deserve* vin Speaker e reste Speaker pour otan lontan ki ou anvi !

(APPLAUSE)

HON BERNARD GEORGES

Mon dir i en *one-off* Mr Speaker, akoz pour Onorab Pillay osi i en *one-off*. Akoz nou annan pour premye fwa dan nou lavi en *Leader* Lopoziyon ki dan Lasanble Nasyonal, me ki pa *Leader* en parti politik.

Annefe, *Leader* son parti politik pa *Leader* Lopoziyon. *Leader* pli gran parti dan Lopoziyon pa *Leader* Lopoziyon. Eski sa pa trakas zot? Eski sa i *ok* anba Konstitisyon?

Ou war Mr Speaker. La, la problemm. Zot annan en Konstitisyon me zot get zis en bout. Zot pa gete ler i afekte zot. Non, pour zot i *ok*. Me ler i al kont zot. Ah, la fodre nou sanz Konstitisyon. Anmenn en *Private Members' Bill* pou sanze.

Alor mon ava demann detrwa kestyon. Premye kestyon; Zot ki'n drafte

Konstitisyon. Si sa ki zot pe fer la ozordi i telman byen, akoz zot pa'n met li dan Konstitisyon ler zot in drafte li?

(APPLAUSE)

HON BERNARD GEORGES

Akoz zot pa'n met li dan sa 9 lamannman ki zot in anmennen pour sa Konstitisyon lo en peryod 20 an? Akoz zot esper ozordi pour zot anmenn sa?

Dezyenm kestyon; Akoz – akoz ki zot in pran letan pou anmenn sa lamannman ozordi? E akoz zot in *frame* sa lamannman dan lafason ki zot in fer li?

Akoz Mr Speaker, zot pa'n anmenn en lamannman pou dir annou fer Speaker sorti an deor Lasanble, olye zis target ou avek Onorab Henrie akoz sa ki zot ete ozordi? Akoz lamannman pa dir annou fer ki Speaker i sorti an deor Lasanble?

Parey Konstitisyon '76, Konstitisyon Lendepandans ti fer. Parey nou parti Seselwa nou ti demande dan Komisyon Konstitisyonnel ki zot pa'n aksepte. Parey mwan personnelman mon'n demande pandan plizyer letan.

Akoz zot pa'n fer li Mr Speaker? Akoz sa pa ti bon pour

zot, i pa ti dan zot lavantaz. Se pour sa rezon ki zot in fer sa.

E ou konnen Mr Speaker, sak lamannman ki *SPPF*, Parti Lepep ek *US* in anmennen dan sa Lasanble – sak lamannman Konstitisyon ki zot in fer, set en lamannman ki donn zot en lavantaz.

Mon a fer zot rapel, premye lamannman ki zot in anmennen se redwir lakantite Manm proporsyonnel ki annan. Akoz? Akoz *UO* ti pe konmans ganny vote e ganny Manm pou vin dan Lasanble. Alors zot pa ti anvi. Zot ti anvi *limit* Lopozisyon. Zot in redwir lakantite Manm proporsyonnel.

Dezyenmman, pas baton. Akoz zot in fer li? Akoz i ti bon pour zot. Zot ti anvi kapab pas baton olye al dan eleksyon.

E trwazyenmman, zot ti anvi fer ki eleksyon ou kapab fer li a nenport ki moman. Ou pa pou bezwen esper 5 an. Sa ki nou apel *early election*. Eleksyon boner. Zot ki'n fer li, akoz? Akoz sa ti dan zot lavantaz.

Sak fwa i annan en keksoz ki dan zot lavantaz, napa problem. Zot fer li pase. Lemoman ki i annan enn ki zot krwar pa donn zot en lavantaz. Zot konplent.

E les mwan dir ou Mr Speaker. Les mwan dir avek

Onorab Pillay ozordi. Onorab Pillay pa kontan ou akoz ou, ou endepandan. I pa kontan akoz ou pa endepandan.

I pa kontan ou akoz li ler i kas *Standing Orders* ki i fer sak fwa ki nou annan en *Sitting* dan sa Lasanble, ou met lord avek li. Se sa rezon ki i pa anvi ou!

(APPLAUSE)

HON BERNARD GEORGES

Trwazyenm kestyon; Akoz ki zot pa'n aksepte – e sa Mr Speaker mon pran li personnelman. Se pour sa rezon ki mon pran mon letan pou demann sa kestyon.

Akoz ki zot zanmen in aksepte oubyen akoz zot lamannman ozordi pa demann en keksoz senp?

Akoz olye al sey tir ou avek Onorab Henrie dan zot pos politik, akoz zot pa'n anmenn en lamannman parey mwan mon'n demande plizyer fwa e parey mwan mon'n demande ler mon ti lo *Standing Orders Committee* pou dir ki;

Si Speaker i sorti dan parti mazoriter, annou fer Deputy Speaker sorti dan parti minoriter. Akoz zot pa'n anmenn sa lamannman ozordi ki ti a ava en pli bon lamannman ki sa enn ki zot pe sey anmennen?

Akoz i ti ava montre ki i ti ava kapab annan en balans dan Lasanble. Ou vwar Mr Speaker? Sel rezon zot pa fer sa se akoz zot pa enterese balans keksoz zot. Zot enterese avek pran lavantaz zis pour zot.

Onorab Pillay bomaten in dir ki depi an 2008, Komisyon Konstitisyonnèl - Komisyon Revizyon Konstitisyon ki mwan mon ti en Manm lo la ti'n fer serten propozisyon e lir serten propozisyon. Me i pa'n lir tou parey Onorab Hoareau in eksplike bomaten. In kit en bout deor.

Si sa bann lamannman ti telman bon, akoz zot pa'n fer naryen depi 2008 ziska 2016 ler zot ti o pouvwar?

Akoz zot pa'n anmenn sa bann lamannman? Akoz zot in asiz lo la e rod ozordi an 2024 pou anmenn sa bann lamannman?

Ou vwar Mr Speaker, an konklizyon, dernyen dimoun pou vin koz lo Konstitisyon avek lo *fairness*, se parti US ek Onorab Pillay. E mon a dir zot akoz Mr Speaker. Akoz sa se sa bann dimoun ki'n fer koudeta dan sa pei e ki ti pran en bon Konstitisyon ki ti zet dan *bin!*

Dernyen dimoun pou vin koz lo Konstitisyon ozordi se parti US. Akoz yer ler nou ti pe selebre Lazournen

Konstitisyon, non selman zot pa ti vini, me ni en mesaz lo televizyon zot pa'n anvoye pour Lepep Seselwa!

Prezan ozordi zot pou vin koz lo Konstitisyon? Prezan ozordi ki zot vin koz lo Konstitisyon? Mr Speaker sa senpleman en politik bonmarse egzakteman parey sa Onorab i fer tou le semenn.

Alor Mr Speaker, pour mwan fini, pour mwan terminen mon anvi dir 2 keksoz.

Onorab Pillay, eskiz mwan, me ou lamannman avek Konstitisyon apre midi pa pou pase. E ou Mr Speaker, mon anvi dir ou; ou, ou ava decide ler ou, ou anvi si ou, ou anvi sorti konman *party Leader LDS*.

Ou ki pou decide si ou, ou anvi oubyen si ou, ou pou kapab sorti konman Speaker sa Lasanble. Ou pa pou pran lord avek okenn dimoun ki sorti dan Lopozisyon.

(APPLAUSE)

HON BERNARD GEORGES

Akoz nou lo sa kote latab, nou pou fer sir ki nou siport ou e ki nou protez ou kont okenn kalonmni ou lofis e ou personn. Mersi Mr Speaker.

(APPLAUSE)

MR SPEAKER

Mersi Onorab. Mon a donn laparol Onorab Vidot.

HON AUDREY VIDOT

Mersi Mr Speaker. Bonn apre midi tou dimoun ki a lekout, e bonn apre midi spesyal pou bann dimoun Roche Caiman.

Mr Speaker, konman en Manm Lasanble konman en madanm, mon dezapwente avek serten komanter ki enn mon koleg atraver ou Onorab, John Hoareau in fer re sorti.

Pou mwan ler mon'n tann lo mansyonn lili dan Lasanble Nasyonal - Dan lasanm *I mean sorry* lasanm, mon santi poudir nou bann madanm ki'n travay Lasanble zot lentegrite pa pe ganny respekte. E mon ti ava swete bann tel komanter parey i ganny evite.

Mr Speaker, parey tou Seselwa mwan avek mon bann koleg nou'n byen selebre nou Lazournen Konstitisyon akoz pou nou, nou Konstitisyon i annan son lenportans.

Me nou'n fer sir ki nou pa'n fer, nou pa'n selebre li parmi bann ki nou konnen ti vot kont Konstitisyon an 1993...

(APPLAUSE)

HON AUDREY VIDOT

Oubyen kon tradwir tou sans ki i ganyen sak fwa ki i ganny politik lo Konstitisyon.

Mr Speaker, sa loportinite pou piblik swiv sesyon Lasanble e travay Lasanble ozordi an direk, pep Seselwa i kapab fer zot prop lopinyon si vreman nou Lasanble pe servi en demokrasi modern.

Annou pa bliye ki piblik pe vwar kot dirizan Lopoziyon Onorab, Sebastien Pillay ozordi, pa pe ganny menm privez parey nou ansyen koleg Onorab, Wavel Ramkalawan ler i ti dirizan Lopoziyon dan 6 enm Lasanble.

Sa kantite letan ki sesyon kestyon *PNQ* e Kestyon Notis ti ganny anmennen dan Lasanble sa lepok ti ale pou en zournen ozordi *PNQ* pres pou ganny 10 a 15 minit.

Limit kestyon ki ganny pran dan sesyon Bidze pou Manm kapab depouy byen bidze, koz pou zot distrik, nou'n vwar pou nou menm kantite kestyon in ganny limite.

Mr Speaker, permet mon ilistre ankor bann egzanp akoz sa 11enm lamannman konstitisyon i annan son merit, 9 er 17 bomaten le 28 Mars 2023 Speaker ti revize les Onorab, Sebastien Pillay, Onorab, Wallace Cosgrow avek

mwan menm Onorab, Audrey Vidot.

Lev en *point of order* ki parey nou dwa anba konstitisyon anba nou *Standing Order* konman Manm Lasanble, me nou note ki ti responsabilite Speaker pou ekout nou bann *point of orders* apre pou li fer son *ruling* parey i merit fer.

E ler sa bann tel aksyon i arive souvan fwa par Manm minoriter avek en Speaker, ki dirizan son parti politik dan parti mazoriter, i ganny konsidere konman en bon pratik servi en demokrasi modern.

E si mon pe konpran byen atraver ou Mr Speaker, Onorab John Hoareau se sa ki i pe dir, pe met lord avek bann Manm dan Lopoziyon.

Merkredi le 22 Mars 2023 atraver ou Mr Speaker, Onorab Gervais Henrie ki osi Depite Speaker e osi Sekreter Zeneral son parti politik *LDS*.

I fer komanter *off-mic* e son Mardi le 28 Mars 2023 Speaker ki dirizan son parti *LDS* i donn en *ruling* ki Onorab, Henrie pa'n fer okenn komanter ki pa akseptab.

Selman in deza annan lenstans kot Manm *US* ti ganny akize pou fer serten komanter *off-mic* ki pa apropiye menm ni menm *name and shame* e

menm donn loportinite pou en Manm vin temwen e sa Manm ti ganny met deor.

Ankor se sa atraver ou Mr Speaker, ki mon pe konpran Onorab, John Hoareau pe dir Speaker pe met lord avek parti Lopoziyon .

Mr Speaker, in annan lenstans dan sesyon Lasanble kot mwan ek mon bann koleg, mon nonm mon koleg Onorab, Conrad Gabriel atraver ou, nou'n lev lanmenm pour nou ganny sans pour nou koze, pou nou kapab partisip dan kestyon.

Speaker in rekonnèt nou, me si zot le mon donn legzanp sa in arive le 28 Mars 2023, 11 Zilyet 2023 e menm bomaten dan sesyon kestyon par Onorab Richard Labrosse.

Mon lev mon lanmen ankor Onorab Gabriel in lev lanmen apre mwan me loportinite i ganny favorize pour ganny donnen.

Alor se sa, ki zot pe apel met lord avek parti minorite. Si sa fason ki nou Lasanble pe pratik servi en demokrasi modern pa bon ditou. Les mwan nou annan ankor legzanp.

Le 11 Avril 2023, 2 Manm LDS lo lot kote latab ki souvan fwa zot deranz sesyon Lasanble koz for *off-mic* zanmen zot in

deza ganny met deor atraver Speaker.

Par kont, mwan lo sa kote latab avek serten mon bann koleg nou'n pas dan tretman diferan zis mon pou donn en legzanp.

Menm mon koleg a kote mon Onorab Gabriel dan en *PNQ* ki ti pe demann sans pou li koze i pa ti ganny sans e ler i ti lev son konsern i ti ganny met deor, menm pres pou ganny eskorte.

Ankor, eski sa atraver ou Mr Speaker, ki mon koleg Onorab John Hoareau pe dir Speaker pe met lord avek nou dan Lopoziyon?

Mr Speaker, i dir ki son *ruling* i final nou napa problemm avek sa, nou respekte me ler *ruling* Speaker i lo en *matter of privilege* ki mwan Onorab, Audrey Vidot i prezante le 4 Out 2023, Speaker i otoriz e permet en alegasyon ganny fer par en Manm *US*, e i anpes sa Manm lev en *matter of privilege* lo *Floor* ki'n ganny leve i ganny koupe son mikro, eski sa nou pe dir ki Speaker pe met lord avek parti lopoziyon nou note nou.

Dan tou sa bann legzanp ki mon'n site i kler ki komanter fer par mon koleg Onorab John Hoareau atraver ou Mr Speaker, sa lanmann ozordi sa

11 enm lanmann i annan son merit.

I annan son zistifikasyon, aköz nou, nou le fer resorti ki 2025 si ozordi la nou pe ganny dir ki pa pou pase sa lanmann. Si 2025 si sa Manm ki'n dir li premye in dir pou zet anba sa lanmann si li, si i ganny en plas, si i ganny en plas lo sa kote latab ki la la - 2025 nou retourn; *US* ki pou an mazorite 2025 en?

Si ler i anmenn sa lamannman i pou zet ankor ouswa li ki pou donn nou lanmen pou siporte dir nou?

(APPLAUSE)

HON AUDREY VIDOT

Mr Speaker, atraver sa lamannman nou, nou pe demande ki okenn endividi, okenn endividi. E la mon pe koz pou osi sa bann parti Lopoziyon ki deor ki zot osi 2025 pe vin rod en plas pou vin reprezant Lepep Seselwa.

Si en endividi ki pran en responsabilite pou sa lofis koman Speaker oubyen Depite Speaker pou li kapab egzers sa rol byen i bezwen kapab retir son lekor konman dirizan son parti e Sekreter Zeneral.

Napa problemn konman en Manm Lasanble me konman sa pozisyon sa lofis, konman

Speaker en Depite Speaker nou, nou pa krwar i merit okip sa lofis.

Non pa en *Speaker* ki dirizan son parti politik ki i donn sans zafer Gouvernman koz plis ki 2 minit lo son kestyon, me ler in ariv ler pou Dirizan Lopoziyon demann son kestyon, li ganny koup son mikro oubyen i dir, i pe demann tro bokou kestyon.

So eski sa ki apel *fairness*? Eski sa ki nou pe dir nou pe balans loportinite pou bann Manm lo sak kote latab pou zot kapab libreman demann kestyon?

Mr Speaker, legzanp si mon kontinyen donn legzanp mon krwar i pou sote mon 10 minit alors les mon konklir lo sa bann pwen swivan ;

Ler Depite Speaker ki osi Sekreter Zeneral son parti i san lord dizour pou pliferans son *Caucus* ler i ranplas Speaker dan Sez.

Sa mon kapab donn legzanp le 27 Zen 2023, eski sa zot vwar li i bon pratik? *Hmmm – hmmm*. Ler Dirizan *LDS* oubyen Speaker Sekreter Zeneral son parti, i ekrir son prop lofis pou fer sanzman son Manm, eski sa i bon pratik? Mon krwar pa.

Mon pa krwar servi en demokrasi modern i ler refri, li

menm li kaptenn tim, li menm li zwer non lo lapenn papou marse sa. *Hmmm – hmmm*

Alors, mon pou zwenn mon bann koleg, mon pou siport sa lamannman ki devan nou. Akoz mwan, mon senserman krwar ki sa de lofis i bezwen ganny respekte i bezwen asire ki napa okenn Manm ki swa i sorti dan parti mazorite oubyen minorite.

Ki annan dwa, i pou ganny anpese pou li kapab egzers son dwa anba sa *Standing Order* ki la.

E mwan konman enn bann Manm ki bokou fwa, a sak fwa mon ganny loportinite pou koz pou zabitan mon distrik, espesyalman ler mwan, mon vwar kot dirizan *LDS* Sekreter Zeneral *LDS*, ki ozordi i Speaker e Depite Speaker dan mon distrik, mon napa problem ek sa mwan, ler zot koman dirizan dan zot distrik konman *leaders*.

Me ler zot la dan Lasanble Nasyonal pe pran bann pozisyon kle pou sa de lofis, i pa sorti byen, i pa sorti byen e pour mon bann dimoun ki pe swiv nou, zot konpran sa tre byen.

Alors Mr Speaker, mon pou donn mon sipor pou sa Mosyon, sa Lalwa ki sa *Bill* ki la, sa amannman e mon demann bann Manm pou zot reflexir byen letan zot pran

desizyon lo vot lo lot kote latab. Mersi.

(APPLAUSE)

MR SPEAKER

Mersi Onorab. Donn la parol Onorab, Georges Romain.

HON GEORGES ROMAIN

Mersi Mr Speaker. Bonn apre midi Mr Speaker, Bonn apre midi tou koleg Onorab, e tou dimoun ki a le kout.

Mr Speaker, mersi pou donn mon sa letan pou mon kapab dir enn de pti parol osi lo sa ki *LOTO* in anmennen danm Lasanble lo sa *Bill*.

Mr Speaker, bomaten mon'n isi mon osi mon'n ganny sans ekoute, mon'n ganny sans observe mon'n travay dan sa Lasanble pe al fer 4 an depi ler mon dan sa Lasanble; kantmenm mon pa'n dan Lasanble mon'n kontan swiv Lasanble lo televizyon kot mon'n ganny sans. E mon'n war a kantite ki'n pase dan sa Lasanble depi ler nou'n antre dan en miltiparti.

Ozordi ler mon'n ekout *LOTO* ler in anmenn sa *Bill* devan, mon'n zis demann mon lekor en kestyon Mr Speaker, parey in dir son parti ki'n anmenn sa *Bill* devan, si

vreman, vreman zot sener dan sa ki zot in anmenn devan?

Mr Speaker, ou'n sermante an 2020 Oktob ansanm ek Deputy Speaker, ler ou ti sermante ann Oktob 2020 ou ti *Leader* Parti LDS.

Deputy Speaker 2 an pase ki vin Sekreter Zeneral parti, mon demann mon lekor en kestyon akoz ki Lopoziyon pa'n amenn sa ki nou'n anmennen ozordi sa *Bill*, depi Oktob, epi an 2020 dizon oubyen Novanm oubyen Desanm oubyen an 2021 dizon? Akoz ozordi ki zot deside anmenn sa *Bill*?

Pou mwan i kler zot realizer ki LDS pe fer son travay byen e keksoz pe aranze dan pei bokou dimoun, bokou, bokou dimoun i ankor pe siport LDS; bokou dimoun pe sorti lot kote pe sot dan LDS.

E zot santi sel fason pou ganny zot en ti pe plis piblisite, alors dir nou Speaker, fer nou Speaker demisyonnen konman *Leader* Parti, nou Deputy Speaker osi demisyonnen - pou mwan sa Mr Speaker, pa pou fer okenn diferans.

Parey Onorab, Georges in fer re sorti zot pou kontinyen fer zot travay.

Mon pa pou war okenn diferans ladan akoz mon depi ler mon'n konn bann Speakers ki'n egziste, mwan, mon'n vwar

Speaker Msye Mancienne i pe fer en bon travay.

(APPLAUSE)

HON GEORGES ROMAIN

E pou mwan Mr Speaker, ler mon'n asize mon'n get ou travay ler ou'n *Chair* Lasanble toultan, mon santi ennler sa konpasyon ou ennler mon demann mon lekor en kestyon, si pa sa pa afekte ou mantalman dan en fason sa kantite labi ki ou pas ladan toulezour sak fwa ki nou zwenn dan Mardi ek Merkrede, espesyalman ler bann Minis i vin devan.

Mon'n vwar plizyer fwa Mr Speaker, ler bann kestyon per ganny demande atraver bann Minis, espesyalman lo kote Lopoziyon, zot abize sa pouvwar ki zot annan.

E menm letan ou dir zot pas bezwen demann sa bann kalite kestyon koumsa, zot *still* rod en lot fason pou fer.

E zot fer pase zot mesaz ki zot anvi fer pase. Mon zis demann mon lekor Mr Speaker, an 2007 ziska 2016 nou ti annan en Speaker Dokter Herminie. E sa Speaker li menm li i ti en dimoun ki ti pe *lead* ek en lotorite dan Lasanble.

Mon mon'n vwar mon'n *witness* sa mon Mr Speaker, e

si li ki ti dan ou plas ozordi ler mon pe get Lopozisyon ki manner zot pe *challenge* bann Minis, pe dir zot *step down*, *resign* isi laba.

Manman, zot ti pou deor enn par enn! Be par kont Mr Speaker, i annan ki ou'n fer met al deor ou'n dir zot al deor.

Be selman mon krwar ler ou'n dir li al deor apre en bon pe letan ki ou'n tenir, ou'n tenir, ou'n tenir apre ou nepli kapab ou'n dir li deor.

Mon Mr Speaker, mon'n tann en kantite keksoz dan mon zorey la menm ennler kekfwa ou pa tandé, zot *still* pe pas bann komantr ki vreman pa byen, napa respe.

Mon pour mwan Mr Speaker, *LOTO* ozordi sa *Bill* ki in anmenn devan nou mon krwar dimoun deor ler pe get sa, zot pe riye pe dir sa, sa Lopozisyon i pa serye. Vre i pa serye Mr Speaker.

Ler nou pran legzanp lo Deputy Speaker osi ki ranplas ou dan sa sez anler ler ou pa la, mon vwar ki Depite osi i fer en zoli travay e menm son travay ki manner i fer i pa pran diskresyon vreman ennler lo li menm i pran toultan atraver *Standing Orders*.

Toultan i *quote* dan liv i dir akoz in fer sa desizyon e mon konnen toultan i *challenge* zot

lo sa e zot pa kontan parey Onorab, Georges in fer re sorti.

Mon pour mon Mr Speaker, i kler ki zot napa problem ek sa de pozisyon zot, zot annan problem ek sa de dimoun. Sa i kler sa Mr Speaker.

Me selman malerezman sa de dimoun ki pou lanmenm ankor ziska 2025 fer swa ki zot le, zot pou la ankor.

Si 2025 apre eleksyon Mr Speaker, Mancienne i Lasanble ki la devan i deside *step down* konman *Leader* Parti epi *step down* konman Mr Speaker, sa i ava li ki a fer sa desizyon parey Onorab, Georges in fer re sorti. Savedir pou nou Mr Speaker, ou pou kontinyen ganny nou sipor a tou moman.

Mr Speaker, parey mon'n fer re sorti ler mon'n swiv bann deba ki'n pase an 2007 a 2016 - la mon pe fer referans avek Speaker Herminie, Dokter Herminie kantite keksoz ti arive dan sa bann letan.

E pou mwan ozordi ler mon pe get lafason ki manner sa louvraz pe ganny fer ki manner ou pe *Chair* nou Lasanble menm plizyer fwa dimoun in fer re sorti menm in apros mon i dir mon nou Speaker in ler pou li *step up* en pe.

Me selman mon pa santi mon konfortab pou mwan vin dir ou, akoz kekfwa mon pou mank en pti pe respe pour ou, akoz sa i ou lafason manner ou fer pou louvraz.

E pa mwan ki pou dir ou manner ou pou fer ou travay e alors ou fer li dapre ou fason ki manner ou vwar li.

Menm zot pe dir Mr Speaker, mon'n tann zot dir bomaten ki napa *freedom expression, freedom of speech*.

Mon anvi fer zot konnen depi ler sa eleksyon 2020 - Oktob 2020 ozordi Seselwa i pli lib ki zanmen dan sa pei !

(APPLAUSE)

HON GEORGES ROMAIN

Ok. Mon pa pe kapab konpran ki manner zot dir zot pa kapab koze ! Arr?

Ler nou asize nou get *SBC* nou pa pe ganny sans vwar akoz nou vin dan Lasanble nou get *SBC* pli tar.

Mon get sa bann koze, sa bann parol ki sorti ki *SBC* pe montre lo Nouvel mon dir «sa bann parol pe ganny dir? Be koman lontan ou pa ti pe dir sa bann parol !» la la mon koleg pe dir laba ros dan fles.

Mr Speaker, pou mwan, ou pou kontinyen fer ou travay parey ou pe fer. Mon pa pe vwar

okenn sanzman pou annan dan ou travay. Ou kapab *step down* komann *Leader* Parti mon pa pou war okenn diferans dan fason ki manner ou fer li.

Menm parey Deputy Speaker mon pa pou war okenn fason kantmenm i pou *step down* konman Sekreter Zeneral i pou sanze.

E menm si demen i arive nou annan en lot Mr Speaker, ki sorti dan *LDS*, akoz nou konnen nou pou ganny ankor eleksyon 2025 sa i kler...

(APPLAUSE)

HON GEORGES ROMAIN

E safwasi mon ti a kontan en dimoun ki vreman vini, ki en dimoun ki pou napa okenn sa *leadership* dan parti.

Mwan mon ti a kontan vwar sa pou zis montre, pou montre zot ki pou napa sa gran diferans.

Akoz zot lafason ki zot *behave* ki fodre zot sanz zot fason fer. akoz zot fason fer ki anmenn dezord dan Lasanble Mr Speaker.

(APPLAUSE)

HON GEORGES ROMAIN

Akoz menm mon'n tann *LOTO* dir bomaten ki lafason manner Mr Speaker i fer son travay i kre

dezord dan Lasanble. In dir, mon'n tann li dir klerman.

Be pou mwan ler mon demann mon lekor mon pa konnen, mon pe zis mazine be si *LOTO* in realiz sa avan i koze.

Be si Mr Speaker, ti en lot kalite dimoun i ti en dimoun ki ti annan en karakter lo li menm be ki mannyer Lasanble ti pou ete? non, non, non, non, non, non.

Mon krwar *LOTO* ou demann en leskiz pli tar ler ou fer ou *summing up*, ler ou fer ou en ti pe lo dernyen parol ki ou pou ganyen lo la.

Akoz mon krwar ou'n ganny li mal akoz sa Mr Speaker, ki mon konnen ozordi i pa'n zanmen ede pou kre dezord.

E mon, mon krwar lafason par egzanp plizyer fwa parey nou'n tande ki ler bann parey Minis, i vin devan menm letan nou koz lo Mosyon.

Konbyen fwa Mr Speaker, i fer re sorti menm Deputy Speaker annou koz lo Mosyon nou pa koz ditou lo sa Mosyon nou zis fer politik nou kritik tou dimoun dan pei. Espesyalman lo nou kote, zot kritik nou bann sef, nou bann *Leaders* dan *LDS*.

Mr Speaker, mwan pou mwan i kler ki lo kote Lopoziyon nepli konnen ki pou fer, zot nepli konnen ki pou

anmenn devan fransman nepli konnen ki pou anmenn devan.

Parey zot vin fer re sorti zot pe dir ki laz pansyon sorti laz 65 an zot pou fer retourn 63 an.

Menm zot prop Prezidan ti dir pou fer 65 an akoz sitasyon pei ki mannyer pe ale nou napa larzan pou nou pey nou bann dimoun. La ozordi zot pe vwar ki nou Speaker ek nou Deputy Speaker zot *bias* en ti pe lo kote Lopoziyon.

Mr Speaker, menm bomaten menm ler Minis Radegonde ti la mon ti lev mon lannmen pou mon demann en kestyon e mon, mon kestyon mon ti santi ti vremen valab akoz i pa'n tous lo la ditou.

E ou ti pran mon non Mr Speaker, mon ti krwar mon pou ganny sans demann mon kestyon, ou pa ti donn mon sa letan pou mon demann mon kestyon ou pa ti donn mon sa sans. Eski sa pa i montre ki la fason ou fer ou travay ou pa get zis lo en kote ?

Mr Speaker, i annan en keksoz ki ti arive dan sa Lasanble kot ti tous nou tou.

La mon a demann Onorab, Adelaide en leskiz akoz mon pou servi son non; ti ariv en sityasyon kot Onorab, Adelaide avek Onorab, Loze ti ariv en lensidan kot Lasanble.

Mon pa anvi retourn lo la be selman i enportan fer sorti ki ti arive Mr Speaker?

Mr Speaker, apre lenvestigasyon ki ti ganny fer ou ti klerman la devan kot ou pe asize ou ti dir lo televizyon sa ti pe pas *live* ki ou ti sispann Onorab, Adelaide.

Eski sa pa i montre ki ou pe fer ou travay dan en lafason latransparans... San bezwen ou bezwen dir,

«A mwan, mon *Leader* Parti *LDS* alors mon pa pou fer sa ek mon bann koleg, ek mon bann Manm?»

MR SPEAKER

10 minit Onorab.

HON GEORGES ROMAIN

Mr Speaker, mwan pou mon Lopozisyon mon *sorry* pou dir zot, ennler mon demann mon lekor en kestasyon eski zot anvi, zot pe *look forward* pou ganny sa eleksyon?

Eski zot vreman pe rod fason pou zot ganny sa eleksyon oubleyen zot pe fer zot perdi plis ankor, plis vot?

Lopozisyon avek tou respe ki mon annan pou zot mon bann koleg, fer en travay ki pou anmenn sa pei pli devan.

I annan en kantite keksoz dan sa pei ki nou kapab aranze, me selman lafason ki mannyer

mon war pe anmenn bann keksoz devan dan, pou diskite dan bann *quality time* ki dimoun pe get nou, napa bokou letan. Annou fer li dan en fason responsab.

Alors Mr Speaker, mon a zis dir avek *LOTO* i pa pou ganny mon sipor lo sa enn aköz mon krwar ou pe fer en bon travay avek Deputy Speaker. Mersi Mr Speaker.

(APPLAUSE)

MR SPEAKER

Mon a donn laparol Onorab Uranie.

HON ROCKY URANIE

Mersi Mr Speaker. Bonn apre midi tou koleg Onorab e bonn apre midi tou zabitan zil pros ki a lekout.

Mr Speaker, i vreman regretab ler mon ti antann *Vice Chair Bills committee* atraver ou Mr Speaker, Onorab, John Hoareau pouli vreman fer bann komanter vreman negativ.

E dir kareman ki zot pa pou vot pour sa lamannman ki pou ede anmenn plis demokrasi e servi sa demokrasi modern ki nou Lasanble e Lepep Seselwa i bezwen.

Sa lamannman dan konstitisyon ki pou fer nou Lasanble vin pli endepandan,

zis, enparsyal dan la fason ki lofis Speaker e Deputy Speaker i ganny deservi.

Sa mon swete ki Lepep Seselwa i note. Sa kalite panse i pa bon ditou Mr Speaker. Sa i vremen sagrinan.

Mr Speaker, sa i pa la ditou dan lespri nou moto Lasanble Nasyonal *Serving a new Democracy* sa plak e motto ki ou ti devwale ou menm Mr Speaker, konman *Leader LDS*.

Nou pa vwar ki sa fason ki lot kote pe koz lo la ki zot anvi vremen *serve* sa *modern democracy* ki ou, ou ti devwal plak la devan.

Pou nou ler nou'n get sa ou a krwar zot pe fou koudpye dan tou sa ki zot *Leader* Lopozisyon ler i ti la Onorab, Wavel Ramkalawan ki ozordi i Prezidan.

Ozordi tou keksoz ki pa ti bon pe vin bon. Alor pou nou pa vwar ki sa Lasanble i pe serve en *Modern Democracy Hmmm-hmmm* - pa bon ditou - pa bon ditou.

Mr Speaker, sa lamannman i senp, sa lamannman i senp e i enn ki enportan pou anmenn plis latransparans fer Lasanble deroul dan en fason zis enparsyal san pran okenn kote parti politik an preferans dan bann desizyon.

Sa i enn ki nou tou isi anndan ki ti sermante, nou devret vot an faver pou benefis tou Speaker tou Depite Speaker e parti politik e Seselwa, pou demontre sa separasyon pouvwar ant sa 3 brans Gouvernman Egzekitif Zidisyer e Lezislatif.

Mr Speaker, sa i a ede fer Seselwa ganny konfyans dan nou Lasanble e bann desizyon lo lofis Speaker e Depite Speaker i pran.

Sa i napa naryen pou fer Mr Speaker, avek ou direkteman konman en person or Onorab Gervais Henrie konman en person. I annan pou fer avek sa de lofis. Alors dimoun deor pa les zot ganny konfize konmkwa nou pa *attack* sa de dimoun personnelman.

Mon bann frer e ser Seselwa sa lamannman konstitisyon fer par mon *Leader* Lopozisyon lo lapar nou *Caucus*, nou *Leader* Sebastien Pillay pou met li dan langaz pli senp.

I pe demande ki sa ki pran oubyen ganny responsabilite dan sa pozisyon pou sa de lofis servi konman Speaker e Depite Speaker, zot pa devret pe servi en pozisyon politik kle konman bann

leaders dan en parti politik parey i ete le ka ozordi.

Si mon pou donn legzanp Mr Speaker, kot ou menm ou Mr Speaker Roger Mancienne ou *Leader* Parti LDS e ou Depite Speaker atraver ou Onorab Gervais Henrie i osi Sekreter Zeneral parti LDS.

Parey mon'n dir nou pa pe target zot nou pe get lofis. Me ki nou'n vwar, me ki nou'n vwar a plizyer legzanp - plizyer legzanp kot nou'n vwar ki mannyer Lasanble i deroul dan en fason ki pa enparsyal,

Lasanble i deroul dan en fason si mon kapab dir - ki pa - ler en dimoun pe gete osi i pa en fason profesyonnel, ler nou pe gete akoz Mr Speaker, dimoun la deor in vot pou nou, pou vin reprezant zot isi anndan dan sa Lasanble.

Zot anmenn zot konsern kot nou, parey tanzantan nou anmennen Sanmenm sa ou vwar nou *Leader* Sebastien Pillay i anmenn bann *PNQ*, nou anmenn bann *urgent questions*.

Pou nou egzakte man fer tande lavwa lo bann dimoun la deor. Me ki nou vwar ki sak fwa nou anmennen pou demann bann kestyon pour ganny lenformasyon, pou kestyonn Minis, parey Prezidan Wavel Ramkalawan ti dir, me nou vwar sa i ganny, nou ganny

peze swa nou *micro* i ganny koupe, swa nou ganny met deor reprimande e nou ganny met deor.

Me laba lot kote Mr Speaker, mon pa ankor vwar vremen lekel ki'n ganny met deor. Mwan, mon'n ganny met deor preski nou tou isi anndan in ganny met deor me laba plizyer *disturbance* napa enn ki ganny met deor, si zot ganny reprimande.

So Mr Speaker, nou anvi ki sa Lasanble i devlop dan en fason modern e i fer aksyon ki demontre sa demokrasi; nou pa zis koz lo sa demokrasi me nou fer aksyon ki demontre sa demokrasi.

E nou vwar ki akoz zot *leader* dan zot parti politik, sa pe annan serten lenterferans dan zot pozisyon dan sa de lofis, Lofis Speaker e Lofis Depite Speaker.

Mr Speaker, nou, nou anvi ki sa de lofis i ganny kredibilite e lentegrite nenport ki, ki vin la dan sa de lofis tenir Lofis Speaker e Lofis Depite Speaker.

Sa de lofis i ganny sa lentegrite ki i bezwen, pa pe target ou, pa pe target Depite Speaker, *ok?*

Akoz nou konman en *Caucus* nou serye nou'n byen reflesir lo sa lamannman pou

nou fer sir ki nou anmenn en lamannman ki bon.

Mr Speaker, pou sa lamannman pase i vre nou bezwen de tyer e nou, nou ti a demande ki lot kote latab i montre ki zot serye akoz i dimoun pe ekout zot deor.

Nou pa pe target ou, oubyen ou Depite Speaker nou pe get sa de lofis. Nou le ki sa de lofis i vin de lofis ki enparsyal, de lofis ki anmenn *fairness*, latransparans e montre sa separasyon pouvwar avek lezot brans Gouvernman.

Ki tou dimoun i a ganny en *fair chance* pou kapab fer zot bann deliberasyon parey i devret, pour sa Lasanble vin en Lasanble ki vreman montre sa demokrasi ki nou bezwen.

Mr Speaker, akoz mon dir sa, akoz kot mon pase dan milye semen sirtou lo mon zil, pa ganny mon mal ou non, ou non e sa non lofis i ganny monte konmkwa napa *fairness*, *bias*.

Sa i en fe. Mon pa pe evante napa *fairness*, *bias* depi ou, depi Depite Speaker e pou mwan sa i afekte sa lofis.

Akoz demen i annan lezot dimoun ki pou vin la anler, alors nou bezwen fer sir nou anmenn sa lamannman ki pou asire ki sa de lofis ki la i ganny sa ki nou pe dir sa kredi ki zot merite.

Alors mwan, mon pou dir avek Onorab, Sebastien Pillay mon pou siport sa lamannman pa pou target sa de dimoun me pou an faver anmenn en lofis Speaker e Depite Speaker ki enparsyal *fair* e zis.

Onorab, Sebastien Pillay, merci pou anmenn sa lamannman e ler mon tann en *leader* lot kote Onorab, Bernard Georges ek tou respe mon annan pou li Pou demande akoz la ki nou pou anmennen me pa ou ki pou dir nou kan pou anmennen m nou anmennen akoz nou'n war li neserer pou anmennen akoz zisteman nou vwar ki napa *fairness*.

So alors nou'n anmenn li, nou'n anmenn li la. So avek sa Mr Speaker, mon, mon krwar Mr Speaker, parey mon'n tann Onorab...

MR SPEAKER

Ale 10 minit Onorab, konklir.

HON ROCKY URANIE

Onorab, atraver ou Romain dir ki ou Speaker pli *fair* ki'n deza vwar Mr Speaker, mwan fransman

(APPLAUSE)

HON ROCKY URANIE

No offense. Non, Mr Speaker, ditou...

(APPLAUSE)

HON ROCKY URANIE

Akoz mon santi non, akoz si i kontinyen koumsa ankor nou pou kontinyen dir ki *United Seychelles* pou Sel Opsyon pou Sesel. Mersi.

MR SPEAKER

Mersi Onorab. Mon a donn la parol Onorab William.

HON WAVEN WILLIAM

Mersi Mr Speaker. Bonn apre midi tou dimoun ki a le kout.

Mr Speaker, mon remersye Bondye pou son lagras atraver lo nou pei mon remersi li pou met a nou dispozisyon konprenezon, pridans e lasazes i reste pou nou dizernen e pran desizyon e aksyon.

Mr Speaker, lo sa lamannman konstitisyonnell avanse par *Leader Minoriter* par konteks la demokrasi mon pa pou siport a sa pwen dan listwar politik Sesel.

Lamannman ki pe dir ki en dimoun ki ganny elekte konman Speaker ouswa Depite Speaker e dan sa menm konteks *Leader* Lopozisyon si zanmen i ganny elekte Speaker, bezwen divors li ek politik e pozisyon dan son parti.

Mr Speaker, rezon akoz ki mon pa pou siporte i konm swivan ;

Leader minoriter ki'n anmenn sa Prozedlwa li menm pa pe respekte la demokrasi dan Sesel e dan sa Lasanble.

Les mwan klarifye pou piblik byen konpran, li ek son parti pa'n zanmen oule aksepté e respekte desizyon pou swazir en Gouvernman le 24 Oktob ki zot anvi.

Zot bann aksyon *boycott* e zot fason travay e isi menm dan sa Lasanble pa'n montre respe pou lenstitisyon e zofisye, ouswa personn elekte ouswa apwente dan bann diferan pozisyon.

Son parti *SPUP*, *SPPF* ki ti diriz an mazorite deba e diskisyon pou ofer pep Seselwa en Konstitisyon son parti ki ti dan Gouvernman i an mazorite dan Lasanble ki ti diriz direksyon nou gid Lasanble. Ki nou pe servi ozordi menm malgre serten lamannman.

Sa letan zot ti an mazorite e zot ti anvi gard e ganny lespas pouvwar en konsolid pouvwar dan tou kote pou anpes lezot parti ganny lespas ouswa resours pou grosi e vin en lafors.

Standing Order e donn Speaker kontrol absoli dapre Onorab Aglae sa kontrol sa

menm pouvwar ki sa lepok letan zot ti an mazorite zot ti annan pou diriz Lasanble Mr Speaker.

Mr Speaker, loter sa lamannman devan nou, letan mon pe fer mon analiz i pe target de dimoun spesyalman sa se ou Mr Speaker e Depite Speaker Onorab, Gervais Henrie. Sa i kler.

Akoz sa de endividi pe met lord ek zot e anba kouvertir demokrasi modern, zot pe *cool* lyon anba lapo mouton pou vin avek sa lamannman.

Mr Speaker, sa ki vin dan Lasanble se politisyen, zot ki ganny elekte se Lasanble ki bann politisyen ki elekte ek Speaker, Depite Speaker.

Se pa bann sivilyen normal me Manm elekte Mr Speaker, dan Lasanble politisyen i fer politik parey *Leader minoriter* i esey fer par fer krwar.

Par *mislead* pep Seselwa detanzaot, tir keksoz an deor konteks Mr Speaker, sa i son *seal* e konstitisyon e *Standing Order* i donn li sa privelez.

Mr Speaker, enn son ansyen dirizan ti deza dir nou en letan ler mon ti avek zot, diskisyon saler *Leader* Lopoziyon e sipor pou son lofis ti monte bann dirizan pa ti get

“*Serving a Modern Democracy*” sa lepok Mr Speaker.

Akoz nou ti ganny dir «ogmant resours pour *Leader* Lopoziyon pou donn son lofis plis lespas pou fer dega» mon rapel byen sa fraz.

Eski *Leader* Lopoziyon pou vin kares nou avek plis resours?

Mr Speaker, mon osi rapel ki sa letan zot ti anvi fer disparet lavwa Lopoziyon dan Lasanble, ti posib pou zot letan *SNP* ti *boycott* ler eleksyon.

E zot ti fer en laranzman pou met en *Leader* Lopoziyon, zis pou bous lizye lo konmite enternasyonal ki demokrasi vivan Sesel i ti an progre.

Sa letan zot ti’n oublie ki refri ti pep Seselwa, ki ti sivre zot aksyon pou donn sa rezilta 15 lo 10 pli tar.

Mr Speaker, sa letan e sa lepok Seselwa pa’n bar tanzib progre dan zot tenm sa lepok “*moving towards a modern democracy.*”

Mr Speaker, kote *Leader Minoriter* ti ete tou sa letan zot ti an mazorite, zot ti dan konfor e *modern democracy* ti en bon dan en rev aköz kot ti an kontrol.

Ozordi letan *Leader Minoriter* ki pa anvi aksepte pouvwar Speaker, ki zot ti met an viger ozordi parey granmoun

i dir ki lakord ki anmar bef nwar i anmar bef rouz tou. Ozordi lakord ki zot in prodwir in sanz lanmen, me zot pe kriy ayoyo.

Mr Speaker, sa lamannman i parey en bon ki ankor dan en rev *Leader Minoriter* en pon ki ozordi klima politik Sesel pa ankor ase met fondasyon.

Parti politik pa ankor ariv lo sa nivo demokratik ki *Leader Minoriter* li menm pa ankor atenn menm si i anvi fer nou krwar in arive.

Mr Speaker, an respektan La demokrasi an rekonesan swa pep Seselwa dan en demokrasi progresiv dirize par lepep li menm.

Mon regrete ek klima politik ozordi pe toler serten politisyen zet lentere nasyonal anba en pon fer *Leader* parti minoriter.

E son parti oubliy pei oubliy sa ki pe pase o globalman ki pe enpakte lo nou pei anmenn en politik destabilize pei akoz pouvwar.

Mr Speaker, dan sa konteks i atraver bann diferan pwen ki mon'n avanse, mon pa pou siport sa lamannman Mr Speaker, akoz sa lamannman i zis en lot bat latet. Mersi.

MR SPEAKER

Mersi Onorab. Mon a donn laparol Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun ki a le kout.

Mr Speaker, devan nou ozordi le 19 Zen i en Prozedlwa ki *Leader* Lopozisyon li menm in anmennen kot i pe demande pou fer en lamannman dan konstitisyon.

E sa i en Onzyenm lamannman ki i pe demande pou fer

E i pe demande ki lartik 83 li menm dan nou konstitisyon i ganny amande e ki i enkli en nouvo *clause* ladan ki dir ki en dimoun ki ganny elekte konman Speaker e Depite Speaker.

Si zot *leader* en parti politik sa Speaker oubyen sa Depite Speaker zot merit *resign* konman *leader* sa parti politik ki zot ladan.

En tel demann mon pe vwar Mr Speaker, ki i pa pe defann en dimoun annan son afilyasyon, akoz napa en dimoun ki napa en afilyasyon politik.

Me sa ki nou vwar pe demande i se ki, en Speaker ki li son pozisyon in ganny kree anba en konstitisyon.

En konstitisyon i prevwar ki i annan en Lasanble

Nasyonal, e Lasanble Nasyonal i definitivman i bezwen ganny dirize par sa Speaker e dan son labsans definitivman i bezwen annan en Depite Speaker.

Me Mr Speaker, ki ou pe vwar i se ki sa pe ganny demande i se ki sa Speaker, sa Depite Speaker i bezwen en dimoun ki ziz *or* ki *rule* dan en fason ki *fair*, ki zis e endepandan.

So eski ozordi letan nou dan 7 enm Lasanble se sa ki nou vwar pe arive? Petet i kapab i annan de ka ki'n koumsa me i annan dimoun osi ki pe dir ou ki i pa le ka ditou.

Me nou ki asiz la lo sa kote latab dan Lopozisyon diferan Manm in pas dan diferan sityasyon e petet nou, nou pou dir non i pa leka.

Nou pa pe vwar li nou pe ganny sa *fairness*, sa fason zis ki petet nou, nou ti a krwar or nou pe demande ki nou gannyen.

Oubyen nou pa santi ki Speaker i donn or i vin vreman endepandan dan son bann desizyon ki i pe donn nou.

Mr Speaker, mon ti ganny sans an Me 2023 pou mwan al *attend* en *training* organize par CPA e sa ti fer *Westminster* Langleter.

E akonpanyen avek mon ti Madanm Clerk, Madanm

Tania Issac e osi en lot koleg Manm Onorab, Onorab, Michel Roucou ki dan kote *LDS*.

E ler nou ti al laba nou ti ganny sans ganny en sesyon avek sa Speaker pou *the House of Common UK* e letan nou ti ganny sans pou nou poz li serten kestyon.

E mwan konman sa Manm ki dan Lopozisyon dan menm lasal ek mon ti annan Madanm Clerk avek Onorab, Michel Roucou.

Mon ti poz li mon kestyon *with regards to* ki mannyer nou dan nou Lasanble Sesel i deroule.

E letan mon ti eksplik li ki fason nou Speaker i *leader* en parti politik e an menm tan i nou Speaker.

E mon ti demann li son pwennvi en ti pe lo la e kot zot ki mannyer keksoz i ete, e deswit sa ki i ti dir mon.

I ti dir ek mon poudir *first of all* ki i ti byen pou li dir mwan ki enn i pa pou antre dan ki mannyer en pei oubyen konstitisyon en pei i ganny dir *or* i *dictate* ki mannyer nou sipoze run nou pei ki sa i tre byen.

E mon pa ti pe demann li sa, me mon ti bezwen son pwennvi aköz i annan en gran diferans avek lafason ki zot laba *UK* zot annan zot fason dirize.

Nou pe koz anba CPA e i en fason ki nou, *most of the time* nou pran bann diferan nide ki manner ki nou osi nou ti anvi anmenn dan nou Lasanble, pou fer ki nou Lasanble i vin sa Lasanble ki nou pou dir i linite dan diversite.

E osi en nouvo tenm ki pou 30 enm Lasanble ou ti devwale ki” *Serving a Modern Democracy*” e sa Speaker ti dir ek mon poudir Sesel or Lasanble nou bezwen annan serten lamannman.

Nou bezwen revwar nou konstitisyon *with regards to* ki i dir lo Speaker e si napa naryen ki ganny dir lo sa Speaker, rod fason pou nou anmenn bann lamannman, amande ki kekfw nou ti a fer li dan en fason nou ti a kontan i ete.

E se sa ozordi ki mon krwar LOTO in annan sa kouraz pour li kapab menm si zot pe demande aköz la, ti napa en letan ki ou swazir kan ki ou pou anmenn.

Anytime ou kapab anmenn en lamannman nou annan en 5 an, nou annan en dele 5 an dan Lasanble.

Anytime ou kapab swazir pou ou anmenn en lamannman, *Anytime* en Manm i kapab demann kestyon *Anytime* en Manm i kapab anmenn Mosyon.

I napa sa nesesite kot ou pou swazir or ki pou ganny demande aköz la.

Mr Speaker, nou tou nou konnen rol Speaker dan Lasanble Nasyonal e enn, ou *main* rol ozordi ki pe dir se ki ou *preside* bann deba.

E ou la pou ou gard sa disiplin dan Lasanble ant bann Manm, lafason ki nou pou koze lafason ki nou enterakte avek ou menm ou. E avek lezot nou bann koleg Manm Onorab, e bann envite osi ki vin dan Lasanble.

Envite ki vin dan Lasanble enn i devret annan respe pou Manm aköz zot dan nou lakaz e nou osi par kont wi nou bezwen annan respe pou nou bann envite vin isi e pou ou osi Mr Speaker.

Mr Speaker, mwan konman en Manm mon napa okenn problemm avek lord ki ou, ou swadizan mete parey en koleg lot kote latab Onorab, John Hoareau in dir poudir Speaker i vin met lord ek nou letan ou pran serten aksyon en pe drastik, avek bann Manm.

Me mon napa problemm avek met lord mwan Mr Speaker, me sa rol met lord li menm mwan santi or mwan vwar ki i bezwen ganny fer byen.

E menm pli byen ki i pe ganny fer konmela ou pa kapab met lord konmsi mon, mon pou dir nou pa met lord dan en fason konmsi ki *bias*.

Akoz parfwa mon pou donn en legzanp ou annan en Speaker, Speaker i tann tapaz zis lo en kote latab i pa tann tapaz lo en lot kote latab.

Mwan pou fer sorti en keksoz ki mon'n remarke avek Speaker - *sorry* Mr Speaker, ki la mon vin en ti pe direk akoz i en legzanp ki mon pe donn ou.

Bomaten ti en legzanp tipik letan ou'n remontrants parti *LDS* akoz toultan i pa kapab koumsa. Mwan mon krwar si nou le konmans montre *bias* pou nou arete or pou nou napa amannman dan konstitisyon ki pou dir Speaker e Depite Speaker i *resign from* zot parti politik.

Mon krwar keksoz i merit ganny fer pli byen ki i pe ganny fer la. Zot, zot in dir lo kote *LDS* poudir dimoun deor i kontan la fason ki Speaker ozordi pe dirize be eski zot koz ek dimoun zot?

Si vreman bann Manm *LDS*, si ou koz ek ou lisyen i konsern ou Onorab, Depite Speaker. Si vreman kot ti koz avek tou dimoun Mr Speaker, petet zot koz zis avek sa pti group siporter *LDS*, me i annan

zot bann dimoun siporter *LDS* Mr Speaker, ki nou osi i koz avek nou.

Ki dir nou poudir zot pa satisfè avek lafason, akoz i annan plen kestyon ki zis nou lo kote Lopozisyon ki kapab anmennen, ki anmennen pou eklersi.

Akoz sa bann kestyon ki nou anmennen nou ganny ek piblik sa, pou eklersi zot dout zot le sa Minis, i vin reponn pou gete ki sa Minis, i dir.

Akoz kekfwa dan zot landrwa travay or an deor zot in ganny dir en serten larepons, me ler i ganny dir dan Lasanble parfwa i en lot larepons.

So zot le nou *dig* plis ros en ti pe plis detay me ler ou ganny koupe, sa dimoun deor li menm li i montre son fristrasyon i dir ou be akoz Speaker i koupe, akoz Speaker pa les zot koze.

Even though zot pour, zot pou toultan annan en latitud gwaye en latitud rouspete letan dimoun pe koze i pa li leka annou.

Mon fatigue dir sa, nou kapab annan nou diferans me nou bezwen konn ekout kanmarad ki mannyer ler zot lo kote *LDS* zot koze nou, nou kapab ekout zot me ler enn nou, nou koze isi... (Onorab Porice...)

MR SPEAKER

Order, order. 10 minit Onorab, silvouple.

HON SYLVANNE LEMIEL

Me ler nou, nou koze mersi Mr Speaker.

Me ler nou, nou koze isi ou toultan tann bann kriye, ou toultan tann bann *disturbance* ki pou anpes ou fer pase ou pwen.

Mr Speaker, letan nou get sa *motto* li menm, or sa lanblenm Lasanble "*Serving a Modern Democracy*" eskize si mon al dan deor sa ki'n pase me, nou ti ganny en sans ekout en prezantasyon.

Madanm Clerk li menm in ganny en sans fer en prezantasyon lo nou, lo kote *anyway* sa i en komite ki annan dan Lasanble.

Me ti annan en prezantasyon ki ti ganny fer avek nou lo kote ki mannyer nou ti a kontan war Lasanble ale, lavenir Lasanble.

Me Mr Speaker, mon osi mon ti annan en kestyon ki mon ti a kontan demande ek en latitud kot nou pe oule en dimoun demann bokou kestyon, nou pa le en dimoun konmsi fouy pli dan fon letan i pe sey rod serten larepons.

Me i ganny koupe or son kestyon li menm i ganny *phrase*

or rephrase pou ganny dir sa Minis, ki pou dir.

Bomaten nou fek annan en legzanp kot Minis, pe ganny dir ki mannyer pou reponn nou kestyon dir nou swa wi swa non me...

MR SPEAKER

Onorab, ou bezwen terminen silvouple.

HON SYLVANNE LEMIEL

Me i pa... mon pe al terminen mon Mr Speaker. Me la i n legzanp ankore kot *once* ou pe fer pase ou pwen, ou pe ganny dir depese ou annan tan minit be letan ou pe ganny *disturbance* Mr Speaker, ki mannyer ou kapab koze, ki mannyer ou pou fini.

Ou pa pou kapab fini so i fer ki se sa ki mon demande Mr Speaker, *are we really going to words or* nou santi poudir ki nou pe *serve* en *modern democracy*?

Letan ki nou annan bann tel kalite latitud Manm anver Manm, Speaker anver serten Manm dan Lopoziyon, Depite Speaker anver serten Manm dan Lopoziyon.

Mwan, mon krwar ki enn nou merit revwar nou fason fer Speaker ou'n ganny felisite wi, ou bann Manm *LDS* in felisit ou me selman mon santi ki i annan

ankor en kantite travay pou fer avan sa bon felisitasyon i vini.

I annan pou revwar lo sa *fairness* i annan pou revwar lo sa lazistis ki annan dan sa Lasanble e i annan pou revwar lo kote lendepandans e mwan, mon enplore ki Manm i ganny sans koze e Manm i ganny sans dir keksoz ki annan pou dir...

MR SPEAKER

Mersi Onorab.

HON SYLVANNE LEMIEL

An sa ki konsern son zabitan dan distrik. Mersi.

MR SPEAKER

Mersi.

(APPLAUSE)

MR SPEAKER

Mon a pas laparol Onorab Bistoquet.

HON ANNE BISTOQUET

Mersi Mr Speaker. Bonn apre midi tou dimoun a le kout.

Mr Speaker, i vreman en loner pou mon anmenn mon kontribisyon dan sa deba lo 11enm lamannman konstitisyonnèl ki'n vin atraver en *Private Members Bill* anmennen par en *Leader* Lopoziyon ki konfize.

E i pe senpleman rod en platform pou li *attack* en sel dimoun, sa pa lot ki Onorab Roger Mancienne ki Speaker nou Lasanble ozordi.

Mon pou mer devan detrwa pwen senp ki pou montre ki sa proze lamannman pa devret ganny sipor sa Lasanble.

Premyerman Mr Speaker, i enportan pou dir ki konstitisyon en pei i pou tou dimoun son bann lartik pa sipoze pe rod lentere en endividi oubyen en group spesifik i devret reste iniversel akoz i nou Lalwa siprenm e parey nou toultan dir napa personn ki par lao lalwa.

Alor okenn lamannman sa konstitisyon i bezwen swiv sa prensip e labaz okenn lamannman i bezwen annan en prensip kler, en lozik evidan e en demars pou asire ki sa ki pe ganny propoze i en prensip iniversel e akseptab.

Malerezman pour mwan sa lamannman i *fail* lo tou sa bann tes, senpleman akoz Onorab, Pillay i fer parey son labitid pour endirekteman vin *attack* ou Speaker.

I fer li tou le semenn dan sa Lasanble e la in decide pou li abiz son privez par anmenn en tel lamannman.

Son bi malgre ki i konnen i napa de tyer Lasanble pou aprouv son Mosyon se senpleman pou servi sa moman pou fer kalonmni e zis retir to sa gasi ki anndan li, sa i pa normal e i responsab.

Mr Speaker, sa parti *SPPF*, parti Lepep ek *US* i annan touzour menm bi letan zot fer en keksoz, zot target en dimoun oubyen en group pou rezon dan zot prop lentere.

E tou lamannman konstitisyonnèl in pas koumsa letan zot ti annan en mazorite. Letan ansyen Prezidan Albert Rene ti vwar *United Opposition* atraver Onorab, Ramkalawan sa letan pe vin pli for, i ti sanz lartik Konstitisyon lo poursantaz pou ganny sit proporsyonnel.

Letan i ti anvi rod lavantaz politik pou son sikseser i ti sanz Konstitisyon e entrodwir pas baton.

Letan i ti anvi annan pli gran kontrol lo *MNA* proporsyonnel, ankor enn fwa i ti fer lamannman konstitisyonnèl pou donn li dan parti pouvwar zis pou ekrir Speaker e retir sa dimoun.

Sa i zot zistwar e ozordi aköz Onorab Pillay i vwar Speaker Mancienne koman en *heavy weight* pou li, i vin koz ti

lawa konmsi i en bon boug pe rod lentere nasyonal.

Mr Speaker, in plis ki ler pou *US* aret fer Seselwa krwar lizour pou aswar.

(APPLAUSE)

HON ANNE BISTOQUET

Dapre Onorab, Pillay en *Speaker* pa devret *Leader* en parti politik, sa dapre li aköz i kapab anmenn lenfliyans politik dan deba Lasanble.

Mon kestyon se, aköz Patrick Herminie *Leader* parti *United Seychelles* ki konsiltan *Leader* Lopozisyon dan Lasanble Nasyonal?

Si zot krwar *leader* en parti pa sipoze annan okenn rol dan Lasanble i pa ti ava met Patrick Herminie konman konsiltan, kot i pe ganny R10 mil tou le mwan apard son pansyon R50 mil sorti kot sa Lasanble ek en lapey plis ki R50 mil sorti kot parti *United Seychelles* tou le mwan.

Mr Speaker, mon krwar ki Onorab Pillay i merit netway devan zot laport avan i krwar ki i kapab netway Lasanble Nasyonal. Alor Onorab, i dir ki *leader* en parti pa devret *Speaker* me i pa'n reisir donn en rezon valab lo laköz, me in plito al tou diferan kote.

Eski akoz dapre li si i pa *leader* en parti politik i pou pli drwat, pli zis e pli enparsyal?

Si se sa ki i pe rode mon ti a krwar ki Onorab ti devret anmenn en lamannman ki ti ava permet Lasanble pou swazir en dimoun an deor Lasanble pou vin *Speaker*.

Petet i ti a dir i a konsider en ansyen Ziz, en ansenyan, en polisye en dimoun ki'n annan en bon karyer respektab, oubyen demande ki *Speaker* i ganny elekte atraver en eleksyon Nasyonal.

Petet dan sa laliny nou ti ava dir ki Onorab, i serye e i napa en azanda personnel e malisyè. Me pa sa ki i pe rode i pe dir nenport politisyen i kapab vin *Speaker* me selman ki pa *leader* en parti alor sa ki'n arive pou premye fwa dan listwar Sesel avek Mr Mancienne i fatig li. Me selman met en lot politisyen i *ok*, alor kwa ki i pe sey *achieve*?

Annou alor regarde kwa ki nou'n vwar dan listwar nou Lasanble espesyalman anba Patrick Herminie ki pa ti *leader* en parti politik, eski i pa *Speaker* pli diktater pli pir ki Sesel in deza gannyen?

I ti pas son letan *bully* tou Manm Lopozisyon letan i ti dan son Sez. I ti pous zot dan Lasanble preski pa zanmen

aksepte en *PNQ* pouse pou pas Lalwa pou koup lapey *MNA* si zot *walk out* oubyen *boycott* Lasanble par mil Roupri pou sak fwa ki sa i arive.

Letan i ti *Speaker* i ti osi en *CC member*. Letan i ti sorti apre sa bato kondire 15 lo 10 i it fer staf *boycott* Lasanble parey tir tou dokiman lo *computer* e demisyonnen par grap.

Alor eski Onorab, Pillay pe dir nou ki Patrick Herminie ti fer ti akseptab senpleman akoz i pa ti *leader* en parti politik ?

Larepons i en gro non, Onorab, Roger Mancienne i en *Party Leader* me regarde ki mannyer i toleran, in donn zot tou *freedom of speech* ki i en *limited right*.

Me i refize donn zot *freedom of insult*, menm si souvan fwa in aksepte lensilt Onorab, Pillay.

Mon prezimen ki parey mon vwar li konman en pti baba ki pe tonm kriz e zet son bibron e tou son zouzou an deor ber.

(laughter)

HON ANNE BISTOQUET

Letan zot *walk out* parey zot fer tou le semenn i pa koup zot lapey, menm si lalwa i permet li.

I plito respekte zot drwa e konman en dimoun ki krwar

dan la demokrasi i pa azir i pa regarde afilyasyon politik okenn travayer Lasanble e i tret zot byen.

Eski zis sa pa i montre nou ki largiman Onorab, Pillay pa fer sans e i pe zis fer politik bonmarse - *buy one get one free*.

Mr Speaker, mon ti a kontan dir avek Onorab Pillay ki Onorab, Roger Mancienne i *leader* parti *LDS* i pa devret krwar ki selil ki pou desid lavenir oubyen pozisyon ki Onorab Mancienne i pran.

Sa se Onorab Mancienne personnelman ki ava pran en tel desizyon si i anvri reste konman *leader* nou parti e parti i aksepte i ava reste.

Si i pa anvri reste koman *leader* nou parti se li ki ava decide ansanm avek parti e pa oublie ki nou dan *LDS* nou fer eleksyon nou parti *leader* dan nou konvansyon kot tou Manm i asiste.

E non pa dan en pti lasanm deryer laport fermen, kot Manm pa konnen e apre zot menm dir ki menm si parti i swazir en pti pou met o pouvwar zot pou vote.

Mr Speaker, konman en zenn Seselwa mon osi demann lezot zenn Seselwa en mazorite pep Seselwa pou zwenn ansanm avek mwan pou salye ou, e felisit ou pou lalit ki ou'n

anmennen ansanm avek tou lezot...

(APPLAUSE)

HON ANNE BISTOQUET

Mr Speaker, koman en zenn Seselwa mon osi demann lezot zenn Seselwa, pou zwenn ansanm avek mwan pou salye ou e felisit ou pou lalit ki ou'n anmennen Ansanm avek tou lezot *leader* parti Seselwa *SNP* ek *LDS*.

Ou'n ganny arete senpleman akoz zot ti annan en persepsyon lo ou. nou'n ganny anmennen dan bok-bok; ganny anfermen pou naryen.

Mr Speaker, konman *leader* parti ou'n pas atraver bokou e nou salye ou, ou *deserve* ou pozisyon konman Speaker Lasanble !

(APPLAUSE)

HON ANNE BISTOQUET

Egalman nou osi remersye e felisit Onorab, Henrie pou son bon travay ki i pe fer konman Sekreter Zeneral *LDS* konman Depite Speaker e osi konman Manm elekte pou Mont Buxton.

Mr Speaker, mon pa krwar pou en serten largiman lo kote latab. Mon pa konpran dan ki fason (1)enn pou ou etabli

en *time limit* 1 erdtan pou *PNQ* i annan pou fer avek komann *Parti Leader*. Si demen ou *retire* konman *Party Leader* par ou prop volonte e ou mentenir 1 erdtan pou *PNQ* ki fason sa largiman pou ganny zistifye?

Dezyenmman, 3 Manm lot kote latab i mal konport zot apre plizyer *warning* zot ganny kontinyen *disturb* Lasanble e ou pran aksyon disiplin ki *Standing Order* i permet ou.

Demen si ou deside *retire* konman *party leader* e ou konman en ansenyan en zonm disiplin e egzampler ou pran menm aksyon, ki mannyer sa largiman pou ganny zistifye?

Mr Speaker, nou dir ou mersi ki ou en zonm avek bokou savwar viv ou nepli antann *out, out, out!*

Me nou atann dir

“Onorab, ou pe mal konport ou eski ou kapab kit nou lasal silvouple?”

Mr Speaker, mon anvi zis ekersi en pwen ki in ganny fer lot kote latab apre ki Onorab Hoareau in fer son lentervansyon.

Mon’n tann dir konman en madanm in vin en *sort of* denigre en lentegrite madanm me si ou permet mon Mr Speaker, mwan mon pou dir ou ki pa se Onorab, Hoareau ki’n denigre lentegrite madanm.

Me se li menm li Mr Patrick Herminie ki ansyen Speaker

(APPLAUSE)

HON ANNE BISTOQUET

Akoz mwan ki telefonn mwan e i ti demann mon en serten lenformasyon lo en dimoun ki ti dan en relasyon avek enn son ansyen travayer.

Vi ki sa dimoun ti en dimoun Pralin e i kit so *dreadlocks* i ti demann mon si i i dan drog aköz i pou plant li e alors sa se pa Onorab Hoareau ki’n fer sa bann zafer.

Mr Speaker, antretan...

(comments off-mic)

MR SPEAKER

Onorab, 10 minit.

HON ANNE BISTOQUET

Mr Speaker, antretan mon anvi dir ki lo sa lamannman ki pa fer okenn sans ki Onorab Pillay in anmennen mon pou vot kont aköz mon pa krwar ki i pe anmenn okenn kontribisyon pozitiv pou nou pei. Mersi.

MR SPEAKER

Mersi.

(APPLAUSE)

MR SPEAKER

Bon nou a pran en poz la e nou a fer li en ti pe pli kourt ki labitid nou a rebran 4er 10. Mersi.

(BREAK)**MR SPEAKER**

Laparol i pou Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi tou Manm Onorab e bonn apre midi tou Seselwa ki pe ekout nou la apre midi.

Mr Speaker, depi bomaten nou'n konmans debat lo en *Bill* en lamannman konstitisyonnèl anmennen apar *Leader* Lopozisyon.

An se ki konsern lofis Speaker e Depite Speaker e bann diferan keksoz petet ki nou ti a kontan vwar atraver nou Konstitisyon an sa ki konsern sa de lofis.

Ozordi e mon krwar i en letan remarkab e osi enportan Mr Speaker, akòz nou fek selebre lazournen nou konstitisyon yer.

E nou konman en parti politik ki'n ganny fer reprezante dan Komisyon ki ti drafte sa Konstitisyon konman en parti politik ki'n sipòrt sa Konstitisyon nou annan tou

lezitimite ozordi pou nou asize e koz lo sa Konstitisyon.

E si i annan nesosite koz lo bann lamannman ki sa konstitisyon i devret pas atraver.

Ozordi deba in ganny anmenn dan lepase par bann menm dimoun ki zot ti debout e dir aotvwa ki poudir zot pa pou vot pou sa Konstitisyon e debat e koz lo sa Konstitisyon plis ki bann dimoun ki ti sipòrt e drafte sa konstitisyon Mr Speaker.

E pep Seselwa ozordi i bezwen asize realize ki poudir parfwa la pa tou bann bawawa, bann zape ki fer pa sans e souvandfwa sa bann kalite konservasyon koze se pou tir distraksyon lo vre lefe sityasyon ki devan nou.

Zot in pran sa deba Mr Speaker, ozordi kote mazoriter *LDS* zot in pran deba lo sa lamannman konstitisyonnèl e zot in anmenn li dan en bann zafer lepase.

Pou mwan parey mon'n dir zot in tir latansyon lo sa vre *issue* ki devan Lasanble Nasyonal, sa vre *issue* ki pe menas la demokrasi e zot pe anmenn li dan en bann keksoz personèl e en bann keksoz lepase.

Ma met sa la Mr Speaker, ozordi sa lamannman ki nou'n

met devan Lasanble i en lamannman ki'n ganny diskite par parti *United Seychelles*.

E ozordi si nou *United Seychelles* pou anmenn en lamannman koumsa i vedir ki nou *leader* Dokter Patrick Herminie i en dimoun ki pare pou bouz devan e avans nou demokrasi i pa sa kalite portre ki zot pe penn lo li ozordi.

Zot in penn li dan tou sort kalite fason, me lefe ki nou pe anmenn sa lamannman ozordi, i montre karakter sa msye e i montre dezir parti *United Seychelles* pou bouz nou demokrasi pli devan.

Me i malere Mr Speaker, ki nou annan en tim lot kote latab ki pe rod tou sort fason pou penn sa deba en deba personnel dabor i pa le ka ditou.

Sa deba ozordi i pa deba ki devret e i pa en deba ki lo lendividi ki asiz dan sa de sit, de i plizoumwèn deba lo en prensip la demokrasi ki mon krwar Sesel ozordi dan sak konzonktir ki nou'n arive Sesel ozordi i bezwen kapab koz lo la.

E pou nou avans nou demokrasi pli devan nou devret kapab *entame* bann diskisyon lo sa nivo lo sa oter pou nou kapab fer sir ki keksoz i bouz pou le meyer pou Sesel.

Demokrasi Mr Speaker, i bezwen ganny war pe marse,

demokrasi pa kapab ganny zis ekrire "*Serving a Modern Democracy*" devan lo Lasanble Nasyonal ouswa nou met dan *speech* dan bann diferan koze partou, me selman nou pa pe montre poudir i pe marse.

Zot in anvi koz dan lepase Mr Speaker, annou koz en pti gin dan lepase anba Speaker Herminie, Dokter Herminie dan katriyenm Lasanble e sa se statistik verbatim al rode al gete zot in koz plis.

Lopozisyon sa letan ti koz plis ki nou ozordi pandan *Speakership* Dokter Herminie.

Pandan *Speakership* Dokter Herminie Lopozisyon dan katriyenm Lasanble *Leader* Lopozisyon an partikilye, in ganny plis loportinite ki *Leader* Sebastien Pillay ozordi pou li pas son bann pwen.

E sa i en fe sa i dan verbatim al gete rikord i la kot Lasanble Nasyonal, i annan letan Mr Speaker, ozordi nou pe konplent *PNQ* bomaten nou'n konplent *PNQ* zis 30 minit.

I annan letan mwan, mon'n pas ladan mon konnen i annan letan poudir *PNQ* ou asize dan Lasanble Nasyonal preski ki dir en zournen.

E sa i fe, i bann fe ki nou pe met ater Mr Speaker, si i annan en dimoun Mr Speaker, si i annan en dimoun en sa

dimoun in ganny marzinalize si mon kapab dir sa dimoun in ganny met akote.

Si ti annan en dimoun ki ozordi ti pe sey petet re met, pran Lasanble Nasyonal e met li lo en nivo sete Speaker Prea, e ki'n arive ek Speaker Prea be ki zot in fer ek Speaker Prea.

Ozordi Speaker Prea zot in tret li tou sort kalite fason ler i ti pe sey anmenn lazistis pandan son *Speakership* 2016 ziska 2020 nou'n war ki'n arive avek Speaker Prea, Mr Speaker?

Le problem i se ki sa parti *LDS* ozordi ki reprezante la lo lot kote latap zot oule letan dimoun i koze, zot pa oule ekoute ler nou pe sey avans sa demokrasi Mr Speaker.

Ozordi Mr Speaker, sa *Bill* ki devan nou i montre parey mon'n dir i prouve ki poudir parti *United Seychelles* i pare pou fer sanzman kot i nesaser.

An 2020 Seselwa ti vot dan son mazorite pou anmenn sanzman me depi 2020 ziska la, sel parti ki'n nobou koz lo lapar Seselwa ki'n nobou anmenn sanzman dan bokou keksoz lo lapar Seselwa se parti *United Seychelles*.

Parti lot kote latap zot pa'n kapab anmenn sa sanzman ki zot ti prese. I annan plizyer legzanp Mr Speaker, plizyer

legzanp ki nou pa pou antre ladan e bann legzanp ki nou donnen dan Lasanble Nasyonal.

Ler mon'n ekout detrwa entervenans ki'n koze lot kote latap zot largiman bokou zot pa fer sans e dan bokou ka e menm Mr Speaker, ler mon'n ekout lentervansyon Onorab, Georges *Leader* Biznes Gouvernman i montre ki poudir son largiman i annan nesosite annan en Speaker ki pa sorti dan parti politik.

Akoz in asize in fer tou sort kalite lentervansyon lo ki mannyer Speaker Herminie ti ete lot, lot, lot ki mannyer isi ti ete ki mannyer lot ti ete.

I montre Mr Speaker, ki poudir i dakor ki poudir nou zwen annan en Speaker ki pa sorti dan okenn parti politik e ki napa okenn lenfliyans parti politik lo li.

Mr Speaker, nou pou al en ti pe pli devan Onorab, John Hoareau ti propoze ki e i dir en menm Onorab, pou Anse Etoile Onorab, Georges Romain in propoze ki si nou ti pe anmenn en lamannman ki fer ki Speaker i sorti an deor Lasanble Nasyonal zot ti ava siporte.

Be mwan, mon *challenge* zot la vin avek en propozisyon, vin avek en propozisyon pou amann sa Lalwa ki devan nou.

E nou ava siporte vin ek en propozisyon lamannman kot en Speaker i sorti an deor parti politik en dimoun ki an deor Lasanble Nasyonal vini nou a siporte.

Mon *challenge* zot pou anmennen akoz si zot pa anmennen nou 2025 nou pou *improve* lo sa ki nou'n anmennen ozordi. Nou pou *improve* ankor lo la e nou pou fer lamannman dan konstitisyon pou nou avans nou demokrasi pli devan kot en Speaker i ava ganny elekte par CAA.

E CAA napa okenn lenfliyans politik dan en manner ki nou ava annan tout lenparsyalite dan sa dimoun ki asize anler.

Mr Speaker, i annan bokou, bokou lenstans dan sa Lasanble Nasyonal ki mwan, mon santi personnelman ki drwa minorite dan Lasanble Nasyonal pa ganny respekte e proteze.

E ozordi bokou i krwar poudir sa latak i viz ver ou akoz Mr Speaker, se ou ki anler refri, se ou ki refri so si ozordi nou santi ki poudir nou pa pe ganny trete parey nou devret pe ganny trete...

MR SPEAKER

10 Minit Onorab.

HON WALLACE COSGROW

Nou bezwen viz, viz nou konplent ver ou ki refri e dayer Mr Speaker, sete zot ki ti dir ki poudir, e si nou ki pe anmenn sa mon war i drol ozordi zot pa pe koz an faver.

Sete zot dan Lopozisyon ki ti dir refri pa kapab asiz lo ban *management* sete zot sa i zot lide sa.

Pour ki rezon ozordi zot in fer en *turn around* e zot pa krwar poudir sa i en bon keksoz eski akoz ozordi zot annan en *super majority* zot kapab fer sa ki zot anvi zot kapab fer sa ki zot anvi.

Zot kapab koup nou mikro, zot kapab fer sa ki zot anvi prezan zot pa krwar poudir nou devret pe sanz lesion ki ou fer e avans nou demokrasi?

Si ou dakor Mr Speaker, ki pou dir sa i en bon prensip *then* mon enplor zot, nou bezwen deryer mazorite pou nou vot pour sa lamannman mon enplor zot donn sipor sa e annou avans nou demokrasi devan.

Mr Speaker, ou osi konman en dimoun ki swadizan *believe* dan la demokrasi mon krwar ou ti ava fer *the honorable thing resign* from ou parti politik!

E ti ava en *step* annavan dan la demokrasi nou Lasanble

Nasyonal e lenparsyalite nou Lasanble Nasyonal e Mr Speaker, avek sa mon...

MR SPEAKER

Ok mersi.

HON WALLACE COSGROW

Pe konklir mon konnen napa bokou letan mon *wish* mon ti kapab koz plis ki sa.

Avek sa Mr Speaker, mon mon krwar ki poudir demokrasi i en prose ki bezwen ganny evolue a longer ditan.

Nou'n ariv a sa pwen dan nou demokrasi e nou pa kapab regrese tourn deryer kontinyen koz lo lepase, lepase.

Si ou en parti politik ki pe get devan ki pe get bezwen pep Seselwa, ou bezwen kapab bouz dan le fitir e sa bann propozisyon ki nou pe vin avek se bann propozisyon pou le fitir e pou avans demokrasi Sesel e Seselwa.

Avek sa Mr Speaker, mon a remerci ou.

MR SPEAKER

Mersi Onorab.

MR SPEAKER

Mon a donn laparol Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mon pran laparol ozordi apre midi apre bokou refleksyon fat e vyen dan mon latet si mon pou koze lo sa propozisyon lamannman konstitisyonnel ki devan nou.

Akoz menm si sa *Bill* i pa lo mwan – *I hold the Office of Deputy Speaker* so mon war li mon annan en lentre me selman mon, mon pa pou siprim mon dwa pou eksprim mon lekor lo sa size.

Mr Speaker, mon'n ekout bann deba avek gran lentre depi bomaten e ler mon'n ekout bokou entervansyon mon'n remind mon lekor of *Order 59(5)* nou *Standing Orders* ki koz lo *content of speech*.

E 59(5) i dir nou,

“ *The conduct of the Speaker, Deputy Speaker*” parmi bokou lezot zofisye ki mansyonnen “*shall not be referred to except upon a Motion moved for that purpose.*”

E dan *ABC* pou lenformasyon piblik *mover of the Private Members Bill* ti donn nou son parol - en zonn i ganny size par son parol - ki ni mwan, ni ou pa pou vin size sa deba malerezman sa i pa'n leka.

E i fer mwan apeti ozordi tou bann kekfwa enn ler ou ti ava donn li *the benefit if the doubt*, be ki mannyer mon pou

kapab krwar Onorab Pillay atraver ou Mr Speaker, ler i donn nou en parol?

Parski nou'n war. So *Order* 59(5)

Toudmenm mon'n ekout son lentervansyon e mon'n regard son *Bill*, kestyon mon poz mon lekor se, akoz i le konmans lo lofis Speaker e lofis Depite Speaker pou dir sa ki dan son prop mo, "retir zot anba lenfliyans lofis politik?"

Akoz zis sa de e akoz a sa moman ki nou pe koze kote nou pou arete? Zis lo lofis Speaker e lofis Depite Speaker? Sa ki *Leader* Lopoziyon in dir nou bomaten in koz lo Komisyon Lapwentman Konstitisyonnel (CAA) ki ganny fer anba provizyon 139 nou Konstitisyon.

Prezan i di nou ki manner ou annan en lenfliyans akoz Prezidan ki konsilte avek ou lo serten lapwentman.

Selman i bliye dir avek piblik Seselwa ki manner bann Manm CAA i ganny apwente Prezidan i apwent de *Leader* Lopoziyon i apwent de.

Now lefet ki *Leader* Lopoziyon i apwent de, eski i napa en lenfliyans politik endirek lo bann lapwentman tel ki *Ombudsman*, *Human Rights*,

Planning Authority, *Oditer Zeneral*, *ACCS*, *SBC*, eski napa?

So kote nou konmanse lo lofis Speaker avek Depite Speaker, kote nou arete?

PSAB nou bliye poudir Lopoziyon i annan lapwentman dan *PSAB*? So konteks politik Sesel i annan politik partou e nou bezwen dan serten lenstans viv avek.

Prezan zot in anmennen avek sa zafer "*serving a modern democracy*" ki zot dir i la deor. Wi, i la deor, me eski zis Lasanble Nasyonal ki responsab ou annan en responsabilite pou asir en demokrasi modern?

E ler nou koz en demokrasi modern eski zis lofis Speaker ki annan sa responsabilite? *What about* Lopoziyon?

Dan en demokrasi modern Lopoziyon i annan en lobligasyon en responsabilite pou asir ki nou servi en demokrasi modern.

Ou bezwen par egzanp prezant bann *policy* alternativ fas avek sa ki Gouvernman i met de lavan.

(APPLAUSE)

HON GERVAIS HENRIE

Ki dernyen fwa nou'n tann Lopoziyon vin avek en *policy*

alternativ? Nou vwar poudir Lopoziyon i kontinyelman *fail* pou zot anmenn bann deba konstriktiv. Zanmen zot anmenn okenn lamannman lo bann *Bills* ki ganny propoze.

Nou pa vwar Lopoziyon partisip dan bann foronm nasyonal. Nou pa vwar zot prezans dan bann levennman nasyonal. Yer par egzanp les Mahe, Mahe i gran. En levennman i deroul La Digue pou pa war *MNA* Elekte La Digue?

(laughter)

HON GERVAIS HENRIE

En levennman i deroul Baie Ste Anne Anse Kalis, Baie Ste Anne ou pa war *MNA* ile Eve, ou pa war *MNA* Elekte pou sa distrik?

Nou ale, nou al dan bann levennman kot nou pe al reprezant bann diferan dirzans pe reprezant Lasanble Nasyonal koman en tim. *Leader* Lopoziyon i vini la mon a poz sa la. Dan Sesel ozordi i annan diferan dimoun ki met diferan sapo e sa akoz nou popilasyon i ptipti.

So ler ou dan en delegasyon Lasanble Nasyonal kot ou pe reprezant *the institution*, ou pa kapab vin dan ou sapo *Leader* Lopoziyon,

akoz ou pa la konman, ou en zofisye Lasanble la.

E prezan la ou konmans koz mirak Gouvernman Ameriken, ou konmans fer tel pwen avek Lasin ou anbaras nou.

Prezidan Kenya lot zour in bezwen vini demann li be akoz ou pa dan en palto? Nou bezwen dir li, be i ganny *allowance* pou sa.

So Mr Speaker, Lopoziyon osi i annan en rol pou li zwe dan *servng a modern democracy*.

Now, aprezan sa ki nou bezwen tonm dakor lo la lide ki *Leader* Lopoziyon pe avanse se en ideal, en prensip, en fason fer, me i pa vedir ki i 100 poursan fason mal. Menm parey i pa neserman byen. Be ler ou pe avans en ideal i annan en fason fer ou bezwen dabor konsilte.

Ki konsiltasyon nou'n annan lo 11th *Amendment of the Constitution* - sa ki'n tande ti annan en *meeting* piblik parla, pou dir avek piblik ki nou pe anmennen nou pe al zwe avek nou Konstitisyon?

Ki sipor parti mazoriter *Leader* Lopoziyon in sey rode, kan i konnen i bezwen nou sipor pour sa lamannman pase?

Kan i ti al devan medya nasyonal pou demann en *interview* dir mon pe anmenn sa pou tel, tel, tel rezon.

Be fason in fer la Mr Speaker, se larogans e sa i pa byen, *serving a modern democracy consultation* nou tonm dakor ou pa kapab zis vini enpoze, *this is not serving a modern democracy by behaving in an arrogant manner!*

(APPLAUSE)

HON GERVAIS HENRIE

Mr Speaker, i annan de mo ki'n ganny koz lo la depi bomaten enparsyalite e lendepandans. *Now* nou bezwen fer en distenksyon, parske sa propozisyon lalwa ki devan nou, i dir ek nou ler ou ganny elekte swa dan Lofis Speaker ouswa Depite Speaker ou sorti konman en leader dan *political party*.

I pa defini kisisa *leader* si ou trezorye, eski ou en *leader*, si ou en *spokesperson* eski ou en *leader*? So napa en definisyon *what is a leader* - les sa.

So dizon demen bomaten sa *Bill* pase mwan, mon demisyonnen alor konman i annan de keksoz zot oule.

Swa sa endividi i ava demisyonnen konman Speaker

ouswa Depite Speaker, ouswa sa endividi i demisyonnen koman *Party Leader* be si dizon i demisyonnen konman en *Party Leader* ki mannyer sa i retir politik dan li?

If anything, i kapab vin pli arogan e pli partizan anver zot. Sa ki nou bezwen konpran ler en dimoun i ganny elekte dan sa lofis la e baze lo nou grander popilasyon, i en dimoun ki bann dimoun otour li ki konfyè li sa responsabilite, in vwar poudir i annan en abilite *of some sort* pour li fer sa travay.

Me si i ariv Depite Speaker ouswa Speaker, *chances are very high* ki i pou osi annan en *prominent position* dan son parti politik, akoz *what I carry* avek li pandan karyer, son lenfliyans, son ledikasyon, son leksperyans e tou sa.

E dan konteks Sesel parey mon'n dir, en dimoun pe met plizyer sapo e *mover of the Bill* li menm i *Leader* Lopozisyon, i *FPAC Chairperson*, i en *CC member* son parti, i annan diferan rol.

Alor sa ki sa dimoun li i bezwen fer, se ki ler i asiz dan sa sez en partial i bezwen tret tou lede kote parey ouswa dan en fason egal.

E ki i bezwen fer, se donn en lenterpretasyon konpletman obzektif lo *Standing Orders*. E

pou mwan donn m en legzanp kot swa Speaker swa Deputy Speaker pa'n donn en lenterpretasyon konplet obzektif lo *Standing Orders*, kot in servi pou li pyetin lo minorite? Donn mon en legzanp? Napa! Zot pa kapab fer.

E dezyenmman lo lendepandans i bezwen lib avek okenn kontrol eksteryer e i pa anba lotorite okenn endividi ouswa group.

Donn mwan en legzanp kote, tou *PNQ* ki'n anmennen in pase. Si ti anba kontrol en endividi i ti a dir sa enn pa anmennen aköz mon pa oule sa Minis, i vini.

Sa Mosyon ma met lo *Order Paper* be kan in annan sa dan Sesel silvouple? Depi 2020 dir mwan kan in annan?

Mr Speaker, ler sa dimoun i vin la anler i bezwen konnen li poudir dan sa pozisyon i annan en *standing* lo nivo nasyonal. E i bezwen osi balans lwayote pou son parti e bann pli gran lekspektasyon sa lofis, aköz en Speaker ouswa en Depite Speaker i pa zis ler nou war li lo Sez.

I annan lezot rol ki i fer ; son rol seremonyal, son rol pou li *Chair* bann Lasanble Nasyonal, pou li met lord dan Lasanble, pou li *Chair* bann

komite par egzanp ABC, pou li zer *the precinct*.

Be en lendepandans ouswa enparsyalite, nou get zis letan i lo Sez ? I annan lezot travay ki sa endividi i fer alor aköz nou limit nou obzervasyon la.

Alor Mr Speaker, sa ki mon ava dir mon konnen mon napa bokou letan, 31 an Konstitisyon nou'n selebre yer sa ki Onorab, Pillay pe anmennen i en lideal, i en prensip, i en fason fer.

Ki i pa defann nou koman en pei konmans reflesir lo la me nou bezwen pour lakseptans sa lide sa prensip, sa lideal, sa fason fer.

Annan en kantite konversasyon, konsiltasyon, resers e pou nou kapab tonm dakor konman en pei adopte mannyer nou pou fer, ki meyer pratik nou pou pran.

Langleter zot pe koz Langleter...

MR SPEAKER

10 minit Onorab.

HON GERVAIS HENRIE

Langleter Mr Speaker, depi 1728, 1728 ziska 1872, plizyer Speaker pou sa konsep enparsyalite ganny evolue.

Nou pa zis vini ozordi, nou leve nou tay kot en avoka nou

ekrir en Lalwa nou anmennen nou dir annou ale; non sa i apel larogans evolisyon e konsiltasyon.

Mr Speaker, lendepondans ek enparsyalite lala *Standing Orders, Order 8* i dir ou ki mannyer Speaker pou fer i annan bann lezot sa par egzant Clerk son rol ki *advise* Speaker konsiltasyon avek Dirizan Lopozisyon lo *Bill*.

Order Paper ABC ki ganny diskite ansanm, bann keksoz parey *adjournment of debate, closure of debate* pa zis Speaker ki pran en lord, parey ti konmans Langleter dan bann letan 1728.

Evolisyon aprezan i bezwen atraver en vot *the Floor* akoz pou fer sir ki Speaker pa *get away* avek *murder*.

E alor mon bann zanmi mwan, mon pe dir mon pe pran en pozisyon dan milye i en lide i en fason fer...

MR SPEAKER

Konklir Onorab, silvouple.

HON GERVAIS HENRIE

Me nou bezwen konsiltasyon nou pa kapab aksepte larogans *Leader* Lopozisyon zis pou vin bour en keksoz dan nou lagorz, kan i konnen i napa mazorite konmsi nou ti pou zis aksepte sa ki i pe dir nou.

Non. Sa nou pa pou fer vin kot nou, nou a koze e nou a vwar meyer fason pou fer. Mersi.

MR SPEAKER

Mersi.

MR SPEAKER

Mon bezwen adres en pwen ki Onorab, Henrie in leve e sa se *Order 59* i donn mon lenterpretasyon.

Order 59 i vre i dir *the conduct of the President, the Vice President, Speaker, Deputy Speaker* pa devret ganny leve eksepte anba en Mosyon pou *for the purpose*.

Mon ti get sa *Standing Order* byen avan mon konmans pran sa deba e mon le dir mon'n enterpret li liberalman, larasman pou donn Manm otan privez ki posib.

Mon'n konsidere ki *conduct* i pa aplik pou desizyon oubyen pratik ki mannyer Speaker oubyen Deputy Speaker i fer dan Lasanble ki *conduct* i ava aplik pou sa ki i fer son *behavior* an zeneral an piblik.

Enkli dan son *office* piblik so se pou sa ki mon'n permet bann Manm lev size desizyon e *policy* ki Speaker e Deputy Speaker i pran.

Me selman sa pwen *conduct* i valid e i aplik pou sa ki mon apel *behaviour of the officers* mersi.

REZON akoz mon'n dir sa, se ki mon le i kler pou piblik. Mon pa oule piblik i akiz mon akoz mon'n permet Lopozisyon fer en keksoz ki zot pa devret fer anba *Standing Orders*.

Mon'n konsidere e mon'n mazine poudir sa i kapab ganny fer. Mersi.

Onorab Pillay, mon war ou pe lev lanmen mon pa konnen zis *state* mon parey *Standing Orders* dir mon ki ou le fer

HON SEBASTIEN PILLAY

Lo *Order* 59(5) ki ou fek fer refleksyon lo la.

Mon apresye ou komanter lo *Order* 59(5) e respekte komanter, me selman mon ti ava osi apresye lefe ki Deputy Speaker Onorab, Henrie ki'n koz avan in blanm bann Manm Lopozisyon e kre en lenpresyon ki nou pe al kont *Order* 59(5).

Be dan menm fraz in atak Onorab Uranie dan son *conduct* konman en Manm lo La Digue so konmsi mon konpran, mon apresye sa lenterpretasyon liberal...

MR SPEAKER

Menm... Mersi.

HON SEBASTIEN PILLAY

E mon le met sa lo rikord Lasanble.

MR SPEAKER

Menm rezon pou Onorab Uranie pa asiste *flag raising ceremony* mon pa konsider li konman en *matter of conduct*, mon konsider li konman en *matter of* en mank obzerv son *duty*. Se sa ki mon krwar. Mersi.

Donk komanter Onorab Henrie i napa naryen pou mon obzekte avek mersi nou a kontinyen e Onorab, Loze ou annan laparol.

HON JOHAN LOZE

Mersi Mr Speaker.

Mr Speaker, swivan ou lozik Onorab Ramkalawan in mank observe son *duty* pandan plis ki 30 an sote 30 an...

MR SPEAKER

Onorab,

HON JOHAN LOZE

I pa'n observe son *duty*.

MR SPEAKER

Bon Onorab, prosede avek *Bill* .

HON JOHAN LOZE

Yes, Mr Speaker, mersi. Mr Speaker, mon le konmans avek 4 pti pwen.

Premye pwen mon le konmans avek Mr Speaker, sa bann siporter Parti Lepep e mon dir ou sa konman en zanmi ki pe asiz dan ou *Caucus* laba zot pou garanti ou parti en defet 2025, sa mon garanti ou sa Mr Speaker.

Lot pwen mon le vin lo la Mr Speaker, mank respe e denigre nou bann madanm e mon vwar serten latak direk in ganny fer lo Dokter Patrick Herminie, akoz zot mank largiman pou vin avek alor zot pe atak e asasin son karakter.

Bon e de plis apre ou pou montre nou sa lasanm ki Onorab John Hoareau in dir Dokter Herminie ki annan dan Lasanble nou le war sa lasanm nou.

Mr Speaker, labi e mank respe pou *staff* Lasanble 6enm Lasanble dan vizit Komite Zil kot en o zofisyè Lasanble Nasyonal mon pe koz staf ki *breakdown* plere dan milye lannwit.

E Msye Glennie Savy li menm ti bezwen vin *rescue* sa madanm sanz li *bungalow* met li dan en lot lasanm...

MR SPEAKER

Onorab.

HON JOHAN LOZE

Akoz en politisyen ti pe *harass* li.

(APPLAUSE)

MR SPEAKER

Onorab, Onorab, sa komanter napa naryen pou fer avek *Bill* silvouple.

HON JOHAN LOZE

Mon pe adres kestyon ki'n ganny leve...

MR SPEAKER

Silvouple *get to the Bill*

HON JOHAN LOZE

Mon pe adres kestyon ki'n ganny leve la dan Lasanble la Mr Speaker.

Mr Speaker, sa i pa premye *Private Members Bill* ki vin devan Lasanble. Nou parti atraver *Leader* Lopozisyon i anmenn en *Bill* ki pou adres sityasyon Lasanble atraver lamannman Konstitisyon.

E serten dimoun annan problem ek sa ki nou pe fer e sa i sa bann menm dimoun ki'n siport dan lefase 3 *Private Members Bill* ki'n vers sote \$6 mil lo kont biznes zot dalon.

Nou napa okenn...

MR SPEAKER

Onorab, mon'n dir pli boner ki mon pa pe aksepte bann

alegasyon, bann... koz lo Lasanble *content* sa *Bill* silvouple.

HON JOHAN LOZE

Mr Speaker, mon *challenge* ou form en Komite Lenvestigasyon pou *investigate* e mon a donn ou tou lenformasyon mon a dir ou lo kont ki lakonpanyen sa larzan...

MR SPEAKER

Onorab, mon dir ou mon pa aksepte sa kalite diskour, Onorab...

HON JOHAN LOZE

Sa kalite diskour Mr Speaker...

MR SPEAKER

Onorab, mon'n donn ou ase *warning* ase lesplikasyon...

HON JOHAN LOZE

Mon a fer en lot kalite diskour Mr Speaker.

MR SPEAKER

Mon'n donn ou ase *warning* ase lesplikasyon mon pou pas lo prosen Speaker.

HON JOHAN LOZE

Anr ou pe koup mwan...

(comments off-mic)

MR SPEAKER

Onorab Loizeau ou annan laparol

HON JOHAN LOZE

Vwala problem ki annan, Vwala problem ki annan dan sa Lasanble

MR SPEAKER

Onorab.

HON JOHAN LOZE

(comments off-mic)

Lala prob...

MR SPEAKER

Onorab Loze ou a sorti dan lasal silvouple.

(APPLAUSE)

MR SPEAKER

Mersi. Onorab... napa person ki'n dir nenport kwa mwan ki soz lo la.

Onorab Loizeau ou annan laparol.

HON NORBERT LOIZEAU

Mersi Mr Speaker.

Bonzour tou dimoun Mr Speaker, mon, monn ekout tou dimoun mon pa'n *disturb* person mon panse ma ganny en pti letan pou mon kapab dir mon pti keksoz dan trankilite.

Mr Speaker, mon'n asize trankilman depi byen bomaten...

MR SPEAKER

Prosede Onorab, ou annan 10 minit.

HON NORBERT LOIZEAU

Wi. Mon pa'n *disturb* personn e mon'n ekout tou bann latak ki plizoumwèn vize ver ou avek Onorab Henrie.

Mr Speaker, ler mon'n tann sa bann latak mon, mon leker in fermal ou konnen akòz? Ou en zonn sarz, ou en zonn ki ki'n travay pou anmenn la demokrasi dan Sesel.

Me mon konman en zenn ler mon ti antre dan politik ou ti en dimoun ki ti akonpany mwan pou nou anmenn sa lalit pou anmenn la demokrasi Sesel Mr Speaker.

E mon fyer de se e sanmenm sa ki mon leker i fermal Mr Speaker, akòz ou 40 an ou lavi ou'n viv dan en fernwar terib Mr Speaker, ou pa'n en dimoun ki'n ganny sans rezouir lavi pou al *disco*.

Parey lezot ti kapab fer Mr Speaker, ou ti ganny bate met dan kaso, met dan prizon zis akòz ou ti pe lager pou tou sa bann dwa fondamantal ki mon tann bann Manm lo lot kote

latab pe koz lo la ozordi Mr Speaker.

Ozordi ler ou pe rezouir sa pozisyon atraver sa travay ki ou'n fer pou nou pei ariv kot i ete ou pe ganny akize Mr Speaker, dan diferan fason.

E mwan, mon pa pou akiz ou Mr Speaker, mwan anvi felisit ou pou sa travay ki ou'n fer!

(APPLAUSE)

HON NORBERT LOIZEAU

Mon anvi felisit ou Mr Speaker, akòz si ozordi nou kapab koze libreman se sa travay ki ou'n fer e ou pa'n zanmen les tonbe ou.

Malgre tou sa bann lensilt, met dan kaso, met dan prizon Mr Speaker, ou'n kontiny sa larout pour anmenn Sesel kot i ete ozordi.

Mr Speaker, ozordi mon tann bokou pe koz lo nou *motto Serving a Modern Democracy*.

Mr Speaker, nou omwen nou annan enn sa *motto*. Dan letan ler zot ti o pouwar ti annan en *motto* pou Lasanble Nasyonal? Zanmen mon'n war Mr Speaker.

Ler nou'n vini mon'n tann Linite dan Diversite la ozordi mon war *Serving a Modern Democracy*. Be ozordi atraver sa tenm Mr Speaker, ou koman

Speaker mon war ou pe fer en keksoz sitan byen mwan.

Eski ou pe diriz Lasanble zis ou? Pa ou pe partaz, ou pe partaz responsabilite ou dan sa demokrasi modern ki nou pe koz lo la.

Ozordi Sekretarya, bokou travay Sekretarya se lekel ki fer? Ou? Se Madanm Clerk. Tandi ki lontan Mr Speaker, se Speaker ki ti ansarz, Speaker ki ti swazir.

Mon rapel bann lepok Speaker Herminie, Speaker ki ti swazir travayer pou vin travay kot lasante. Ou ti bezwen siporte *US*, en aktivis ouswa ou manman ti konnekte, ouswa zot ti annan kek konneksyon personnel ek sa ki ti ganny sans vini.

Be lekel ki swazir travayer Lasanble ozordi dan sa demokrasi modern? Ou? Ou pa ni menm enterfer dan travay ki Madanm Clerk i fer e serten bann travayer i dir Speaker enterfer, Speaker i dir non. Mwan, mon pe fer mon bout les Sekretarya fer son bout.

Sanmenm sa, sa demokrasi modern Mr Speaker, ki nou, nou pe koz lo la.

Onorab *Leader* minoriter Mr Speaker, in dir en ta keksoz bomaten in koz lo Onorab, Ramkalawan ler i ti dan Lasanble Nasyonal in dir ki

fodre pa Speaker i vin *leader*; i pa en *leader* parti pou vin Speaker; napa keksoz ki i pa'n dir.

Mr Speaker, en keksoz ki *Leader* Lopozisyon i bezwen konnen, ler nou, nou ti dan Lopozisyon, nou ti pe fer tou pou nou ganny serten lavantaz konman en Lopozisyon, nou pa ti gannyen avek zot ek parti o pouvwar. Nou pa ti gannyen.

E i normal ozordi Mr Speaker, ki zot, zot pe rode; zot dan Lopozisyon fer son travay. Me selman i pa vedir ki sa ki zot pe vin rode zot pou gannyen. Non Mr Speaker, se nou ki an mazoriter.

Zot kapab demann, mon ti demande Mr Speaker, mon rapel dan katriyenm Lasanble ti annan 11 Manm napa ki nou pa'n demande.

Nou ti demande pour ki *Leader* Lopozisyon i vin *Chairman FPAC* zot ti dir nou non ! Kan ki sa in arive?

Ler nou wi, ler zot ti paren en lot dimoun zot ti fer vin dan Lasanble, la zot ti fer sa parey Onorab William in dir pou sey ferkwa ek lemonn enternasyonal konmkwa i annan la demokrasi Sesel Mr Speaker, kan ti napa.

Sanzman Mr Speaker, ozordi nou pe koz sanzman. Sanzman ler zot dan

Lopozisyon ki zot anvi fer sanzman Mr Speaker?

Be nou depi lontan nou pe rode sa bann sanzman, zanmen nou'n gannyen, zanmen nou'n gannyen.

Onorab Aglae atraver ou Mr Speaker, in koz lo proteksyon minoriter; i annan in koz lo privez *Leader* Lopozisyon son privez si i gannyen.

Mr Speaker, nou Prezidan Ramkalawan ou konnen kan ki i ti ganny son privez bann privez konman *Leader* Lopozisyon? Ler nou ti an mazorite dan Lasanble.

Se la ki nou, nou ti ganny tou sa privez akoz nou ti an mazorite e zot, zot ti an minorite.

E Onorab, Pillay pou ganny bann privez tan ki ou dan minorite ou pou reste la dan minorite...

(APPLAUSE)

HON NORBERT LOIZEAU

Zot a reve Mr Speaker, eksa 2000 zanmen zot pe rod 2025? Pa 2025 ki zot pe reve 2000 zanmen.

2000 zanmen en ta letan Mr Speaker, la ou a ganny ou privez akoz tou sa bann keksoz ler ou, mon rapel ou ti

deryer Lasanble san pousan 25/0 zis zot ti lev lanmen.

Apré zot dir nou *rubber stamp*? Lev lanmen. Nou ti lager pou Lalwa *POA Public Order Act* – li menm li Onorab *Leader* Lopozisyon i ti lev son lanmen i ti dir non.

Zafer ti al ankour nou'n seye ziska ler nou vin dan Lasanble avek en mazorite 15 lo 10, ki sa i pase ozordi kapab koze. I pe koze Mr Speaker. I pe menm tro koze i pe telman servi sa laliberte lekspresyon ki li i ti vot kont pour li kapab fer tousala ozordi Mr Speaker!

(APPLAUSE)

HON NORBERT LOIZEAU

Ozordi Mr Speaker, tann zot Mr Speaker, ozordi *US* se parti ki pe koz lo la demokrasi.

Mr Speaker, be la demokrasi. ti annan en serten letan ti'n mor Sesel. 5 Zen '77 la demokrasi ti ganny touye Sesel ti mor Mr Speaker, nou konn tre byen.

Kot apre ou ti anmenn sa lalit Mr Speaker, sanmenm sa ki ti fer ou al dan kaso, dan prizon pa viv ou lavi konman en zenn.

Ozordi ou'n ariv en dimoun ase a laz ou pe sey retras ou semen ki ou'n perdi pandan ou letan zenn tan ki sa

bann keksoz, ki sa bann dimoun in fer ou Mr Speaker.

La demokrasi. an '77 Mr Speaker, ti mor kot dimoun ti ganny dir kite ale, al egzile ozordi nou pe koz l la demokrasi?

E ozordi Mr Speaker, sa menm parti ki pe koz l la demokrasi pa get ler Mr Speaker, mon pou kourt mwan.

(laughter)

HON NORBERT LOIZEAU

Sa menm parti ki pe rod la demokrasi. ozordi zot pe onor 15 Zen, zot pe fer legzibisyon pourtan 5 Zen ti en zour nwar dan listwar Sesel Mr Speaker, zot ki pe koz lo la demokrasi, ozordi kan nou, nou'n lager pou anmennen.

E zot, zot pe selebre zot dir zot nouvo Mr Speaker, selman zot annan 60 an.

(laughter)

HON NORBERT LOIZEAU

Zot ne gran, zot mor ti pti Mr Speaker, ki mannyer nou kapab konpran sa Mr Speaker?

E ozordi Mr Speaker, atraver ki ler la demokrasi ti ganny zet dan bin an '77 Mr Speaker, ozordi ki nou war *TRNUC* in vini, kot bann dimoun i vin plennyen kot

konpansasyon pe ganny demande par sa bann dimoun ki'n ganny afekte.

Me malgre sa Mr Speaker, *US* ki koupab Mr Speaker, ni en kontribisyon i pa le fer dan sa fon Mr Speaker, pou ed sa bann dimoun ki'n ganny afekte.

Mr Speaker, ozordi an terminan nou pe koz lo *freedom of speech*, *Leader* Lopozisyon i dir napa Mr Speaker, me selman i pe koze. Napa? Be zot tou zot pe koze. La Onorab Loze fek dir bann alegasyon pa in dir? Nou pa'n bat li.

Selman i pa relye avek kek Mosyon nou *Bill* ki nou pe koz lo la, ou'n met li deor Mr Speaker.

Be dan letan ki zot ti o pouvwar Mr Speaker, ti annan *freedom of speech*? Mr Speaker, mwan, mon rapel mon'n dan katriyenm Lasanble mwan.

La mon pou troun lo Speaker mon Onorab Pillay mon a troun lo *Bill* mon a koz lo Speaker pa ou - lo Speaker Herminie.

Mr Speaker, be mon ti en zenn politisyen ansanm ek Onorab Arissol, Onorab Henrie Mr Speaker, nou ti ganny *bully*. E Mr Speaker, pa krwar ou pou vin koz lo enn bann madanm ki ti dan Lasanble Nasyonal ler zot, zot ti pe maltret nou sa letan.

Onorab Speaker pa get ler Mr Speaker, mon pres pou mwan fini - reste mwan zis de pti laliny.

MR SPEAKER

10 minit Onorab.

HON NORBERT LOIZEAU

Ou ti pou ganny *deal* avek Mr Speaker, ou ti ganny *deal* avek aköz ti protez tou son Manm. I pa ti parsyal - i ti enparsyal; i pa ti enparsyal Mr Speaker, o kontrè i ti parsyel. I ti sipòrt tou son Manm e nou Mr Speaker, nou ti ganny met deor – *out!*

Nou ti ganny met deor e ler nou ti *walk out* ouswa ler i ti met nou deor Mr Speaker, i ti koup nou lapey malgre ki *Standing Orders* i permet. *Walk out* i form parti.

Ozordi Mr Speaker, ou pe koup zot larzan Onorab Loze in ale la ou pou koup son larzan? Mr Speaker, mwan mon larzan ti ganny koupe...

MR SPEAKER

Konklir Onorab.

HON NORBERT LOIZEAU

Wi an konklizyon Mr Speaker, donn mwan de pti minit parey ou ti donn Onorab Lemiel ek Onorab Cosgrow mon a dir.

Mr Speaker, an terminan mwan konman en zenn politisyen mon ti ganny afekte ek sa, aköz konman en Speaker i pa ti obzerv nou *Standing Orders* nou ti dir li “Gro Kannon “ Mr Speaker.

(laughter)

HON NORBERT LOIZEAU

Nou ti dir li en ‘Gro Kannon “ aköz i ti dominer.

Mr Speaker, an terminan mon anvi dir ki mwan, mon pa pou vot sa.

Mon pa pou vot sa ou konnen aköz Mr Speaker, aköz byento Onorab, Pillay i pour le tou sa ki i dir nou, nou fer.

Byento la ou konman Speaker, ou pou ganny demande pou vin dan en gro konsonn blan en semiz, *tab* abiy ou konman en lanz pour ou vin la.

(laughter)

MR SPEAKER

Ok.

HON NORBERT LOIZEAU

Alors ou pou bezwen akseptè.

MR SPEAKER

Onorab, ale.

HON NORBERT LOIZEAU

Mr Speaker, an terminan mwan anvi dir ou, ou pa pe sorti ou a sorti ler ou anvi, ler nou, nou a dir ou sorti ou a sorti, ler ou, ou anvi sorti ou a sorti.

E nou, nou pou siport nou akoz sa lalit ki ou'n anmennen ou bezwen rezouir sa pozisyon...

(APPLAUSE)

HON NORBERT LOIZEAU

Akoz ou en dimoun ki'n travay pou anmenn la demokrasi isi dan Sesel Mr Speaker. Mersi.

MR SPEAKER

Mersi Onorab. Onorab Gill ou annan laparol.

HON CHURCHILL GILL

Mersi Mr Speaker. Bonn apre midi tou dimoun ki pe lekout nou.

Mr Speaker, ou a permet mon vi ki lafet Konstitisyon ti osi ganny fer Praslin ek La Digue e ou'n dekrir sa ki Onorab, Henrie in dir konman en *mank of duty*.

Dimoun Praslin tou ti a kontan konnen tou sa ki ti met dan *manifesto* ki Onorab, ti dir pri lavi i ser ki Mosyon pa ti ganny *kidnap* e ki manner ou pou dekrir sa ou si sa osi i en *mank dan duty* vi ki zot *manifesto* se zot ki ti fer.

(APPLAUSE)

HON CHURCHILL GILL

Mr Speaker, Konstitisyon Sesel i tre obzektif fan la fason ki'n ganny ekrir.

I byen kler pou enterpretasyon donk i fasilite son laplikasyon dan en fason konkret e koman rezilta nou devret vwar proses bon gouvrenans dan nou pei Sesel sirtou ant Lezislatif, Zidisyer ek Legzekitiv.

Dan Konstitisyon Sesel lartik 83 i eksplik klerman fason ki en Speaker e Deputy Speaker i devret desarz zot responsabilite ler zot okip sa lofis.

Sa se avek tou lentegrite dan tou lenparsyalite e dan lentere tou sitwayen Seselwa, asir rann kont par Gouvernman dan lentere tou Seselwa.

Lofis Speaker e Deputy Speaker pa devret zis an teori ganny dir ki zot bezwen desarz zot responsabilite dan en fason drwat e dan lenparsyalite.

Me sa de lofis i devret ganny vwar pe fer li dan la pratik sirtou dan sesyon *Sitting* Lasanble Nasyonal.

Premyerman parey i le ka an traver lemonn travay Manm Lasanble se pou koze, alor ki manner Manm Lasanble pou

koze, si Speaker e Deputy Speaker dan Lasanble Sesel ozordi zot tanzantan koup mikro Manm *United Seychelles* ler zot pe *Chair Sitting* Lasanble ?

Dan sesyon *PNQ*, dan sesyon kestyon lezot Manm, dan moman kestyon siplemanter, ler deba pe ganny fer lo serten Mosyon, lo *point of order* lo *matter of privilege*.

Seselwa i vwar byen kler Seselwa pe observe avek gran pasyans a *la fois* avek gran regre ki Speaker e Deputy Speaker i kontinyelman kre kondisyon dan letan kestyon swa ek bann Minis, oubyen Vis Prezidan, pou zot pa fini reponn kestyon termin sesyon kestyon e fer zot ale.

Ki mannyer nou apel sa? Seselwa pa ganny sans fini ekout lesplikasyon lo kestyon ki'n ganny demande, sa fason fer i al kont lartik 83 dan nou konstitisyon ki dir.

Speaker e Deputy Speaker zot oblize desarz zot responsabilite dan lenparsyalite dan lentere tou Seselwa.

Kestyon kwa ki fer zot pa desarz sa responsabilite dan lenparsyalite eski Speaker e Deputy Speaker pe ganny *micromanage*?

Eski Speaker e Deputy Speaker pe egzekit lord ki zot in ganny dir fer.

Eski nou Lasanble i endepandan avek Legzekitiv? Lafason ki travay nou Lasanble pe deroule i difisil pou krwar si Lasanble Nasyonal pe ganny administre dan en fason endepandaman.

Seselwa in elekte mazorite Manm dan sa Lasanble lo kote parti ki dan Gouvernman.

LDS swadizan pou vin defann zot lentere fer tande zot lavwa, rod sa ki meyer pou zot, defann zot ler i nesese sirtou lo kestyon bann Lalwa ki vin dan Lasanble sorti kot Gouvernman ler i pe afekte zot.

Me ki nou vwar? Tou sa ki Gouvernman i anmenn devan okenn kestyon zot pa demande, tou sa ki vini i *ok* pou zot tou, zot vot wi.

Zot pa enterese si ou ti met zot la pou defann ou lentere, zot priyorite se zot Gouvernman zot mesaz i kler.

Ou ki ti vote ou ava pas kot ou ler pres eleksyon 2025, Seselwa pa fer sa fot ankor apre ki zot in trenn ou dan labou, kit ou ater zis felisit zot Gouvernman e zot Minis, e dir ki tou i byen.

Me ou ki viv sa realite lavi toulezour eski i vre ki tou i byen? Repons i non. Akoz depi

2020 zot in les ou manz ou margoz anmer, lavi i tris, lavi i malere pou en gran poursantaz Seselwa ordiner.

Nou Manm *United Seychelles* ler nou kestyonn sa ki vin devan nou, nou ganny anpese ler nou ensiste nou *micro* i ganny koupe. Se pour sa rezon ki *Leader* Lopozisyon Onorab Sebastien Pillay in anmenn sa Prozedlwa devan.

Pa zis akoz i senp, me akoz in touzour prensip parti *United Seychelles* pou debout pour tou Seselwa dan tou lenstans ler i neser pe enport si nou an minorite.

Sa latitud dominer, diktater ki pe manifeste dan Lasanble pa kapab pa kapab kontinyen.

(APPLAUSE)

MR SPEAKER

Onorab, Onorab, Onorab, *retract* sa. Mon pa dakor avek latitud diktater, dominer, *retract, retract*.

HON CHURCHILL GILL

Eski se sa ler ou pe sey eksplik en keksoz...

MR SPEAKER

Retract Onorab, *retract*.

HON CHURCHILL GILL

Mon *retract*.

MR SPEAKER

Mersi kontinyen.

HON CHURCHILL GILL

Mon espekte ki sa ki'n dir mwan *retract* li i pa pratik sa...

MR SPEAKER

Onorab, sa Onorab, sa i mank respe pou Speaker *apologies; apologies*.

HON CHURCHILL GILL

Mon *apologies* e...

MR SPEAKER

Silvouple kontinyen ek ou *speech* e gard li annord.

HON CHURCHILL GILL

Wi, mon espekte sa lamannman ki pe ganny demande, nou ava vwar keksoz pli byen dan sa Lasanble ki nou pe vwar ozordi.

(APPLAUSE)

HON CHURCHILL GILL

Malgre nou an minorite 10 Manm, nou ankor annan kapasite pour reflexir.

Kapasite pou analize e konpran sityasyon tre byen, nou konn bezwen nou pep e nou pou kontinyen debat e delivre pou sa pep.

Kontrerman avek kote *LDS* avek son mazorite ki pe refize pou delivre pou sa pep Seselwa zot vreman pe defann lentere zabitan.

E nou, nou ti a swete ki sa i ganny fer dan tou son lenstans me malerezman tou sa ki vin devan Lasanble nou vwar nou Manm *United Seychelles* ki pe debout e pe defann tou sa ki annan pou defann e sa Seselwa i note e i tre kler dan zot lespri.

Sa amannman pe demande ki Speaker e Deputy Speaker zot sorti konman *leader* e Sekreter Zeneral parti politik enn fwa ki zot in aksepte pou desarz responsabilite konman Speaker e Deputy Speaker.

Sa lenstitisyon apele Lasanble Nasyonal Sesel e sa i pou osi aplik pou *Leader* Lopozisyon dan evantyalite ki vin Speaker oubyen Deputy Speaker sa lenstitisyon Lasanble Nasyonal.

Sa pozisyon i parey in ganny prevwar dan lartik 84(b) dan Konstitisyon Sesel.

Onorab Pillay, mon pou donn mon sipor sa lamannman akoz mon konsider li konman en pa tre enportan pou fitir nou Lasanble Nasyonal.

Mon osi konsider li konman en pa tre enportan ver aprofondisman proses

demokratik modern pou brans lezislatif Sesel.

E sa i ava an konformite sityasyon ki ganny trouve isi devan anler lo batiman nou Lasanble Nasyonal *Serving a Modern Democracy*.

Me malerezman isi menm anndan...

MR SPEAKER

10 minit Onorab.

HON CHURCHILL GILL

Dan sa Lasanble Nasyonal Speaker e Deputy Speaker pe distans nou avek bann prensip nob ki karakteriz pratik en Lasanble ki pe vreman *serve a modern democracy?*

Alors kestyon, eski anndan dan sa Lasanble nou pa pe pratik *serve no modern democracy?* Mersi.

(APPLAUSE)

MR SPEAKER

Mersi Onorab. Mon a donn laparol Onorab Larue.

HON FLORY LAURE

Mersi Mr Speaker. Bonn apre midi tou dimoun.

Mr Speaker, nou pe war devan nou en *Bill* ki pe ganny anmennen *Private Members Bill* ki pe demann nou pou regard *status* nou Speaker e nou

Deputy Speaker, an relasyon avek zot pozisyon dan en karyer ouswa en lavi politik.

Nou'n ganny dir par *Bill* e Onorab, Henrie in eksplike ki kekfwa i pa ase kler letan nou dir en *leader* dan ki *capacity* ki en dimoun i en *leader* - savedir i deza dan sa i pa kler.

Me solman nou bezwen, lefe ki sa *Bill* i pe target direkteman bann afilyasyon politik ki en dimoun i kapab annan, nou bezwen osi regard nou kad politik ki nou ladan koman en pei.

Konman en pei, nou vwar ki nou annan en sistenm kot nou annan en sistenm Prezidansyel e nou'n tann nonm *the House of Commons Langleter*. Kot li i en sistenm parlamanter.

E nou vwar bann Minis zot sorti dan sa, zot sorti dan Parlman e i fer ki en kalite sistenm ki mars diferan ki sistenm Prezidansyel. Nou dan nou kote, nou 3 lebra i separe endepandan, ki fer ki koman ou *status* koman *Speaker* i en *status* spesifik.

Me lefe ki nou pe koz politik, eski si en dimoun i pa en *leader*, me i sorti dan en parti politik, eski nou pou kapab dir ki sa dimoun pou montre son apartenans avek

son parti letan i asiz dan Sez Speaker?

Si nou get en sistenm ki diferan Sistenm Prezidansyel avek en sistenm Parlmanter, nou sistenm i diferan, nou vwar ki atraver lemond nou'n - sa deba in komanse pou montre enparsyalite dan biro Speaker ki i annan sa separasyon avek en parti politik si i en *leader*.

Me eski i en keksoz ki pratik? Eski en keksoz i kapab en ideal, me eski i pou pratik dan nou fason ki nou, nou travay ? Sa demann ki pe ganny fer avek nou, e nou pe ganny dir ki *US* ki pe fer sa propozisyon atraver Onorab Pillay, ki zot pe baz li ouswa zot in ganny pouse pou anmenn li akoz zot pep baz li lo nou *motto* "*Serving A Modern Democracy*"

Mr Speaker, dan en kad politik nou bezwen osi gete lekel ki pe anmenn sa propozisyon. En parti ki ti en parti sosyalis, e en parti ki pou en gran kantite letan ti anba en sistenm diktater.

Ozordi i menm parti ki letan nou regard zot listwar, e menm dan zot listwar resan zot ankor pep glorifye zot per fondater.

Me selman zot ti'n dir nou ki zot en nouvo *US* e zot pe koz la ozordi for lo kote demokrasi, i montre ki zot annan en

konfizyon Mr Speaker. Ou bezwen annan en lidantite ; ou bezwen kapab pe pratik ou krwayans a labaz.

So, deza mon war i annan en problem. En parti politik avek sa kalite idantite i vini i dir ou koumsa ki zot pe lager pou sa Lalwa vin devan. E fodre nou siport zot ladan, akoz zot pe servi sa defans ki zot pe, zot annan en lide pou al dan laliny *Serve a Modern Democracy*.

Sa nou bezwen kit li la, e nou bezwen *remind* piblik ki letan Parti US i servi sa mo “demokrasi” nou bezwen get byen ki zot pe rode e akoz zot pe fer li.

E lefe ki zot parti i sorti dan sa sirk kominis, sosyalis. Eski zot lide i kler? Eski zot konnen kwa ki zot pe demande? Eski nou kapab *trust* ki zot anna lentegrite dan zot bi, ouswa zot pa zis pe target spesifikman 2 dimoun olye 2 lofis?

Mr Speaker, an relasyon avek ou pozisyon, nou pou vwar ki dan nou Konstitisyon i dir ki nou pou annan en Speaker, ek en Deputy Speaker.

E i donn nou lafason ki ou pou ganny elekte. E sa i dir nou i sorti dan nou *Standing Orders*. So, si nou pe koz lo lafason ki ou anmenn ou travay dan enparsyalite e lendepandans

avek en parti politik, nou bezwen vwar ki ou menm ou avek Deputy Speaker zot napa laliberte total pou fer marse Lasanble Nasyonal dan en fason ki zot, zot oule.

Ozordi dan deba Mr Speaker, menm ki Seselwa pe war ki en kantite Manm espesyalman lo lot kote latab napa respe pou ou, pou ou biro, pou ou sez e pou ou koman nou Speaker. Nou pou vwar ki bokou fwa, ou donn zot en kantite *leeway*. E an plis ki sa ou donn zot bann *warning*.

Mr Speaker, tou sa bann keksoz ki ou dir zot i sorti dan *Standing Orders*. Premyerman, nou’n ganny mansyonnen depi bomaten ki dan seksyon 8 i donn nou ou kad ki ou fer dan diferan rol.

E ladan 8, 5 i dir ou ki desizyon ki Speaker, ouswa Deputy Speaker i fer lo en *point of order* i final. E sa *point of order* la ki souvan ki kekfwa piblik i ganny, i tande i ganny ekrir dan sa *Standing Order*.

Alor, letan en Manm pe fer en i pe entervenir lo en keksoz, nou ganny gide par sak letap nou travay par nou *Standing Orders*. Premyerman par sa *point of order* li menm anba seksyon 49 ki en Manm i kapab anmenn.

Ankor finalite desizyon Speaker, i anba Seksyon 50. Anba bann aksyon i relevan e bann *gross disorderly conduct* i anba seksyon 51. Tou sa bann keksoz kot ou *name and suspend Members* tousala Mr Speaker, i dan *Standing Order*.

Nou'n tann bann ki dir koumsa lefe ki ou tenny zot *microphone*, i fer ki ou pe pik lo zot. Mr Speaker, be anba Seksyon 57 i koz lo *time and manner of speaking*.

I dir ki anba 57(12) *the ruling of the Speaker has to time shall be final*. Savedir ou pa pe pini zot. Nou tou letan nou komans koze nou'n ganny dir nou annan 10 minit, nou annan 7 minit.

Nou konnen sa, i pa en preferans ki letan 1 in ariv 7 minit i ankor pe koze, ou *remind* li son letan ou koup son *microphone* ki ou pe pini li. So, ennler kekfwadeba ki mon'n tande la bomaten i pa egzakte man pe fer zistis.

E mon santi ki nou'n perdi nou en loportinite, pou eksplik Seselwa ki letan nou pe koz lo ou biro e mannyer ou fer ou travay enparsyalite i pa neserman dan ou aksyon ki ou fer dan kad ou lofis Speaker.

Akoz ou ganny gide e ou ganny limite par *Standing Order* lo ki mannyer ou pou *deal* ek en

Manm e ki si sa ki ou pe fer. E lefe ki nou'n mank sa loportinite pou fer sa pwen lo *Standing Orders*, eksplik Lepep Seselwa. Mon krwar bann Manm lo lot kote latab in mank sa letap.

Mr Speaker, mon santi ki enn bann keksoz ki sizyenm Lasanble ti anmennen, i sa laliberte pou eksprim nou lekor premyerman koman Manm. E dezyenman, nou'n kapab donn sa laliberte nou pep.

E atraver sa *Bill* ki pe anmennen la. Mon pa santi ki sa *object and reasons* zot in dir nou zot pe fer i pa korek. Sa lyen politik ki deza dan nou Parlman i kler, akoz nou sorti dan en parti politik. Okenn dimoun ki pou asiz dan sa Sez pou annan sa lyen politik.

Alor mon pa santi ki pou le moman dan nou kad ki nou, nou ladan ki i aplikab. I en ideal wi, me selman i pa aplikab dan nou travay isi dan nou Lasanble.

Mr Speaker, mwan mon pa pou siport sa *Bill* dan son form ki i ladan. E mon pa pou vote. Mersi.

MR SPEAKER

Mersi. Laparol pou Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun ki pe ekout nou.

Mr Speaker, mon kontan letan Onorab Churchill Gill in koze. In dir avek nou kantmenm zot en minorite zot annan abilite pou zot kapab reflesir. Letan sa menm Onorab Gill ki ti anmenn en Mosyon dan Lasanble Nasyonal konsernan dimoun Praslin an relasyon avek pri lavi.

I bliye ki li menm li i ti taye dan Lasanble Nasyonal, i ti kit son Mosyon avek nou. Nou ki ti fini koz lo son Mosyon, ni en *Right of Reply* sa Mosyon pa ti gannyen sa zour.

E nou ti menm pran son Mosyon met dan en goni pou nou donn li kot *flag raising* Praslin, *still* i pa ti vini. Apre i vini i dir ek nou zot annan abilite pou zot reflesir konnen kwa ki zot koz lo la Mr Speaker.

Ozordi nou'n ganny en *Private Members Bill* ganny anmennen dan Lasanble Nasyonal, pe ganny targete pou ou as Roger Mancienne lo sa Sez ki ou asize. Napa lot deba Mr Speaker, e avek Onorab Henrie ki asiz o bor mwan.

Ou konnen akoz? Parske *US* i fay, zot fay zot in fini war defet pe arive menm avan eleksyon i vini. Ler zot ti fer zot *rally* Anse Aux Pins zot ti anbet

dimoun, dir ek dimoun pou annan sirpriz. Mr Faure pou la, Mr Adam pou la, alor plizyer dimoun in monte.

Ler zot in realize, zot in analiz zot in war bann dimoun ki dan laplenn se bann dimoun ki ti vin bwar, vin manze ki pa ti pe ekout zot *speech*, zis akoz ti en aktivite nasyonal bann dimoun ti vin laba.

En *meeting* irzan i ganny organize, la zot in realize poudir dan laplenn ti annan en pti minorite dimoun ki vreman siport zot e ki pa pou vot pou Patrick Herminie dan prosen eleksyon. Alor, ler zot in analiz sa zot anmenn en *Bill* dan Lasanble Nasyonal pou lager prezan avek Speaker Lasanble - ozordi sa *Bill* ki nou pe diskite lo la.

Zot fer legzibisyon kot *ICCS* an relasyon avek Mr Rene montre listwar. Selman i annan en bout listwar ki zot bliye ki vin avek. Hassan Ali, Hoffman, Gerard Hoareau, zot devret met sa bann dimoun o bor sa legzibisyon. Parske sa bann dimoun i form par le 5 Zen 1977 ler bokou disan ti ganny verse. Zot pa koz lo la.

Konbyen dimoun ki'n vin legzibisyon? 4, 5, 6 dimoun avek *Tinky Winkie* i prezan. Sa i fer ki zot realiz tousala zot, prezan zot vin dan nou

Lasanble Nasyonal zot vini zot dir avek nou "Speaker pa bon" –" Speaker pe fer koumsa."

Me Mr Speaker, mwan mon'n dan Lasanble depi 2007 Lasanble ti ankor kot *National Library*. Lekel pli gran *bully* ki mwan mon'n fer fas avek koman Speaker Lasanble Nasyonal Sesel? Mon a dir ou manner i apele - Patrick Herminie.

Li ki ti dan Lasanble Nasyonal. E ozordi ler nou, nou'n ganny en mazorite dan Lasanble Nasyonal i annan en kantite keksoz ki'n sanze. Zot pa koz lo la *US* zot.

Ler Patrick Herminie ti Speaker, bann Komite Lasanble ti konpri 7 Manm. Ti annan 5 zot sa letan koman parti mazoriter, ti annan zis 2 nou lo nou kote koman parti minoriter sa letan. Me ozordi ki sanzman in arive? Ou konnen ki nou fer nou? Nou donn zot 3, nou, nou pran 4 pou nou. Dezyenm legzanp, annou get bann Komite bann *chairmanship*.

Lontan zis zot ki ti *share* tou bann Komite, parski zot ki ti annan en mazorite absolli. Nou ozordi ki annan en mazorite absolli, konnen ki nou fer?

I annan Komite *Leader* Lopoziyon ki *Chair FPAC*, *COGA* se Onorab Lemiel ki

Chair. Sel Komite ki zot tou zot lo la *Chair* pa Onorab Pillay avek Vice-Chair Onorab Loze se Komite *Walk Out*. Sa nou pa ladan sa enn, *ok*?

Alor?

E i annan sanzman *HIV* Onorab Aglae ki *Chair*. Kot Lasanble ozordi Komite Madanm, *Chair* pou nou, *Vice-Chair* lot kote. I annan en balans ozordi dan nou Lasanble ler nou, nou'n *win* en mazorite absolli.

Lontan ler zot ti annan en mazorite absolli, avek en Speaker, en *bully* anler ki ti protez tou son bann Manm madanm parey Onorab Loizeau in dir, ou konnen ki bann madanm *SPPF* ti fer sa letan ler zot ganny *walkout*? Zot ti riye,

"*Hey hey hey!*"

Gran riye dan Lasanble Nasyonal ler Mr Patrick Herminie ti a pe mayos nou! Ti a pe *bulldoze* bann parti minoriter!

La ozordi sa menm parti politik ki ti krwar zot pou mor o pouvwar, zot ti fer sir ki sa lakord ozordi ti devret reste dan likou en lot parti politik. Be ou konnen ki'n arive Mr Speaker? Ozordi sa menm lakord i dan zot likou en kou.

Prezan zot kriy lasasen i tro sere, i tro epe, large, ed nou, nou pa kapab respire, pa

bulldoze nou! E zot bliye ki poudir alors en zour zot ki ti an mazorite dan sa Lasanble?

Me akoz ler zot ti an mazorite zot pa ti anmenn tou sa bann lamannman ki nou tann zot pe koz lo la, la? Akoz zot pa ti anmennen? Onorab Wallace i dir ek nou poudir i ti a kontan en dimoun an deor ki vin *Speaker* Lasanble. Akoz zot pa ti anmennen dan zot *Bill*? Akoz i pa anmenn en lamannman li pou li dir sa pou nou ed li dan sa travay ki i pe fer? Non.

Ou konnen akoz Mr Speaker? Akoz zot ankor krwar zot o pouvwar, zot ankor krwar zot o pouvwar. Zot pou vin donn nou lord ki pou fer. Zot ki pou dir nou ki pou fer.

Non, pa pou marse sa. Parey Onorab Henrie in dir si zot anvi nou travay avek zot, zot ava kri nou, zot a met nou asize nou ava fer en travay konsiltasyon, pou nou rode ki mannyer nou kapab anmenn pei de lavan.

Sa bann zafer kot *US* i vini la zis i dikte la, donn lord, montre ledwa, fini, pa pou ariv ankor dan sa pei Mr Speaker.

Se pou sa rezon zot vwar poudir ozordi zot in vin en parti minoriter. E sa kannon pa pou pet ankor li, pa pou pet ankor sa kannon, fini.

Zot vini, zot lager ek ou lo *PNQ*. *PNQ* 1erdtan, *PNQ* in ariv 30 minit. Be ler *PNQ* i fize 15 minit, ou trenn li ankor 1erdtan? In fize, ler i fize i pa pou pete li Mr Speaker. Alor, i enportan pou nou analiz tousala.

Letan Onorab Lemiel i vire i dir ek ou koumsa poudir bann siporter i ankoler. Mr Speaker, mon a dir ou wi, siporter *LDS* i ankoler. Ou konnen akoz zot ankoler? Parske zot war ou, ou tro *lenient* avek zot lot kote.

Ou les zot ek “Ale Onorab demann ou kestyon”,

“ale Onorab donn leksplikasyon”,

“ale Onorab mon war ou’n lev ou lanmen anler”,

“*ok*, Onorab demann...”.

Me lontan anba Patrick Herminie, kote ti pou arive sa? Kote ti pou arive dan nou Lasanble sa?

Kestyon ki nou anmennen ozordi koman *Oral Question*, tou Manm ti annan drwa demann en siplemanter. Ozordi get nou pe lev lanmen Mr Speaker.

“Mr Speaker, mon a demann en pti leksplikasyon silvouple?”

“Mr Speaker, Minis pa’n reponn”.

“Mr Speaker, klarifikasyon”,

“Mr Speaker, klarifikasyon”.
Be kote, ozordi pa ou ki pe fer sa?

Pa ou ki les bann Manm *PNQ* dan Mardi? Ozordi Mr Speaker, ler *PNQ* i fini Onorab Pillay i lev *matter of privilege*. Onorab Pillay li in demann *point of order*. Me ou ki les tousala arive, me par kont *still* zot pa satisfè zot.

Parske zot in fini vwar zot pa pe al okenn par. Zot in pri, zot parti i fay e antre zot, zot konnen poudir dimoun pa kontan Patrick Herminie.

Alor dan Lasanble dernyen fwa zot ti vini zot ti dir ek nou zot, balans Lasanble. Zot komans zwe en lot zwe ek nou la, balans Lasanble, fodre pa i annan en gran mazorite.

Mr Speaker, Lepep Seselwa ki'n donn nou sa gran mazorite, aköz Lepep Seselwa napa konfyans dan Parti *US/SPPF* ki ozordi zot in batize zot in dir ek nou zot *new United Seychelles*.

Selman zot annan 60 an parey Onorab Loizeau in dir, zot devret en pti baba. Zot devret annan leker en zanfan.

Me non, zot sanz zot non avek bi pou dimoun krwar dan zot, pou dimoun kontan zot. Me dimoun i vwar zot.

Sa ki pli enteresan, get anler lo *stage* ler zot fer zot bann aktivite, tou bann dimoun ki zot non in monte dan *Truth* dan rapor ki ou lofis ti donn nou.

Zot tou zot ladan, selman zis zot ki anler. Ou konnen aköz? Parske zot anvi retourn o pouvwar, retourn o pouvwar pa pou get Seselwa zot. Nou'n tandé lot kote ti koz lo *champagne*, zot ti koz lo *caviar*, zot ti anvi entel pas *VIP*. Zot ki ti dir nou, pa nou ki dir ek zot.

Me mwan anvi dir ek zot i annan plizyer zot Manm deor laba ki ankoler, ki fristre, parske zot plas dan Lasanble Nasyonal in ganny pran par bann ki'n regrese in sorti Minis, ozordi in vin Manm Lasanble Nasyonal.

Valmont pe rod pou li, Paul Ernesta pe rod pou li e pa bliye Mr Speaker, letan zot in koz lo *walkout* annou gete lekel bann dimoun ki ou met deor.

Eski ou'n deza met Onorab Churchill Gill deor? Non, parske Onorab Gill i konport li. I lev son lanmen, i rod son klarifikasyon, i demann son kestyon, e i anmenn son Mosyon kantmenm menm i taye pa fini fer son *Right of Reply*.

Me par kont, i annan en pti group dimoun lot kote ki kontinyen fer dezord. E zot, zot

pa'n ganny elekte zot. Zot napa en distrik, prezan pov Onorab Aglae, i bezwen anmas son pake dousman, dousman i pran en pe letan zot 2 Onorab Gabriel parske zot pa anvi *walk out*.

Zot annan en distrik pou zot reprezante e zot in ganny vote elekte pouf er sa. Prezan sa menm group dimoun ki pa'n ganny elekte zot, zot vin avek en *Private Members Bill* prezan zot target ou avek Onorab Henrie. Apre lezot Manm i vini i dir ek nou non, nou pe target sa *seat*.

Non, nou pe target lofis selman zot Manm i vini i al ver ou. E zot dir ek ou dan nou Lasanble nou'n tande plizyer fwa.

“Mr Speaker, ou *bias* !”

“ Mr Speaker, non, sa ki ou'n fer pa byen ou diktater !”

Menm *off-mic* zot dir, me parfwa ou, ou konnen ki ou fer? Ou zwe pa tande parske ou lasazes ou pa anvi lager, ou i anvi fer krwar ou pa'n tande.

Me nou, nou'n tande nou, zis parey bann lensilt ki nou bann Minis i gannyen devan la,

“fodre ou demisyonnen !”

ou napa ledikasyon ou !”

“Pas dan nou Lasanble ou pa konpetan ou, ou pe lalang !”

Mr Speaker, ou konnen kot sorti sa? Kot parti minoriter. Zot fer dan nou Lasanble sa e dimoun i vwar.

Me la ozordi, zot ki pe vini ki pe gele. Zot ki pe plennyen, sistenm pa bon, nou pa pe tro soz.

La zot anvi entrodwir en nouvo keksoz. Me parey zot anvi retourn sa ki zot anvi fer, me sa letan in fini kannon pa pou pet ankor, *PNQ* in fize.

Alor, sa pti gin letan ki reste zot, kontinyen fer zot konpanyy parey Onorab Gill in dir, kontinyen reste lo sa *bus stop* ki bis pa pase. E nou, nou pou kontinyen fer sa travay ki Lepep Seselwa in met nou la pou fer.

Pou nou kontinyen, pa zis anbet zot ek larzan fer krwar pou fer laz Sekirite Sosyal desann, nou pa pou fer krwar nou pou vini pou ouver tiyo non.

Non, nou pou kontinyen reste sa Gouvernman responsab pou ki larzan pep Seselwa pa ganny partaze ankor parmi dalon, zanmi, galan ek fanmir. Non! Fodre nou tou nou travay dan sa pei pou nou ganny sa ki nou anvi.

Se pou sa rezon mon kontinyen dir letan mwan avek tou lezot Seselwa nou pran tou sa ki pou nou, napa naryen mal avek.

Ou konnen kwa ki mal, letan ou pran sa ki pa pou ou sa ki mal Mr Speaker. Sa ki

fodre Seselwa i ganny en konpran. Alor mwan mon ti a kontan termin lo sa not, pou dir lo nou kote latab sa kalite lamannman pa pou kapab pase.

Parske premyerman zot in dir zot menm zot napa en mazorete.

Dezyenmman, zot pa'n konsilte nou.

Trwazyenmman, zot krwar zot ankor dominier.

Be la nou ki la, zot ava vin kot nou zot a retournen.

Mon demann zot pou retir sa *Bill* vini anmennen asize nou ava koze nou a gete ki nou kapab fer parey Onorab Henrie in propoze pou nou asire ki Sesel i bouz lo en lot letap parey Prezidan Ramkalawan pe fer, pou anmenn li lo en lot letap.

Mon ti a kontan profite dir tou Seselwa Bonn Fet Nasyonal e byento nou pou al selebre nou Lendependans.

E mon ti a kontan remersye tou bann fanm ki'n desann Dimans dan nou konvansyon pou selebre Sesel. Mersi bokou.

(APPLAUSE)

MR SPEAKER

Onorab Woodcock.

HON WAVEL WOODCOCK

Mersi Mr Speaker. Mr Speaker, mon pou komanse par de lapar Lasanble Nasyonal demann ou avek mon koleg Onorab Gervais Henrie en senser *apology*. Akoz mon santi Mr Speaker, poudir lentansyon sa *Bill* ki devan nou napa naryen vreman bon, ki *Leader* Lopoziyon pe sey anmennen ozordi.

Sa *Bill* devan nou Mr Speaker, parey entervenans avan mwan in dir ti senpleman pou atak ou, pou target ou, pou denigre ou e osi Deputy Speaker.

Mr Speaker, Lepep Seselwa an antye deor i konnen poudir ou en zonn entegrite. Ou lanmen i prop Mr Speaker. Ler ou met lanmen dan ou pos Mr Speaker, napa en sou larzan Lasanble Nasyonal ki ou'n vole Mr Speaker.

Zanmen ou'n pey en kontrakter dalon pres R1 milyon pou fer travay kot Lasanble Nasyonal ki travay pa'n zanmen ganny fer ki dayer ti lo *FPAC*, sa ti dan letan Speaker Patrick....

(Interruption)

MR SPEAKER

Non. Onorab mon'n dir evite bann lakizasyon ki an deor nou travay Lasanble.

HON WAVEL WOODCOCK

Selman i lo rikord Mr Speaker en, lo *FPAC*.

MR SPEAKER

Kontinyen.

HON WAVEL WOODCOCK

Ok, mon a kontinyen. Mr Speaker, sa lamannman ki devan nou la ozordi i enn ki pirman personnel. En keksoz ki Onorab Lemiel in dir boner, se ki Lepep Seselwa pe kritik lafason ki ou pe zer Lasanble.

Ki an realite Mr Speaker, nou dan nou bann *Blitz* dan nou bann marsayman dan distrik e menm dan nou konvansyon ki nou fek fer Dimans pase, Konvansyon Madanm Mr Speaker, byen plen deborde, ti napa plas pou bann madanm asize, i annan ki ti bezwen esper deor.

E nou prosen konvansyon nou bezwen fer *NSC Hall* Mr Speaker, akoz napa lespas. Ou konnen ki bann madanm i dir Mr Speaker? Ou konnen partou kot ou pase dan distrik ki dimoun i dir Mr Speaker, sirtou bann *elderly* bann dimoun ki pli aze? Zot dir pou dir *Leader* Lopoziyon i malelve Mr Speaker.

Zot pa kontan lafason ki *Leader* Lopoziyon enkli bann Manm Lopoziyon zot ensilte

ou, zot kraz ou, zot mank respe pou ou Mr Speaker. Sa ki Lepep Seselwa pe dir e menm bann dimoun ki sorti dan *United Seychelles* Mr Speaker.

Mwan zanmen mon'n deza tande poudir Speaker Roger Mancienne i lo teren dan en distrik, pe pey dimoun pou vot kont en Kandida Prezidansyel. Zanmen mon'n tann sa bann keksoz Mr Speaker.

Zanmen mon'n tande e zanmen mon'n vwar kot Mr Speaker, pe servi bann *fake profile* parey Rocky Blaster pou denigre son oponan politik Mr Speaker.

Mr Speaker, mwan mon santi ki travay ki ou pe fer dan sa Lasanble i enn ki byen. Zanmen dan listwar Sesel ou'n war Lopoziyon ganny sa liberte pou zot eksprim zot Mr Speaker, parey Lopoziyon pe ganny loportinite pou fer ozordi Mr Speaker. Zanmen Mr Speaker.

E i enteresan, Onorab *ex* Minister Cosgrow in dir pou dir letan ki Herminie ti la, Mr Herminie ti la Prezidan Ramkalawan ki ganny bokou plis loportinite pou koze.

Me an realite Mr Speaker, ki mannyer Prezidan Ramkalawan ti ganny plis loportinite pou koze dan sa bann lepok, kan Lasanble ti

zwenn zis 1 fwa par semenn. Ennler 2 erdtan, 3 erdtan *by* 1 er in fini Mr Speaker.

La ozordi nou pe zwenn 2 fwa. 2 fwa Mr Speaker, an pli ski sa Bidze i ganny depouye dan 1 mwan. Son statistik pa bon Mr Speaker, pa fer en sou sans. Ozordi Mr Speaker, *PNQ* get privez ki ou war *Leader* Lopozisyon i gannyen.

I demann son kestyon lo komansman, tou dimoun dan Lasanble, tou bann Onorab lo tou lede kote latab lo sa *PNQ* zot demann kestyon lo *PNQ*. Ler in fini i retourn kot li ankor pou demann ankor kestyon. Me ki sa kalite privez ki *Leader* Lopozisyon pe gannyen ozordi pe konplent. Pa bon menm, i pa pe ganny drwa eksprim son lekor.

Mr Speaker, ennler i bezwen ou bezwen swiv ou *Standing Order*. E ler bann Manm nou bann Manm nou bann koleg Lasanble i fer move zanfan, ou bezwen *deal* avek zot dapre *Standing Order*. Mwan ou *deal* ek mwan.

Onorab Romain in servi legzanp boner kot ou ti pran aksyon kont en Manm lo nou kote latab. Ou'n deza *deal* avek plizyer nou. Anpes menm *Leader of Government Business raise matter of privilege, point of order*.

Ou'n azir dan en fason enparsyal Mr Speaker. Senpleman Mr Speaker, sa *Bill* ki devan nou la i annan zis en bi. Sa bi se pou atak ou akoz zot pa kontan ou. Sa bi se pou atak Deputy Speaker, akoz zot pa kontan Deputy Speaker.

Ou kapab krwar ozordi dan Lasanble, en, en parti pe anmenn en Mosyon, pe anmenn en *Bill* senpleman zis pou target enn de endividi Mr Speaker. I fer lapenn Mr Speaker. Mon kanmi koman en Manm Lasanble Nasyonal pou en tel keksoz ki pe arive ozordi dan nou Lasanble Nasyonal Mr Speaker.

Oule dir mwan tou sa bann *issue* ki nou annan dan nou pei pou nou koz avek. Tou sa lamannman ki nou kapab propoze pou byennet nou pei e nou pep, nou zabitan, ou ava anmenn en lamannman dan Konstitisyon zis pou atak 2 dimoun? *Shame on you!*

Mr Speaker, mon bezwen dir sa Mr Speaker. E Lepep Seselwa deor la pa kontan sa bann keksoz. I sagrinan Mr Speaker, i enportan osi pou mwan fer resorti i annan sa size Konstitisyon ki'n ganny leve bomaten.

Mr Speaker, vre retour miltiparti Sesel, ler Konstitisyon ti pe ganny

konsevwar premye *draft* Konstitisyon *SPUP* sa letan zot ti an faver en sistenm Prezidansyel. Lopozisyon, ti *DP* sa letan, *SNP* apre, *OU* ti pli an faver en sistenm *Parliamentary System*.

Premye *draft* Konstitisyon letan ti vin devan Lasanble Nasyonal Mr Speaker, ti annan bokou kontansyon lo la. Menm legliz sa letan Levek Felix Paul, Legliz Katolik ti annan 2 pwen kontansyon ki zot pa ti dakor avek dan sa Konstitisyon, parey *abortion* e osi *land acquisition* Mr Speaker.

E Legliz Katolik ti kont sa bann provizyon dan Konstitisyon. Ou konnen ki ti arive Mr Speaker? Sa ti fer ki Levek sa letan Felix Paul ti vin en lennmi Prezidan Rene, kot en let ti ganny anvoye kot Lepap pou tir Levek Monsenyer Felix Paul Mr Speaker Sesel, aköz i ti pe opoz serten *clause* dan sa Konstitisyon. Ti arive sa. Ler dezyenm *draft* ti vin devan Lasanble. Ler dezyenm *draft* ti pou ganny vot lo la atraver *referendum* Lepep Seselwa an gran mazorite Mr Speaker, ti siport sa dezyenm *draft* Mr Speaker.

E menm si Lopozisyon sa letan pa ti an faver, me ler Lepep Seselwa ti fer tande zot lavwa e zot ti dakor pou siport

sa Konstitisyon Mr Speaker, Prezidan Ramkalawan sa letan ti respe sa Konstitisyon.

E i ti debout dan eleksyon an Zilyet, e in respe sa Konstitisyon ziska ozordi i ankor pe respe sa Konstitisyon parey nou tou dan sa Lasanble Nasyonal. Aköz se Lepep Seselwa ki ti vot an faver sa Konstitisyon.

Me zot ki zot fer Mr Speaker? Lazournen Konstitisyonnel zot prefere *boycott* nou Lazournen Konstitisyonnel pa, pa vin bann levennman pou nou *commemorate* sa zour Mr Speaker. Zot pa ti vin *Flag Raising ceremony* Mr Speaker. Kot ansanm avek Lepep Seselwa nou pe rezouir, nou pe donn respe Lalwa Siprenm nou pei.

Mr Speaker, i fer lapenn mon kapab dir i regretan Mr Speaker. I regretab ki ozordi ou en target, ki SG ki Deputy Speaker osi i en target.

Mwan koman en Manm Elekte dan sa Lasanble Nasyonal Mr Speaker, mon pa pou kapab siport en *Bill* ki Mr Speaker ki annan en bi en motiv sitan move. Olye pou anmenn bann *Bill* Lalwa Mr Speaker ki pou benefisye nou pei Mr Speaker. Avek sa 2 mo Mr Speaker, mwan, mon pa pou

kapab siport en tel lamannman dan nou Konstitisyon. Mersi bokou.

(APPLAUSE)

MR SPEAKER

Bon. Mon dernyen entervenman i Onorab Andre.

HON CLIFFORD ANDRE

Mersi Mr Speaker. Mr Speaker, tou Manm ki a lekout. Mon oule anmenn en konotasyon legal e Konstitisyonnel anver sa deba ki la. Letan mon pe get sa lamannman ki pe ganny propoze, i pe dir ki Speaker avek Deputy Speaker i bezwen renons zot pozisyon politik.

Me mon ti a kontan get sa, letan nou get lartik 23 dan nou Konstitisyon i dir,

“Every person has a right to freedom of peaceful assembly and association, and the purpose of this article the right to include. The right of assembly to assemble freely and associate with other person and in particular to form or belong to a political party trade union,” ensidswit.

Mr Speaker, sa i montre ki poudir ou, koman en dimoun, ou annan drwa asosye ou avek en parti politik. Letan nou get lartik 24 dan nou Konstitisyon, i mete ki,

“ Subject to this Constitution, every citizen of Seychelles who has attained the age of eighteen, age of eighteen years has a right to take part in the conduct of public affairs either directly or through freely chosen representative.”

C, 1(c) i dir “to be elected to public office.”

Savedir Mr Speaker, ou avek Deputy Speaker i en proses eleksyon ki'n ganny fer. Alors, zot in ganny elekte pou zot partisip dan en lofis piblik. E sa 2 Lartik 23 ek 24 i tonm anba Sapit 3. Akoz mon pe dir sa Mr Speaker, akoz anba Sapit 3 letan nou pe gete 91, lartik 91 i klerman dir,

“ The National Assembly shall not proceed on a Bill to alter Chapter 1, Chapter III, this article ki 91, article 1(10) or article 11(11) unless the proposed alteration contains in the Bill has been approved on a referendum by not less than 60 percent of votes cast.”

Mr Speaker, akoz mon dir sa, akoz letan nou ep gete lartik ki pe ganny demande pou amande lartik 83 i pe dir ou pa partisip dan en lofis politik kot ou kapab ganny elekte anba lartik 23 ek 24 ki tonm anba Sapit 3. E nou pe dir ki - *I mean* mwan mon pe dir ki 91 i dir ki sa pa kapab ganny fer. Mon pa

pe al lo bann largiman montre lekel lot ki zot in dir, ki zot in fer.

Me selman mon pe vin lo en largiman pirman, pirman legal ek konstitisyonnèl. E sa konteks Mr Speaker, si sa lamannman i ganny pase i pou fer ki en sitwayen Seselwa i kapab anmenn en *case* Ankour, poudir ki poudir sa lamannman i anti-konstitisyonnèl. E mwan letan mon pe get sa, mon war en largiman ki si i al devan en Lakour Konstitisyonnèl i pou tenir delo e Lakour Konstitisyonnèl pou war.

Akoz, i annan par konsekan ki ou kapab fer, ou kapab demann en lamannman ki *infringe* lo drwa en sitwayen. Me ou pa pe demann sa lartik direktèman.

Largiman ki kapab ganny fer i kapab dir nou pa pe demande pou nou amann lartik 23 nor lartik 24. Me selman sa lartik ki ou pe demande pou amande i pe *infringe*, letan ou pe get li lo lartik 23 ek 24.

Alors Mr Speaker, dan sa konteks mon pa pou pran 10 minit mwan. Akoz sa leksplikasyon pou mwan i kler. E mon pou dir baze lo sa, Sapit 3 pa kapab ganny amande san annan en *referendum* ki satisfè 60 pousan.

Alors, lo sa baz mwan koman en avoka, mon pa pou kapab sipòrt en lamannman. Akoz anba la osi Prezidan letan ou'n anmenn en lamannman kot li, i annan drwa refer sa lamannman kot Lakour Konstitisyonnèl.

So, i annan 2 *path* ki kapab ganny pran. Me selman mwan mon pe dir par lefe ki pa'n satisfè 91, *article 91*. Mon pa pou fer zistis mon profesyon, si mon sipòrt en lamannman parey.

Avek sa 2 pti mo Mr Speaker, mon pou dir ki mon pa pou sipòrt sa lamannman. Akoz i annan bann inegalite ladan. Mersi.

(APPLAUSE)

MR SPEAKER

Mersi Onorab. Onorab Pillay, i a donn son repons lo deba.

HON SEBASTIEN PILLAY

Mersi Mr Speaker. E mon remerci tou Manm ki'n kontribye, ki swa an faver oubyen kont Prozedlwa ki mon'n anmenn. Tou deba i anrissi travay Lasanble e i nesese annan deba lo tou bann size ki vin devan Lasanble.

Mon swete Mr Speaker, ki ler mon koze personn pa enteronp mwan. Mon'n ekout

tou dimoun trankilman, san ki mon enteronp okenn dimoun ki'n fer zot bann pwen. E les mwan fer mon *right of reply as it* mon drwa anba nou *Standing Orders*, ki en dokiman ki sorti dan nou Konstitisyon.

Les mwan komans kot dernyen entervenans avan mon al pli lwen Mr Speaker. Mon krwar mon bezwen dir Onorab Andre, ou pa fer zistis ou profesyon ler ou anmenn sa bann kalite largiman devan Lasanble Nasyonal.

Mon met sa Mr Speaker, akoz premyerman, Onorab Andre i *Chairman Bills Committee*. E okenn Lalwa pa sipoze ganny mete pou *Second Reading* devan Lasanble, si i pa meet the *constitutionality test*. I bezwen *meet the test of constitutionality*.

E Lalwa in pas atraver nou SLO, Lalwa in pas atraver *Attorney Zeneral*. E si *Attorney Zeneral* ti santi poudir sa Lalwa pa *meet the constitutionality test*, i pa ti ava les li pase. Annefe Mr Speaker, mon war i drol Onorab Andre pa konnen akoz *Bills Committee* in *endorse* konstisyonalite sa *Bill*, ok. I montre mwan poudir parfwa annou rod largiman ki vreman anrиси deba.

Dezyenmman Mr Speaker, nou lir lartik 24 an antye. Lartik

24 i dir ou "*the exercise of the rights of the clause 1 maybe regulated by law, necessarily in democratic society*".

Konstitisyon pa kapab protez kont son lekor, zis parey Prezidan ti fer ler i ti propoz 10enm lamannman ki i ti fer san konsiltasyon, ok? E sa mon reponn Onorab Henrie. I pa ti konsilte person lo 10enm lamannman li.

Menm ler tou dimoun ti dir zot pa dakor, i ti *proceed*. Annefe, dan en *meeting* kot Komisyon Eleksyon resaman Mr Speaker, mon'n menm aprann ki i pa'n zanmen konsilte Komisyon Eleksyon, ler *Cabinet* in al fer prononsman lo dat eleksyon. Menm Komisyon Eleksyon pa konnen. So, ki mannyer ou kapab dir sa, mon annan *witness* Onorab Cosgrow i *attend* sa *meeting*, Mr Yvon Esther i *attend* sa *meeting*, Mr Don Anacoura i *attend* sa *meeting*. E tou dimoun ki ti laba, Onorab Henrie ti laba.

E li menm li apre i ti bezwen sey eksplike ki mannyer sa i en *formula*, pa en *formula*, sa pa isi, sa pa laba. E la nou pa ni sir si le 27 Septanm pou vin dat eleksyon. Konmsi konplikasyon i vin ki nou'n ganny akize bomaten ki mon pe fer keksoz ki anti-konstitisyonnell, mon arogan.

Me larogans i sorti avek zot, e mon krwar la i enportan ki mon komans depouy en pti pe bann keksoz ki'n ganny dir apre midi.

E fotespere personn pa grense ler mon komans si oule depouy tou keksoz. Parey mon kontan dir Mr Speaker, mwan mon pa per personn antre zot. Anvoye nou pare pou resevwar e nou a rann zot parey.

So, annou komanse Mr Speaker. Premyerman, sa Lalwa ti napa naryen pou fer avek Dokter Patrick Herminie ki Ansyen Speaker Lasanble Nasyonal, ki'n *fulfill* son rol koman Speaker Lasanble Nasyonal. E annefe si nou annan en *building* pou asiz ladan avek prosedir Lasanble, striktir Lasanble, en sekretarya e servis Lasanble se gras a sa msye. Se li ki'n kree, ti napa. Me selman nou pa oule respe sa.

In fact, the whole procession ki Speaker i fer ozordi ki ou servi, *the Mace* tousala i bann linisyativ ki Dokter Herminie ti fer. Mrs Isaac ler i ti vin travay kot Lasanble i a rapel tre byen ki napa okenn lasanm.

E sa komanter ki Onorab Hoareau Mr Speaker, in fer i dezonnnet. I dezonnnet, *cheap* e i montre politisyen ki dan problemm. Akoz ler i get son

lekor dan laglas, sel kestyon ki i demann son lekor ki problemm in met li ladan, akoz dimoun Beau Vallon pa war li ditou. Sa mon kapab met lo rikord Mr Speaker, mwan mon Beau Vallon tanzantan.

Dezyenmman Mr Speaker, atraver ou Onorab Bistoquet in fini son lentervansyon lo Dokter Herminie ti *call* li zafer drog. Me i paret mon ou'n deza vann drog ou. Akoz dimoun i *call* ou...

(Interruption)

MR SPEAKER

Sorry. Onorab, ou pa kapab fer sa lakizasyon. Ou pa kapab fer sa lakizasyon. *Retract*.

HON SEBASTIEN PILLAY

Ou Speaker, ou dir mwan *retract* mon ava *retract*. Me selman ou ti'n devret fer li *retract* sa *statement* ler i ti fer. Ou pa ti'n devret les li fer sa *statement* pou denigre karakter en dimoun.

Look annou fer li senp, annou fer li senp. Zot annan en problemm avek Patrick Herminie koman en kandida prezidansyel, zot Prezidan i dir koumsa poudir personn pa pou kapab tir li avan 2025. *Call* en *snap election* nou a gete!

(APPLAUSE)

HON SEBASTIEN PILLAY

Fer senp. Fer senp. Fer senp aret gele, aret konplent aret fer isi laba. Kan zot napa okenn largiman pou servi esey denigre en dimoun. Annou aksepte poudir *you are a spent force LDS!* In fini zot letan, fini!

(APPLAUSE)

HON SEBASTIEN PILLAY

Mon a montre ou Mr Speaker, ki mannyer letan *LDS* in fini par servi parol Onorab Georges e Onorab Henrie ler zot koz lo en *PNQ* ki'n fize. Ou konnen i enteresan Mr Speaker, ki resaman mon'n aprann Onorab Georges pe blok proze lo *Assumption*, enteresan Mr Speaker, *ok*, mon'n tande.

Me i enteresan Mr Speaker, akoz? Le 21 Zen 2023 mon ti anmenn en *PNQ* ki ti demann Gouvernman;

“Vi ki Gouvernman in pran en desizyon pou permet konstriksiyon en devlopman touristik lo *Assumption*. Ki'n arive avek son plan pou annan en Baz Gard Lakot lo sa zil...”

Aprè nou ti al dan en deba lo ki pou arive ek sa zil. Ou konnen ki Onorab Georges ti fer sa zour? I ti atak mwan ki mon vin gat letan Lasanble ek sa bann *PNQ*.

Selman la ki i pe fer, i p dir pou dir *Assumption* pa kapab ale akoz i kapab annan en lenpak lo *Aldabra* koman li *Chairman SIF*. Ki ou kapab konpran? En devan, en deryer i napa.

(APPLAUSE)

HON SEBASTIEN PILLAY

Mr Speaker...

(comments off-mic)

MR SPEAKER

Order!

HON SEBASTIEN PILLAY

Mr Speaker, mon kontinyen. Onorab Georges i koz ek mwan lo Konstitisyonnèl ek sa ki ti ganny dir. Mr Speaker, Onorab Georges i oule fer nou krwar i en *legal eagle*. Me mwan mon krwar Onorab Georges i en *legal vulture*.

Akoz? Mon a eksplik ou Mr Speaker. Ou konnen akoz? Se li, ki ti dir dan Komisyon Konstitisyonnèl ki bann aki parti *US* ti pou sa bann dimoun lo Komite Santral e met zot koman Speaker. Se li.

Me ozordi pou Onorab Georges i *ok*, pou lide parti politik Speaker Lasanble Nasyonal. *This is what you call a legal vulture* Mr Speaker. Akoz

ou konnen ki arive? Onorab Georges i atak mon lentegrite, par dir ki mon pa'n prepare, mon pa'n fer mon travay. Me mon'n prepare.

Akoz annefe ler mon regard travay ki Ms Toulon, bravo Ms Toulon travay ki'n fer ki personn antre zot pa'n lir ki Lasanble Nasyonal in donn zot, in eksplik zot egzaktaman ki lesansyel mon Mosyon Mr Speaker.

E pou Onorab Larue, i paret mwan i pa tro, tro konpran ki pe pase dan Lasanble. Mon'n koze lo lartik 23 Mr Speaker. E mon'n eksplike ki mwan mon pa pe propoz siprim oubyen *infringe* lo ou drwa anba lartik 23, pa lo ou. Be mon'n bezwen servi ou, aköz se ou ki sit dan sa Sez ozordi.

Me ler mon'n koz lo ou mwan, mon pa'n koz lo ou *conduct* koman Roger Mancienne lo ou lavi personnel. Mon'n koz lo bann keksoz ki pase dan Lasanble. Aksyon ki pase koman en politisyen. Mon pa'n atak ou personnelman mwan, *ok*? Mon pa'n atak ou personnelman, *ok*?

Nou bezwen konpran en keksoz Mr Speaker. Mwan, mon aksepte poudir kreasyon en Speaker dan Lasanble Nasyonal i en kreasyon politik. Mon

aksepte sa, aköz i bezwen sorti dan en parti politik. I bezwen ganny elekte atraver en parti politik, i bezwen ganny nonmen dan en parti politik.

Me ler in ganny nonmen atraver en parti politik Onorab Andre, sa ki mon pe dir avek ou se ki ler i pran sa pos koman Speaker, i bezwen annan en zistans ki ganny *maintain* ant son rol koman en dirizan en *Leader of that party*. *Not a leader in the party, the leader of that party* ler i pe fer son fonksyon koman Speaker.

E nou'n war sa kareman, par egzanp avek Onorab Loze. Onorab Loze in oblize pou komans son diskour koumsa aköz tou lamazorite Manm lot kote latab, in atak karakter en dimoun ki'n war li koman en dimoun ki'n ed nou parti *resurge*. En dimoun ki'n renouvel nou parti. En organizater ki'n re anmenn nou parti ansanm. E sa se Patrick Herminie, kontan pa kontan mon bezwen dir !

So, what is wrong with the guy? Aköz ou pa kapab donn sa boug son sans koman en politisyen lezitim ki ou bezwen atak li personnelman?

E sa ki enteresan Mr Speaker, mwan mon koz lo Prezidan Ramkalawan koman *Head of State*. Mon pa atak son

karakter personnel, *never*. Me zot, zot fer. Sa ki mon war i drol se ki ou les sa arive. Ou les sa arive e ler Onorab Loze i fer menm keksoz i dir poudir nou pe koz lili. Be i annan en lenstans dan 6enm Lasanble pa ti bezwen en lili dan sa Lasanble. Biro ti ase.

So, annou arete anvoy lardon lo kanmarad. Akoz taler nou a koze pa pou kontan dimoun, e ou ava dir ki mon pe *infringe* lartik *Order 59(5)*.

E la Mr Speaker, les mwan vin lo Onorab Henrie avek bann *Standing Orders*. Ou konnen i enteresan sa, e mon kontan ki manyer Onorab Henrie in fer son prezantasyon avek bokou *gusto*, avek bokou lantouraz. I byen, be mon bezwen dir avek Onorab Henrie Mr Speaker, personnelman zanmen mon'n deza pran *speech* personn mwan.

Anne tou sa ki ou war mon'n ekrir la, vre mon'n demann led avek plizyer avoka, pa zis 1, plizyer. I annan ki'n anvoy mwan repons, i annan ki pa'n donn mwan repons, *so be it* napa problem. Mon'n demann zot avan.

Akoz mon ti oule konnen? Mon ti oule konnen si dan konteks legalite mon korek. E tou dimoun i dir mwan en

keksoz, difisil dan son laplikasyon.

1. Ou napa mazorite.
2. Ou bezwen fer fas avek en keksoz enportan. E sa se ki sa i reprezant en komansman selman. I pa pou vin en *finality* dan li menm.

Me Onorab Henrie, i dir ek mwan koumsa poudir nou pa pe respekte Lartik 59(5), *Order 59(5)* ki ou'n eksplike. Be Onorab Henrie apre i vire e mank respe pou *Order 36(j)*. I komans koz nou lo Polisi Lopozisyon. Me li Deputy Speaker, i sipoze *Chairman Standing Order*, i pa konnen poudir Polisi Lopozisyon *should not be the pretext of a debate, nor a subject of a question*. Akoz se sa lespri nou *Standing Order* Mr Speaker...

(Interruption)

MR SPEAKER

Sorry. Order please. Non Onorab Polisi Lopozisyon i vini subject to debate. I can't be the subject of a question. Mon rapel sa dan Standing Order. Onorab ou kapab kontinyen. Onorab Georges silvouple, les Onorab Pillay terminen. Onorab, ou annan en time limit.

HON SEBASTIEN PILLAY

Mon dakor ek ou Mr Speaker. Me mon'n ekout *from* Onorab Hoareau *up to* Onorab Woodcock koze. Oule dir mwan ou oule *curtail* mon deba prezan, akoz mon pa kapab donn mon *right of reply*? I apel en *right of reply* apre tou.

MR SPEAKER

Mon donn ou *right of reply* Onorab.

HON SEBASTIEN PILLAY

Mersi bokou Mr Speaker. Mr Speaker, i enportan pou nou konpran an keksoz. Lasanble i bezwen travay lo en premiz ki lord e prosedir i ganny etabli i ganny swiv, *ok*? Atraver ou, Deputy Speaker ki la, i annan en diferan prosedir ki i swiv vizavi en *Question Without Notice* par egzantp.

Resaman Onorab Lemiel i anmenn en *Question Without Notice* pou Minis Zialor. Onorab Cosgrow, i ganny en lenformasyon ki sa ki Minis Zialor pe dir pa neseserman korek e i le klarifye. Onorab Henrie i *adjourn* Lasanble sinedye *without, without allowing* okenn kestyon siplemanter. Me par kont ou, *the previous week* ou fek *allow* kestyon siplemanter lo 2 *Question Without Notice*.

Ti annan letan, akoz ou konnen ki ti pe al arive? Lasanble Mr Speaker ti annan letan, Lasanble ti pe al *adjourn right after*.

Ou konnen sa ki enteresan se sa Mr Speaker. Se laplikasyon, laplikasyon nou Konstitisyon i bezwen ganny amande pou fer ki sa Lasanble Nasyonal i fonksyonn koman en zouti for, en zouti endepandan nou demokrasi.

The National Assembly is not just part of our democracy. It is a tool for our democracy. Just this must be seen to be done dan Lasanble Nasyonal, e an deor pou Lepep Seselwa.

Me problem ki nou annan se ki zot pa pe war lesansyel sityasyon ki zot trouv nou ladan e en larogans pouwar in fer ki zot in bliy tousala.

E la Mr Speaker, i enportan pou nou regard serten lezot keksoz ki'n ganny dir. Par egzantp Mr Speaker, Onorab William in anmenn nou en parkour dan listwar ki mannyer keksoz i ganny fer. Be mwan mon pa pou pran sa parkour mwan. *Brother*, ou a gard sa pou ou akoz ou ki ti la sa tousala pou ou sa, *ok*?

E mwan mon krwar petet ou *permanently* lo *roaming*, akoz dernyen fwa ou ti dir nou

ou lo *roaming* ou pa konnen ki ou dir.

Akoz ler kont benefis ki ou'n gannyen ek sa parti ou'n ganny bokou plis ki mwan ou. So, ou pa pou kapab pran sa met lo mwan, *sorry* en. *Let's keep it like that.*

(APPLAUSE)

(comments off-mic)

HON SEBASTIEN PILLAY

Tou son zafer i ti annan li, wi. Mr Speaker, en lot keksoz par egzanp ki mon war enteresan se Onorab Woodcock i dir pou dir in al dan en ta detay, premye Konstitisyon ti vin devan Lasanble Nasyonal. Me Mr Speaker, ki mannyer ou kapab lalang koumsa? ti napa Lasanble Nasyonal sa letan pou premye Konstitisyon.

(Interruption)

MR SPEAKER

Onorab, mon'n dir ou pa apel bann Manm lalang.

HON SEBASTIEN PILLAY

Mersi Mr Speaker. Mon *retract*. Ti napa en Lasanble Nasyonal sa letan. E sa ki kler Mr Speaker, se ki Onorab Georges e son lasenn klik ti kont Konstitisyon e mou napa okenn

leson lo sa kote latap pou vin pran avek zot, kot i konsern al get paviyon dan palto dan lasaler la anba anvil. Non, non, non, Mr Speaker.

(APPLAUSE)

HON SEBASTIEN PILLAY

E mon a dir ou en pti sekre Mr Speaker, ler nou ti met sa paviyon la ou konnen lekel premye ki ti *boycott*? Se zot menm ou parti.

(APPLAUSE)

HON SEBASTIEN PILLAY

Zot ti kont. Naryen zot pa ti vini. Ozordi zot ki pe adore. Konmsi pou mwan mon krwar zot in leve en zour bomaten zot in bliy tou sa ki zot in fer, tou sa ki zot in dir. E *suddenly*, konmsi lepase i pli bon ki ozordi. Alors fer parey lepase.

Mr Speaker, Onorab Arissol in dir bokou keksoz. In dir par egzanp bann dimoun ki'n vin *rally* Anse Aux Pins, non ti napa naryen pou fer ek nou *rally* Anse Aux Pins.

Me Onorab Arissol i en *leader* dan *LDS*, *my friend* fer ou *rally* Anse Aux Pins ou osi ! Fer pou ou, fer pou ou ! Si ou ti annan detrwa bwarer dan ou Kongre Madanm sa pa mon

problenm sa. Sa ki mwan mon kapab dir ou Mr Speaker, se ki nou, nou pou fer Kongre ICCS e i pou deborde toultan!

(APPLAUSE)

HON SEBASTIEN PILLAY

E prezan Mr Speaker, mwan mon pa bezwen anvoy mon *clerk* al demann dimoun pou vin Kongre pou mwan mwan. Mon pa bezwen mwan. Mwan mon pa ni bezwen. Annefe mwan mon problenm se ki ler mon pa donn dimoun, si napa ase lenvitasyon nou ganny problenm. Onorab Cosgrow pa i vre?

Mr Speaker, en lot pwen ki enteresan ki mon'n bezwen - En lot pwen ki enteresan ki mon'n note se nou koz lo... mon'n ganny dir poudir mon abiz sa privez ki mon gannyen.

Me zot be gete napa enn antre zot ki pou fer mwan per laba lot kote. Napa enn antre zot ki pou fer nou per lo sa kote, e nou as long ki nou la, nou pou koz lo non *United Seychelles* e tou sa dimoun ki siport nou !

(APPLAUSE)

HON SEBASTIEN PILLAY

E personn pa pou anpes nou fer li, menm si zot anvi koup nou mikro, bat nou, touy nou, zot

anvi fer en bann keksoz ek nou. Akoz zot in menm Mr Speaker, zot in menm sey met Dokter Herminie dan prizon zot pa'n kapab.

(APPLAUSE)

HON SEBASTIEN PILLAY

Zot pa'n kapab Mr Speaker. Ou konnen akoz zot pa'n kapab? Akoz zot lentansyon i move, move Mr Speaker.

Mr Speaker, dan mon resers ki mon'n fer lo mon Prozedlwa i anmenn mwan pou fer en parkour dan diferan ziridiksyon. Napa en ziridiksyon ki apel son lekor en ziridiksyon demokratik, ki son Speaker i byen rar pou trouve. Lamazorite ki mon'n gete napa, napa lamazorite zot Speaker pa zot menm ki *Leader* Mazoriter dan sa bann parlman.

Sa bann referans ki Ms Toulon in anvoy nou sa bann dimoun ki'n ekrir sa bann liv. Par egzanp *Bergonus* ki'n ekrir en liv de referans pou bann Parlman *Commonwealth*, e i koz lo bann *Speaker of the Commonwealth* i fer referans avek zisteman lefe ki lesansyel ki nou pe rode ozordi ek sa lamannman, se zisteman pou nou kapab komans sa prosedir separasyon pouvwar ki nou

Konstitisyon i entansyonnen me i pa'n fer li eksplisit.

Nou Konstitisyon i anvi ki nou annan en separasyon pouwar an Egzekitiv, Zidisyer e Lasanble Nasyonal malgre ki in donn Prezidan pouwar siprenm koman Sefdeta. Ki i pa pou zanmen perdi, aköz sa i lefe. Me dan son aksyon, dan son fonksyonman Lasanble Nasyonal i devret endepandan avek Egzekitif. Me Egzekitiv i travay dapre en manifesto ki en parti politik in ganny elekte lo la.

E byensir alors, bann Manm dan Lasanble ki reprezant sa parti i la pou swa defann sa manifesto, enplimant li ouswa amann li *as it fits the policy of* sa parti politik ki o pouwar.

Me ler ou annan sa dimoun ki *lead* sa manifesto. Li menm ki dan Lasanble ki pe ansarz deba Lasanble, ki pe zize si en kestyon i byen oubyen non. Ki *rule* lo en *point of order*, ki decide dir i pou admet en Mosyon wi oubyen non, Mr Speaker, la nou annan en problem.

Akoz nou napa en distenksyon ant sa parti koman en group politik e Lasanble Nasyonal koman lasanm reprezantan lepep. E se sa ki mon pe rode. E Onorab Georges

Mr Speaker i konn sa tre byen li. Aköz se li ki ti dir sa. Me malerezman avek pouwar ozordi bokou lizye in frenmen e zot pe bliye.

Mr Speaker, mwan mon war i fer lapenn ler mon get Mr Bonnelame, Errol Bonnelame i pa dan Lasanble ozordi, me selman in travay pou *LDS*. En lot dimoun in ganny swazir aköz li mon pa konnen si in glise si kwa. Konmsi ki mannyer ou kapab konpran sa Mr Speaker?

(Interruption)

MR SPEAKER

Onorab, 20 Minit. Konkli silvouple.

HON SEBASTIEN PILLAY

Alors Mr Speaker. Alors Mr Speaker, i annan serten eleman fondamantal ki nou bezwen agree lo la. E sa se ki nou Konstitisyon i en dokiman dinamik e vivan. E sa ki mon pe propoze ozordi ti en moman istorik pou nou Lasanble Nasyonal.

Ti en moman istorik kot pa ozordi lamazorite ki ti'n koz sa koze pandan tou sa lannen. Mazorite ki'n anmenn sa largiman tou sa lannen ti pe ganny loportinite ozordi pou zot

standby zot largiman ki zot in fer, *that is to put your money where your mouth is. Ok?*

Me ki'n arive Mr Speaker? Malgre ki Mr Ramkalawan li menm ti deza dir pou dir Speaker i devret en refri endependan, pa devret *attend meeting* politik son parti, pa devret pe fer politik an menm tan ek son parti, Mr Ramkalawan in abandonn tou sa bann prensip, ozordi se *US* ki bezwen defann lentere pep Seselwa.

(APPLAUSE)

HON SEBASTIEN PILLAY

So, mon fini lo sa note Mr Speaker. Mon fini lo sa note enportan. Ozordi nou'n ganny sans war ki nivo demokratik vreman *LDS* i konsider son lekor. Nou'n ganny sans war ki nivo larogans *LDS* i kapab annan. Nou'n osi ganny sans vwar ki nivo politik *LDS* in arive.

E sel keksoz ki mon kapab dir ek Lepep Seselwa. Zis parey Prezidan nepli annan en motto, i bezwen pran pou nou dan son *meeting* politik, kot i dir "*LDS* sel opsyon pou Sesel". I konn tre byen ki sel opsyon pou Sesel se *United Seychelles* ! Mersi.

(APPLAUSE)

MR SPEAKER

Bon. Mersi Onorab. Bon, avek sa nou'n termin deba. E mon ava apel Manm pou vot lo *Second Reading* sa *Bill*. Manm ki an faver lev lanmen silvouple? Manm ki kont? Mersi.

Lo *general merit Constitution of the Republic of Seychelles (Eleventh Amendment) Bill, 2024*, 9 Manm in vot pour, 22 Manm in vot kont. Alors sa *Bill* in ganny rezete par Lasanble. E konsiderasyon sa *Bill* byensir i bezwen terminen la. Alor nou'n termin travay pou ozordi. Lasanble i a rebran Mardi prosen 9er. *Adjourn*.

(ADJOURNMENT)

